


駢文觀止

分類詳註



上海
大通圖書社
編印

下冊

虞陽金敏倫編纂

分類
詳註

駢

文

觀

止

下冊

上海大通圖書社印行

叔母趙太孺人七十貞壽徵詩啓

慈竹交枝。獨挺一枝之秀。貞松連理。猶欣分理之榮。^一受福不那。甘節則吉。^二伏維家叔母趙太孺人。姑山靈毓。女史靜嫻。^三歸吾叔而伉儷以偕。與先慈有妯娌之愛。豈期不造。均失所天。^四惟我母早興黃鵠之哀。而寡嫠旋泣杜鵑之血。^五齒依唇而不冷。冰映玉而逾清。^六貧也病也。數則偶而已奇。閔斯勤斯。影雖單而有對。昔者堂前將女。兩婦竟代雙兒。後來膝下撫孤。兩母各成二子。蓋孝道且兼於慈道。何未亡又痛其先亡。^七惟予乙第濫塵。已無寄鮓遺羹之樂。從弟丁年入泮。差慰丸熊畫荻之懷。^八所幸先後拜旌。一家再詔。允得幽明均感。丈石雙標。今叔母慶屆七旬。吉惟八月。痛先慈天年所未及。喜季弟甘旨之能娛。^九望月影於中秋。照鸞鏡者四十載。後仙壇之七夕。擗麟脯者八千年。^十蓋如松柏之長春。及桑榆

而未晚矣。^{十二}伏冀史家詩伯。彤管丹書。賜以燕喜之詩。嘉其烏占之願。^{十三}則母也節
偕壽著。益瞻北垞而增輝。若予也感與慶并。彌向南雲而悵望。^{十四}

【註】①述異記。南生子母竹。今之慈竹也。庾信文。白石貞松。②詩。不戢不難。受福不那。易。甘節吉
往有尚。③莊子。藐姑射之山。有神人居焉。肌膚若冰雪。綽約如處子。後漢書。皇后紀。女史彤管記功
書過。④詩。遭家不造。蔡伯喈女賦。當三春之嘉月。將言歸於所天。⑤列女傳。陶嬰夫死。守義作黃鵠
歌。杜詩。傷春泣杜鵑。⑥左傳。輔車相依。唇亡齒寒。⑦左傳。令尹不尋諸讎。而於未亡人之側。⑧唐書
選舉志。進士試策五道帖。一大經。全通爲甲第。策通四帖。過四以上爲乙第。晉書。列女傳。陶侃少爲
潯陽吏。監魚梁。以一坩鮮遺母。湛氏封鮓及書。責侃曰。爾以官物遺我。非惟不能益吾。乃以增吾憂
矣。左傳。穎考叔曰。小人有母。皆嘗小人之食矣。未嘗君之羹。孔帖。柳仲郢嗜學。母韓九熊。膽以助其
勤。宋史。歐陽修傳。四歲而孤。母鄭誨之。學家貧。以荻畫地而書。⑨漢書。張安世傳。專精神。輔天年。禮
記。慈以旨甘。⑩駱賓王詩。鸞鏡朝朝減容色。顏真卿麻姑仙壇記。七月七日。麻姑至蔡經家。莊子。上

古有大椿者以八千歲爲春八千歲爲秋。①②詩。如松柏之茂。淮南子。日影在樹端謂之桑榆。張華詩。從容養餘日取樂及桑榆。③④史通。史家之流有六。晉陽秋。二陸乃今之詩伯也。詩。貽我彤管。王勃慧義寺碑銘。翠碣高懸丹書未缺。⑤⑥詩。魯侯燕喜令妻壽母。庾信紇干弘傳。青烏甲乙之占。⑦⑧王維詩。輕舟南垞去北垞。森難卽隔浦。望人家遙遙不相繼。陸機思親賦。指南雲以寄欽望歸風而效誠。

擅責旗廝謝岱將軍啓

枚初離書舍。便領雷封。雖有愛民之心。未知事上之道。本月二十日公麾下役張升。徵李氏之租。囚周家之子。移宮換羽。意欲何爲。寧爵毋刁。志在恫喝。枚已得其情。略詰其故。而升罔知尺一。任意侮張。莫敖趾高。伯珪聲大。坐獄之鄉亭。盡駭。殺青之金布安存。此枚所以不及上聞。遽加杖決也。然而承符手力。律雖不判尊卑。而臺使軍丁。罪合先爲上請。魏絳戮楊干之僕。六騶皆驚。秀實誅郭

令之兵。一軍盡甲。^六乃蒙明公薄怒不形。觀過於黨。^七始懲破柱之風。俾識堂廉之分。繼赦如絃之直。以全傳棧之材。^八人謂枚先有不耐一官之意。而後動於刑。枚知公原有不屈一夫之心。而敢行其志。園丁芟主人之荆棘。方欲居功。子孫鞭祖父之家奴。自知小過。^九念前愆而莫贖。圖自新之有期。從此申公憲以報私恩。依然執法。而得下情。而白執事。合緩須臾。^十庶在野免銅拔之歌。亦爲公肅銀刀之隊。^{十一}

【註】①六帖。易震卦雷震驚百里。故縣令稱雷封。②古詞。移宮換羽。未怕周郎。史記貨殖傳。齊俗賤奴虜。而刁間獨愛貴。之終得其力。起富數千萬。故曰甯爵毋刁。戰國策。恫疑虛喝。③漢匈奴傳。漢遣單于書以尺一牘。後漢董后紀。汝今侮張怙汝兄耶。④左傳。鬬伯比謂其御曰。莫敖必敗。舉趾高心不固矣。後漢公孫瓚傳。瓚字伯珪。爲人美姿貌。大音聲。⑤後漢吳祐傳。父恢爲南海太守。欲殺責簡以寫經書。古者二千五百家爲鄉十里。一亭。鄉有鄉老。亭有亭長。猶今鄉正地保。得與民間訟事也。

漢蕭望之傳。故金布令甲日。⑥左傳。晉侯之弟楊干亂行於曲沃。魏絳戮其僕。又。晉悼公使程鄭爲乘馬御六駟屬馬。按。秀實段太尉名。又。汾陽王亦稱郭令公。故曰郭令。⑦神女賦。頽薄怒以自持。兮曾不可乎犯干。論語。觀過斯知仁矣。⑧後漢李膺傳。張讓弟朔爲野王令。貪殘無道。聞膺威儀。逃還京師。匿讓舍。藏於合柱之中。膺率將吏卒破柱取朔。赴洛陽獄。後漢五行志。京都童謠云。直如弦。死道邊。曲如鉤。反封侯。管子。桓公觀於廐。問曰。廐何事最難。管仲對曰。夷吾嘗爲圉人矣。傳馬棧最難。⑨橘錄。金橘生山。逕間高不及尺。許結實繁多。園丁種之以鬻於市。漢匈奴傳。子弄父兵。罪當笞。小過耳。⑩後漢張陵傳。明府不以陵不肖。誤見擢序。今申公憲以報私恩。不疑有愧色。史記天官書註。南藩次東第一。是左執法。賈山至言。民愿少緩須臾。無死思見德化之成。⑪北齊書神武紀。初魏孝明之時。洛下以兩鉞相擊。謠言曰。銅鉞打鐵鉞。元家世將末。通鑑考異。舊傳白溫璋。咸通末爲徐泗節度使。徐州牙卒曰銀刀軍。頗驕悍。璋至誅兇惡者五百人。

上尹制府乞病啓

枚歷官有年。奉職無狀。蒙明公恩勤並至。薦擢交加。雖停年之資格難回。而知己之深恩未報。人雖草木。必不謝芳華於雨露之秋。水近樓臺。益當効涓滴於高深之世。不意本月三日。故里書來。慈親臥病。枚違養之餘。已深踖踖。得信之後。愈覺驚疑。伏念枚東浙之鄙人也。世守一經。家徒四壁。對此日琴堂之官燭。憶當年丙舍之書燈。授稚子之經。割殘荻草。具先生之饌。撤盡環簪。餘膽罷含。斷機尚在。未嘗不指隨心痛。日與雲飛。自蒙丹陛之恩。得奉板輿之樂。春暉寸草。養志八年。然而萱愛家鄉。種河陽而不茂。筍生冬日。覺梓里之尤甘。客秋之蓴菜香時。堂上之魚鮓返矣。枚欲再行迎養。則衰年有恙。難涉關河。倘遠訊平安。則隅坐無人。誰調湯藥。在親闈喜少懼多之日。實人子難進易退之時。瞻望鄉關。何心簪笏。夫人情於日暮頽唐之際。顧子孫侍側。而能益精神。儒生於方寸替亂之餘。雖星夜辦公。而必多叢脞。在朝廷無枚數百輩。未必遽少人才。在

老母撫枚三十年。原爲承歡今日。情雖殷於報國。志已決於辭官。第養之一言。固須臾所難緩。而終之一字。非人子所忍言。且高堂之年齒未符。或恐事違成例。大府之遭逢難再。未免官愛江南。茲當五內焚如。忽爾三秋^{十四}牴牾。思歸無路。得疾爲名。伏願明公念枚烏鳥情深。允其養親之素志。憐枚犬馬力薄。准以乞病之文書^{十五}。實緣依戀晨昏。退而求息。非敢膏肓泉石。借此鳴高^{十六}。得蒙篆攝有人。當卽星馳就道。或老人見子。頓減沉疴。則故吏懷恩。還思努力^{十七}。此日得歸膝下。皆仁人之曲體鰥生。他年重謁軍門。如嬰兒之再投慈母^{十八}。

【註】①魏書崔亮傳。亮奏爲格制不問士之賢愚。專以停解日月爲斷。虞翻別傳。使天下一人知己者。足以不恨。唐書選舉志。裴光庭始作循資格。②宋歐陽修秋聲賦。草木無情。有時飄零。人爲動物。惟物之靈。陸士衡文賦。謝朝華於已披。啓夕秀於未振。駱賓王啓。濯纖鱗於涓滴。③漢書韋賢傳。鄒魯諺曰。遺子黃金滿籝。不如一經。史記司馬相如傳。家徒四壁立。④後漢書。巴祇爲揚州刺史。與客

坐閨飲不然官燭。虞承隆偶得丙舍云者乃正室兩旁之屋。陸游詩。常依韓愈讀書燈。⑤歸去來辭。稚子候門。宋史歐陽修傳。母鄭氏親誨之。學家貧至以荻畫地學書。⑥孔帖。柳仲郢嗜學。母韓九熊。膽以助其勤。列女傳。孟子既學而歸。孟母方績。問所學。孟子自若。母以刀斷其織。曰。子之廢學。若吾之斷斯機也。⑦搜神記。曾子隨仲尼在楚。而心動。辭歸。問母。母曰。思爾齧指。⑧隋薛道衡傳。趨事紫宸。驅馳丹陛。閒居賦。微雨新晴。六合清明。太夫人乃御板輿。升輕軒。⑨孟郊遊子吟。誰言寸草心。報得三春暉。孟子。若曾子。則可謂養志也。⑩孟郊詩。萱草集堂階。遊子行天涯。以萱比母。似始此。劉迎詩。榮歸誇梓里。吳志註。孟仁子恭武。本名宗母。嗜筍。冬節將至。筍尙未生。宗入竹林哀歎。而筍爲之出。以供母。皆以爲至孝所致。⑪晉書。張翰因秋風起。乃思吳中蓴羹鱸膾。遂命駕而歸。左傳。衛中遺民立戴公。齊侯歸夫人魚軒。⑫論語。一則以喜。一則以懼。禮記。事君難進而易退。⑬史伍子胥傳。吾日暮途遠。洞簫賦。頽唐遂往長辭遠逝。蜀志諸葛亮傳。徐庶母爲操所獲。庶辭備指其心曰。本欲與將軍共圖王霸之業。以此方寸地也。今失老母。方寸亂矣。無益於事。宋玉九辯。中替亂兮迷。

惑。書。元首叢脞哉。⑩④魏志王陵傳註。累紙誨示。聞命驚愕。五內失守。左傳。鐵之戰。繁羽御趙。羅宋勇爲右羅。無勇。慶之吏詰之。御對曰。疇作而伏。⑪⑤李密陳情表。烏鳥私情。願乞終養。宋趙普傳。庶希來世得效犬馬力。⑫⑥曲禮。昏定而晨省。唐田遊巖傳。入箕山居。許由祠旁。自號田東隣。高宗幸嵩山。親至其門。曰。先生比佳否。答曰。臣所謂泉石膏盲。烟霞痼疾者。⑬⑭星經。老人一星在弧南。晉樂廣傳。沈疴頓愈。漢尹翁歸傳。田延年爲河東太守。行縣至平陽。悉招故吏五六十人。延年親臨見。令有文者東。有武者西。古詩。努力崇明德。⑮⑯類賦。承歡膝下。史留侯世家。鮑生教我。距關無納諸侯。晉張賓傳。提劍軍門。大呼請見。道德指歸論。君如父母。民如嬰兒。

謝任畏齋都督惠蟹啓

西風幾日。難遇酒人。幽火一星。正尋鄉夢。眼波飄瞥。看茶鼎之圓生。指爪爬沙。聽琴絲之側捻。⑰⑱苦憶江湖之滋味。怕虛萸菊之光陰。亥日曾占。⑲⑳丁沽屢問。當市喧之未動。料霜信之猶遲。忽傳數輩之來。何止盈千之值。纔寬蒲縛。漸緊糠燃。

漉漉含黃。蘇蘇剝紫。恰逢八月。最愛團臍。足了一生。肯孤左手。肥趁稻芒之飽。^{十一}
饒守開顏。香經皂莢之添。^{十三}醉侯無恙。新詩未換。嘉惠先承。不勞議食於門生。^{十五}何
待加恩於水族。供尊前之風味。筌簪今朝。念渡口之蒼茫。緯蕭前夕。^{十七}水鄉慣住。
莫愁爾雅之誤人。^{十六}茅店方來。幸勿制詞之笑我。

【註】①蘇詩。蟹眼已過魚眼生。②崔玉茶詩。一鼎水煎紅蟹眼。③張憲詩。撲紙春蠶亂爬沙夜蟹行。
④琴訣凡彈琴輪指曰蟹行。⑤山家清供橙蟹蒸熟既香而鮮使有新酒菊花之興。⑥白居易詩。亥
日饒蝦蟹。⑦陶隱居云。蟹未被霜者有毒。⑧黃庭堅詩。寒蒲束縛數十輩。⑨陸游詩泥爲緘封糠作
火。⑩清異錄。盧純以蟹肉爲一品膏曰四方之味當許含黃伯第一。⑪蟹譜。蟹至八月銜稻芒兩
莖長寸許束嚮至海輸送海王之所。⑫蘇詩。堪笑吳興饒太守新詩換得幾團尖。⑬升庵外集。
淮南糟蟹一器數十蟹入皂莢半挺則經歲不沙。⑭宋史种放傳。隱終南山自號雲溪醉侯。⑮
南吏何顥侈於味稍欲去其已甚者猶有鮓脯糖蟹使門人議之曰蟹之將糖躁擾彌甚。⑯傳肱

蟹譜。或編諸繩縷。或投諸簞簟。^①^②高似孫蟹賦。工緯蕭兮承流。^③^④世說。蔡司徒見鬻蜺大喜曰。蟹有八足。加以二螯。令烹之。既食。吐下。委頓。方知非蟹。後向謝仁祖說此事。謝曰。卿讀爾雅。不熟。幾爲勤學死。

乞陳秋堂表弟分印泥啓

千秋風雨。常留紅沫之痕。^一萬卷圖書。足煥朱泥之色。^二則夫雲腴既琢。石凍方鐫。藉丹牖之施。^三長緇紈之價。苔窠小押。憑一角而成珍。^四魚腹親緘。歷三年而不滅。^五是必菁華之畢采。而後調合之能良。足下鐵筆稱工。印人自署。吞丹篆之一卷。^六織霞機之九張。每當長札綢繆。短章鄭重。^七光交蠟淚。影活猩雲。因押尾而邀青。儼推心而示赤。伏願誼敦與共。情念有連。^八分勾漏之藏。檢冰臺之蓄。^九碾珊瑚而作屑。搗香麝以成塵。^十調以百煉之油。曝以三庚之日。雪方池裏。有待分頒。銅博山邊。好憑密貯。愧拳芝之莫報。望製錦之先貽。正宜鈐付收藏。趁新裝於玳瑁。^{十一}

只恐印來顛倒。發淺笑於玫瑰。^{十六}

【註】①珊瑚鈎詩話。丹砂煉爲黃金碎以染筆入石不去名曰紅沫。②庾肩吾詩。金簿圖神燕朱泥印鬼丸。③楊慎外集。丹牒濡印染籀之具也。④梅堯臣詩。丹砂挈印窠。⑤古詩。藏之懷袖中三年字不滅。⑥異人傳。韓文公夢人與丹篆一卷吞之。⑦妝樓記。開元初宮人有進御者以綢繆記印於臂上。⑧有連者連姻也。⑨晉書。葛洪欲煉丹聞交趾出丹砂求爲勾漏令。⑩爾雅。釋草艾冰臺。⑪南海古蹟記浮邱山有葛洪珊瑚井。⑫李賀詩。搗麝成塵香不滅。⑬清異錄。和魯公有白方硯白題硯室曰雪方池。⑭考古圖。爐象海中博山下盤貯湯使潤氣蒸香象海之四環。⑮李商隱謝陳公和詩。啓思將玳瑁爲逸少裝書。⑯書史會要。趙松雪夫人管道昇善書畫吾子行題其所畫竹石以好嬉子私印倒用於跋尾松雪見之曰這瞎子道婦人會作畫倒好嬉子耳。

募修祁縣學宮疏

周官九兩之職。曰儒以道得民。夫子數仞之墻。諸生以時習禮。是以文翁之化

益部。刀布相遺。^一虞溥之治鄱陽。丹青並染。^二要使几筵有秩。風雨無虞。而後良璞剖瑩。瓊寶出焉。^三幽蘭扇發。馨烈流焉。信乎士林之津逮。^四在乎蠻序之鼎新也已。祁州地重畿南。星分昴次。望春橋畔。半讀書之燈。解瀆城邊。^五盡鳴絃之室。王子雍故封宛在。^六而七經之學傳。劉仲洙遺愛未忘。^七而六善之教著。固知虹含玉色。鐸奏金聲。氣淑於春。化成自古。兒童逐隊。能爲俎豆之嬉。^八榆柳成行。卽是文章之樹。^九特是賢聖之關至重。丹牒之色宜新。而乃久閱星霜。頻穿鳥鼠。桴棼彫剝。宋廬傾頽。^十至使射瓠葉之俎者草行。牽束修之羊者雨立。梁陰載缺。綿蕞安施。^{十一}匪惟都人士之差。抑亦守土者之責也。今者營室星明。^{十二}洛如花照。^{十三}具梁卵煇黃。而卜吉計竹頭木屑以程功。竊念金布祇園。尙須長者。豈有錢輸光學。^{十四}不藉羣公。用敢告之通衢。襄其盛事。韓章具舉。^{十五}量鼓爭操。庶幾一簣而爲山。何待十年而樹木。從此雲薨構就。路可梯青。月斧修成。室皆生白。^{十六}聖人道大。君子澤長。食

報何窮。但驗科名之草。落成有慶。還聞絲竹之聲。^{十八}

【註】①按蜀益州亦曰益部。②晉虞溥傳。除鄱陽內史大修庠序廣招生徒於是至者七百餘人溥乃作誥以獎訓之曰學之染人甚於丹青。③宋書臧燾傳。高祖鎮京口與燾書荆玉含寶要俟開瑩幽蘭懷馨事資扇發。④水經注。而世人罕有津逮者。⑤後漢書章帝八王傳解。續亭侯淑以河間孝王子封。⑥畿輔通志。西漢常山憲王子以兄勃坐罪廢。封平爲正定王傳烈王偃孝王由安王雍。⑦畿輔通志。劉仲洙金大定時爲祁州刺史。以六善爲教民化之。⑧史記孔子世家。孔子爲兒嬉戲常陳俎豆。⑨清異錄。張曲江里第之側有古柘嘗因狂風發其一根解爲器具花紋甚奇人以公之手筆冠世目之曰文章樹。⑩西京賦。增桴重棼鏐鏐烈烈。又爾雅。桼廬謂之梁。又韓愈徐偃王廟碑。梁桼赤白彫剝不治。⑪漢叔孫通傳。與其子弟百餘人。爲綿蕞野外習之注立竹及茅索營之習儀其中。⑫史記。天官書營室爲清廟曰離宮閣道。⑬張寶就印錄。吳興山中有一樹類竹而有實似莢狀鄉人見之以問陸澄澄曰名洛如花郡有文士則生。⑭唐書劉允章傳。咸通中允章爲禮

部侍郎。改國子祭酒。建言羣臣輸光學錢治庠序。詔曰可。^①^⑤管子舉韓章則載食而駕。^①^⑥楊萬里詩。更借天公修月斧。^①^⑦莊子。虛室生白。^①^⑧漢魯恭王傳。欲壞孔子舊宅以廣其宮。聞鐘磬琴瑟之聲。遂不復壞。

秋雨庵募建瘞骨塔疏

披白草於寒原。俯青苔於秋井。陰烟半滅。燐火四生。楮幕將灰。^二條衣不掩狐狸。^三戴頭而舞。烏鳶攫肉而飛。縱死者之無知。實生人所不忍。在昔周官設除鼬之職。月令頒掩骼之條。以置榻。^四無穢虐士。意甚周也。後若劉昌埋戰骨於涇源。^五陳向瘞遺骸於古汴。德同歸厚。何擇於北邙。^六善乃陰行。可方之西伯。^七斯又推仁同類。展義九幽。均自効其慈心。有足襄乎王政。揚州地當綰轂。^八人雜流庸。^九騎鶴背而爭來。景螢光而易燼。^十鬼中遽執。^{十一}鄉夢俄空。雖禪智寺前。墓田不少。而玉鉤斜畔。靈骨何多。肩髀之冢未成。髑髏之山宛在。^{十二}冰霜刻劃。泥草模糊。慘慘成堆。

啾啾欲哭。亦有生前華屋^{十三}。昔者高軒。閱歌舞之場。列衣冠之隊。而陽春一去。夕
照相催。花木屬乎他人。子孫降爲皂隸。平時石椁。慕司馬之三年。此日桐棺。欠
劉伶之一鍤^{十四}。幽篁余處^{十五}。斷竹誰歌^{十六}。過之者有不愴惻徘徊。雷歎頽息者乎^{十七}。則有
秋雨庵竹溪上人者。餐大悲之飯^{十八}。然無盡之燈^{十九}。哀此雨淋日炙之餘。擇爲集朽
藏枯之所。欲使尸陀變相。涌出千花^{二十}。蒿里游魂^{二十一}。登之四果^{二十二}。一坏可覆。七級須營。
立脚非難。合尖有待^{二十三}。夫二花寄佛^{二十四}。俱有因緣。巨象捨人^{二十五}。可知根器。所望十方長
者。再世宰官。或指上而流泉。或掌中而雨寶。香煙聚處。卽現支提^{二十六}。海氣連時。如
瞻阿育^{二十七}。慈航普渡。高會無遮。夏屋覆人。佳城待汝^{二十八}。生死人而肉白骨。齊上化臺。
上碧落而下黃泉。並通覺路。猶慮食氣食香之輩。炬口針口之倫^{二十九}。焦種流哀。藕
絲纏痛。是用朗鳴法鼓。廣演瑜伽。爲薜荔道而懺除。設盂蘭盆而救度^{三十}。紙錢似
雪。香米如山。大招小招。聽酸文之唱。新鬼故鬼。慶歡國之遊。成茲超拔之宏。實

賴檀那^{三十一}之助。婆心無已。苦趣全離。永謝蓬科。長留塔相。光能周徹。兼銜明月之
二分。福不唐捐。勝誦牟尼之千遍。

【註】①元好問詩。銜杯直待秋井塌。青苔白骨憐君愚。②禮記疏。楮覆棺之物。③梁武帝紀。詔下遠
近。若委骸不葬。或條衣莫掩。量給棺具收領。④周禮秋官。蜡氏有死於道路者。令埋而置楬。⑤唐劉
昌傳。初城平涼。當刦盟後。將士骸骨不藏。昌始命瘞之。⑥河南通志。北邙山在洛陽城北。唐宋名卿
塚墓多在焉。⑦新序。周文王作靈臺。掘地得死人骨。文王令更葬之。⑧史記貨殖傳。棧道千里。無所
不通。惟褒斜。綰轂其口。⑨漢昭帝紀。民匱于食。流庸未盡還。⑩南畿志。螢苑在揚州府治北。⑪國
語。余左執鬼。中右執殤。宮凡百箴。諫吾盡聞之矣。⑫續搜神記。張榮爲高平。戊夜見中山火起。土
人皆惶惑。明日往視。惟觸髅白頭布散于山中。⑬曹植詩。生存華屋處。零落歸山邱。⑭晉書。劉
伶傳。嘗乘鹿車。攜一壺酒。使人荷鍤而隨之。謂曰。死便埋我。⑮楚辭。山鬼。余處幽篁兮。終不見天。
⑯吳越春秋。陳音曰。古者人民朴質。死則裹以白茅。投於中野。孝子不忍見。父母爲禽獸所食。故

作彈以守之。絕鳥獸之害。故歌曰。斷竹續竹。飛土逐害。⑩⑦馬融長笛賦。霑歎頽息。指膺解標。⑩⑧楊炯孟蘭盆賦。大悲之飯。出之香積之天。⑩⑨張說詩。惟傳無盡燈。可使有情悟。⑩⑩西域志。如來在日葬比邱於尸陀林。⑩⑪樂府解題。蒿里山名在泰山南。⑩⑫象教皮編。四果者。須陀洹爲入流果。斯陀含爲一來果。阿那含爲不來果。阿那漢爲無生果也。⑩⑬五代史李崧傳。爲浮屠者必合其尖。⑩⑭佛國記。那竭國城是菩薩以銀錢買二莖花供養定光佛處。⑩⑮法苑珠林。葉波太子須大拏好布施時。有敵國言葉波國王有白象。誰能往乞。有婆羅門八人。卽白王往乞。太子牽象授之。王聞遂出太子。敵國卽遣使者裝被白象以還太子。⑩⑯翻譯名義集。有舍利名塔無舍利名支提。⑩⑰水經注。阿育王壞七塔作八萬四千塔。⑩⑱史記。夏侯嬰傳注。公卿送葬至東都門外。馬不行。掎地悲鳴。得石椁有銘曰。佳城鬱鬱。二千年見。白日吁嗟。滕公居此室。⑩⑲法苑珠林。餓鬼大數有三十六種。二針口。鳧鬼以財雇人。令行殺戮。故咽如針鋒。滴水不容。六食氣鬼多食美食。不施妻兒。常困饑渴。惟得鳧氣。十四食香鬼。由買惡香。多取酬直。唯食香煙。後受窮報。炬

口鬼者此鬼口中常吐猛焰熾然無絕身如被燎。②⑩釋氏要覽。目連比丘見其亡母生餓鬼中不得食。佛言七月十五具百味五果著盆中供養十方佛然後得食。目連白佛行孝順者亦應奉盂蘭盆。③⑩善覺要覽。梵語陀那鉢底唐言世主稱。檀那者卽訛陀爲檀去鉢底故曰檀那。

【傳部】

祝貞女傳

貞女姓祝氏。海甯之袁花里人。庠生維馨之第四女也。生而淑慎。夙簡笑言。季蘭之姿。有齋傳其敬。靜女之德。其妹表其徽。稍長讀書。能通大義。中表所則。善習禮儀。篇什兼陳。惟取德象。不矜柳絮之詠。有慕女貞之辭。業已志喻清霜。心盟白日。及笄。許字海鹽徐生杼生。績學士也。河魴飾詠。堂雁修儀。方將伫天桃之九華。候標梅之三實。而破窗風雨。鐵硯空磨。早歲龍蛇。玉棺遽下。沉疴莫救。

中道云。徂八。訃至。父母以女性烈。祕不以聞。豈知瓊瑰盈懷。遂徵於夢。白蜺嬰茀。
如俟平堂。信諸冥冥之靈。矢諸皦皦之節。牽絲繫恨。銜石填冤。兩字懷清。隻身
赴義。蓋其歸於徐也。年二十七。距生沒三年矣。修文已去。空牋書帷。露紉而來。
爲其匱主。奠棗栗之贄。婦式無愆。承滫瀡之歡。姑恩有曲。果使壽諤難老。慈竹
恆留。同敲隔戶之棊。不輟升堂之乳。亦可相依共命。稍慰孤棲。無何。姑復病卒。
旣捋其荼。又集於蓼。天只人只。將之死而奚辭。叔兮伯兮。與久居而不可。我辰
安在。實命不猶。徒以褰抱猶虛。聖周莫卜。聊析旁風之產。甘分下瀝之田。或者
一木之能支。庶幾九原之可慰。於是淒淒紙帳。燄燄糠燈。鑪謝熱於寒晨。簞捐
揮於暑夕。貧家力賤。巧婦炊難。鍊指生皴。剗心貯苦。天邊別鵠。如答平機聲。箔
上春蠶。亦肖其愁狀。每至明星有爛。荒雞旣鳴。首飛蓬其未眠。日鰥魚而常醒。
身之瘁也。志之悲也。而乃七陶八冶。遍歷愁辛。五角六張。偏多乖午。烏鳥之傷

心曷極。鵠原之急難安期。^{二十七}彈孝水而將枯。呼首山而莫諾。^{二十八}加以覲生竊藏。慘肆^{二十九}摸金。登巴婦之臺。空其丹穴。傾柳家之篋。化去銀杯。徒勞營地之心。莫罄呼天^{三十一}之恨。然猶以珠能再返。蚌可重招。冀尾段之償吾。亦眉頭之伸我。^{三十三}無如勞商更^{三十四}唱。靈宅先虧。犀不鎮心。龍真出骨。屋牽蘿而莫補。袖倚竹而徒寒。^{三十六}斯則桐只半^{三十七}生。藥無獨活也已。嗟嗟。剝蝕太深。雖金石而亦敝。凌競無已。卽松柏而終凋。此^{三十八}十餘年來雪虐風饕。手經指挂。思所以妥亡靈。謀幽壙者。一空於盜。再耗於病。^{三十九}迫餘生於短日。盪危魄於孤雲。煢煢一身。茫茫此感。有不口如銜闕。腸若涓湯^{四十}者乎。迨至疾已不支。形幾欲蛻。賣珠之婢旣遣。築楹之書可焚。^{四十一}猶思鬻產爲營^{四十二}葬計。復以衆尼之不果。蕉心抽盡。而生意難回。鵲血啼殘。而春風已去。由是水^{四十三}漿盡却。氈雪無吞。黃絹題詩。朱絲畢命。凡絕粒八日。不死。遂自經而絕。年四十^{四十四}三歲。嗚呼。尸寒陰氏。徒留粉壁之書。骨委王冢。誰檢皮金之字。哀哉。古有矢靡

他之節。振獨秀之風。^{四十五}或化石而稱貞。或靡笄而示烈。要皆明襄陰教。冥踐義途。^{四十七}若夫輪渺三周。劍酬一諾。^{四十八}芣苢之歌無及。卷施之草永傷。^{四十九}既已奇操特標。寒蕤僅擢。乃必使伶仃采苦。宛轉緘愁。^{五十}促其九死之餘。直至重泉之下。^{五十一}天乎已酷。痛矣難言。嗣子鳴珂。女歿後所立。叔子也。捧土之懷。未忘乎幽魄。入祠之願。有踐乎賢雄。^{五十二}他日燉著史書。榮邀綽楔。^{五十三}馨香勿替。似續常延。^{五十四}不其餒而藉免。若敖之鬼。必有興者。且看趙氏之孤。^{五十五}

【註】①詩。誰其尸之。有齋季女。左傳。濟澤之阿。行潦之蘋藻。置諸宗室。季蘭尸之敬也。詩。靜女其姝。②晉書。王渾妻鍾氏。禮儀法度。爲中表所則。漢書外戚傳註。窈窕德象女師之篇。皆古箴戒之書也。③後漢書。魯漆室女。見女貞木。喟然歎息。援琴而絃。歌以女貞之辭。④禮記。十有五年而笄。易。女子貞不字。十年乃字。⑤詩。豈其食魚。必河之魴。豈其娶妻。必宋之姜。禮記。壻執雁入。揖讓升堂。⑥易通卦驗。驚蟄初九。桃始華。詩。標有梅其實三兮。⑦五代史。桑維翰鑄鐵硯。以示人曰。硯敝則改。後漢書。

鄭康成夢孔子告曰起起今年歲在辰明年歲在巳。蘇詩。君窮一窗下風雨更相侵。⑧晉書樂廣傳。沈疴頓愈。出師表。中道崩殂。⑨離騷。白蜺嬰茀胡爲北堂。⑩莊子。視乎冥冥聽乎無聲。古逸詩。皦皦者易污。⑪天寶遺事。張嘉貞欲納郭元振爲壻令五女各持一絲於幔前元振牽得一紅絲得第三女。⑫周禮匱主註。匱盛主之器。儀禮士喪禮註。鬢異手髻髮有既去洒而髮爲大紛如今婦人露紛其象也。⑬周禮。掌婦式之法。禮記。婦人之贊。椶榛脯修棗栗。又。棗栗飴蜜以甘之。葦苴枌櫨。免薨滌瀧以滑之脂膏以膏之父母舅姑必嘗之而後退。古樂府。有姑恩曲。⑭詩。永錫難老。⑮唐書。崔山南曾祖母年高無齒祖母事姑孝每旦升堂乳姑。⑯詩。予手拮据予所捋荼。又。未堪家多難予又集於蓼。⑰詩。之死矢靡它母也天只不掠人只。又。叔兮伯兮何多日也。⑱詩。天之生我我辰安在。又。抱衾與裯實命不猶。⑲禮記聖周註。聖者治土爲磚而四周於棺之坎也。⑳韓愈南海神廟碑。上雨旁風無所蓋障。陶潛。有丙辰八月中於下潁田舍觀獲詩。㉑劉克壯詩。紙帳鐵擎風雪夜。周昂詩。糠燈照夜多。㉒戴表元詩。皮膚皴裂十指禿。蔡邕文。身勤心苦。㉓

南史。褚彥回援琴奏別鵠之曲。說林。蠶最巧作繭。往往遇物成形。有寡婦獨宿。倚枕不寐。私於壁孔中視鄰家蠶箔。明日繭多。類之雖眉目不甚悉。而望去隱然似愁女。①⑩⑭詩。子興視夜。明星有爛。晉書祖逖傳。逖中夜聞荒雞鳴。②①⑤陸游詩。愁似鰥魚夜不眠。詩。自伯之東。首如飛蓬。②①⑥汲冢周書。七陶八冶。九柯十匠。請歸之冶。嬾真子錄。五角六張。此古語也。謂五曰遇角宿。六曰遇張宿。此兩日作事多不成。②①⑦元命苞。烏孝鳥也。李密陳情表。烏鳥私情。②①⑧西征賦。澡孝水而濯纓。左傳。初宣子田於首山。舍於翳桑。見靈輒餓。問其病。曰不食三日矣。②①⑨楊維禎。有梁家竊藏奴詩。蘇詩。奈有中郎解摸金。③①⑩史記。巴蜀寡婦。清其先得丹穴。而擅其利數世。唐書柳公權傳。酒器盃盂。一筍緘。籐如故。其器皆亡。公權曰。銀杯羽化耳。③①⑪淮南子。經天營地。史記屈原傳。故勞苦倦極。未嘗不呼天也。③①⑫韓愈賦。如還合浦之珠。搜神記。以青蚨蟲血塗八十一錢。凡市物皆能飛歸。④①⑬唐庚詩。頭西歸去。君休怪尾段無多。不奈焦。五代史。郭崇韜。眉頭不伸。④①⑭楚詞。伏戲駕辯。楚勞商些。雲笈七籤。乃登廣寒上清靈宅。⑤①⑮宋讀曲歌。自從別郎後。臥宿頭不舉。飛

龍落藥店骨出只爲汝。③④⑤杜詩。侍婢賣珠迴牽羅補茅屋。又。天寒翠袖薄日暮倚修竹。③④⑤⑥淮南子。金石不敝。高適鶻賦。掃窟穴之凌競。論語。歲寒然後知松柏之後凋也。③④⑤⑥韓愈祭張員外文。雪虐風饕。淮南子。伯余之初作衣也綖麻索縷手經指挂其成猶網羅。③④⑤⑥左傳。粦粦余在疚。世說。對此茫茫百感交集。④⑤⑥龜策列傳。腸如涓湯。古樂府。石闕生口中銜碑不得語。④⑤⑥⑦杜詩。侍婢賣珠回。晏子春秋。晏子鑿楹納書以遺子。④⑤⑥⑦漢書蘇武傳。單于幽武置太窖中天雨雪武臥吞雪與氈毛並咽之。禮記註。水漿非盛饌也。④⑤⑥⑦曹娥碑。黃絹幼婦。王士禎詩。痛哭視兒孤畢命朱絲繩。④⑤⑥⑦後漢書。陰瑜妻荀爽女也。名采。早寡。父母欲強嫁。郭弈爽悅。詐稱病。召采。采歸而懷刃。爽執奪不得已。到郭氏。僞爲歡。建四燈共談。弈敬憚之。至曙。弈出。采令左右辦浴。旣入室。以粉書扉曰。尸還陰。陰字未成。懼有來者。乃以衣帶自縊死。語林。王烈婦者。劉女也。夫死。密製斂服。盡飾。又剪一皮金爲一香字。以示侍女曰。此所以志也。吾骨亦若是耳。④⑤⑥⑦詩。之死矢靡他。宋書謝莊傳。爲赤鸚鵡賦。袁淑見而歎曰。江東無我卿當獨秀。④⑤⑥⑦神異記。武昌有望夫石。相傳有貞婦。

送夫行役山頭化爲石。史記。趙簡子姊前爲代王夫人及代王被殺其姊聞之靡笄自殺。④⑩⑦禮記。婦順不修陰數不得。晉書列女傳論。斯皆冥踐義途匪因教至。④⑩⑧禮記。壻執雁入揖讓升堂再拜奠雁蓋親受之於父母也。降出御婦車而壻授綏御輪三周。④⑩⑨韓詩外傳。芣苢傷夫有惡疾也。辨命論。再耕歌其芣苢。草木考。卷施草名拔心不死。⑤⑩⑩擬李陸詩。困苦獨伶仃。晉書皇甫謐傳。宛轉萬情之形表。⑤⑩⑪楚詞。雖九死其猶未悔。陳旭感舊文。路隔重泉。⑤⑩⑫陶嬰黃鵠歌。雖有賢雄兮。杜詩。石鏡通幽魄。⑤⑩⑬元帝紀贊。多材藝善史書。吳鼎芳唐嘉會妻詩。風聞下旌詔光彩生鄉閭。煌煌樹綽楔巍巍建靈祠。⑤⑩⑭左傳。明德以薦馨香。詩。以似以續。續古之人。⑤⑩⑮左傳。鬼猶求食。若敖氏之鬼不其餒而。史記趙世家。屠岸賈攻趙氏滅其族。趙升妻成公姊免身生男屠岸賈索兒匿袴中竟無聲乃脫居十五年晉景公疾乃與韓厥謀立趙孤兒。

家蘇泉編修傳

君名紹燦。字澄埜。一字蘇泉。安徽歙縣人。寄籍揚州。光公三十二世孫也。自曾

祖以下。至父嵩堂公。並學富千跖。聲雋一鬢。季子之風。克散其縞紵。左臺之秀。遞衍其馨香。君采照鱗辰。德修髫歲。稽甲丁之籍。咸誦於心。陳庚子之經。必肅而拜。乾隆三十五年。恩科。舉於鄉。四十年成進士。以內閣中書奏留武英殿行走。香簪紅杏。慈恩之宴方叨。橐奉紫荷。著作之庭無忝。有光家業。實炳國華。四十二年復舉充四庫全書薈要處總校官。欽賜翰林院庶吉士。劉向之登天祿。稱爲秘書。荀勗之校中經。益之新簿。蓬池斫鱸。郢水分醪。身之榮也。恩之渥也。四十三年。以父嵩堂公憂去官。明年生母洪太安人繼卒。作孝未已。致怯風吹。積哀之餘。乃見柴立。天性純篤。人皆稱之。服闋還京。四十九年。散館。授職編修。充三通館纂修官。五十三年。復遭繼母某太夫人之喪。回籍。林無靜柯。乖循陔之願。處爲遠志。堅誓墓之詞。君自此遂不復出矣。生平以經世自任。每謂職踐清禁。注名史官。溫飽要不以居心。文章果何以報國。故自鹽鐵之論。河渠之書。

金布令甲之遺。^{十六}繞雷周陸之險。^{十七}莫不詮貫有敘。條舉無失。作藝苑之韜鈴。爲詞林之典畧。豈徒采十道四籥之志。足備處分。^{十九}答三桓七穆之文。能通訓故而已哉。家居十載。行著一鄉。身處富麗之區。心厭豪奢之習。義形於色。魚里之優不觀。敝莫改爲。狐裘之年可數。惟道是仗。枕善而居。^{二十一}以恭敬式於里閭。以樸誠訓其子弟。有傳南容之方格。^{二十二}似陳仲弓之平心。^{二十三}至於舉扇障塵。獨憎庾亮。^{二十四}移床讓客。爲鄙僧真。^{二十五}又其疾惡之如風。^{二十六}不顧飛言之似雨也。^{二十七}君精於鑒古。尤工隸書。貞吉之編。賅乎歐趙。^{二十八}矯扁之法。參以冰斯。^{二十九}詩則以少陵爲宗。顧不輕作。以爲詩無關係。徒爲風雲月露之詞。無益也。昔王襄之藉宣風化。^{三十}穎達之取裨生靈。^{三十一}所謂洩哀樂之情。頌善醜之德者。其以此乎。嘗廣選諸家。自漢迄明。爲歷代詩鈔八十六卷。繼以卷帙太繁。刪之爲金薤集三十二卷。外編五卷。附以聲調譜說一卷。情變所孕。表裏必符。剗多寶之船。^{三十三}合萬花之舞。期山期水。聚千古於一家。應

宮應商。會衆音爲大樂。不亦盛哉。其聲調譜說。業已梓行。金薤集僅刻二卷。令弟紹浣。將續刊之。助以同聲。不異壎箎之譜。惠諸後學。可稱棠棣之碑也。三十四已。君極慎起居。素無疾病。年來偶患陰濕。五月中病足十餘日。旋即就痊。勿藥可占。何求乎麥麴。三十五養生有主。安用乎谷神。三十六乃黃札方勤。三十七玉棺遽下。雲中揮手。世上傷心。竟於嘉慶三年六月初一日戌時。中暑暴卒。春秋五十有五。嗚呼痛哉。余與君爲乙未同榜士。猶憶官京師時。出爲聯騎之遊。三十八歸訂隻雞之局。流連酒德。跌宕琴歌。何其樂也。及君返里。余亦以假旋之役。時相往來。今年又主講維揚。得數晨夕。同年之面。不隔於心。已知之言。猶在於耳。不意中年怛化。前事蒼茫。能不重秦失之三號。三十九發張翰之一慟。四十哉。君初娶鄭宜人。繼蔣宜人。顧宜人。子三人。嘉樹樂。鄭宜人出。櫛顧宜人出。嘉樹出。嗣長兄後。孫三人。

【註】①陳書始興王伯茂傳。玉映觴辰蘭芬綺歲清輝美譽日茂月升。②隋經籍志。祕閣之書東屋

藏甲乙西屋藏丙丁。③齊書。臧榮緒嘗以宣尼生庚子日陳五經拜之。④秦中歲時記。進士杏園初宴謂之探花宴。又國史補。進士既捷列書其姓名於慈恩寺璫。⑤西京賦。又有承明金馬著作之庭。⑥拾遺記。劉向校書天祿閣夜有老人植青藜杖吹火照向。漢書。成帝詔。劉向領校中五經秘書遷中壘校尉校書天祿閣。⑦隋經籍志。魏秘書郎鄭默始制中經秘書監荀勗又因中經更著新簿。⑧李德裕詩自注。每學士初上賜食皆蓬萊池魚膾夏至後頒冰及燒香酒以酒味稍濃每和冰而飲禁中有郢酒坊。⑨北史。崔子約居喪哀毀骨立人云崔九作孝風吹卽倒按子約名儵。⑩晉殷仲文傳。驚飈拂野林無靜柯。⑪世說。謝公始有東山之志后嚴命屢徵勢不獲已始就桓公司馬於時人有餉桓公藥草中有遠志公取以問謝何一物而有二稱郝隆在座應聲答曰處則爲遠志出則爲小草謝公甚有愧色。⑫晉書。王述爲揚州刺史檢察會稽王羲之稱病去郡于父母墓前自誓。⑬柳宗元文。思報國恩獨唯文章。⑭漢藝文志。桓寬鹽鐵論六十篇。⑮史記自序。決瀆通溝作河渠書第七。⑯漢蕭望之傳。金布令甲。⑰蜀都賦。江湖有繞雷之險。⑱馬融廣成頌。周陸

環瀆右轡生途。⑩⑨唐書韋澳傳。澳取十道四方志手加紬次題爲處分語。⑩⑩唐書武平一傳。崔日用曰魯三桓鄭七穆奈何。⑩⑩①新語。枕善而居不以視之不見而傷其心不以聽之不聞而變其節也。⑩⑩②後漢書。傅燮本字幼起慕南容三復白圭乃易字焉朝廷重其方格。⑩⑩③後漢書。陳寔傳。字仲弓在鄉閭平心率物其有爭訟輒求判正。⑩⑩④晉書王導傳。庾亮居外鎮而執朝廷之權導不能平每遇西風塵起舉扇自蔽曰元規塵汚人。⑩⑩⑤南史江革傳紀。僧真幸於武帝謂帝曰臣小人階榮至此惟就陛下乞作士大夫帝曰由江革謝淪可自詣之僧真承旨詣革登榻坐定革便命左右曰移吾牀讓客僧真喪氣而退。⑩⑩⑥後漢書朱桓傳。車如雞栖馬如狗疾惡如風朱伯厚。⑩⑩⑦易林。尊空無酒飛言如雨。⑩⑩⑧歐陽永叔著集古錄十卷趙謂趙明誠著金石錄三十卷。⑩⑩⑨冰謂李陽冰斯謂李斯。⑩⑩⑩後漢書王褒傳。益州刺史王褒欲宣風化於衆庶聞王褒有俊才使褒作中和樂職宣布詩選好事者習歌之。⑩⑩⑪孔穎達正義序。夫詩者論功頌德之歌。止僻防淫之訓雖無爲而自法實有裨於生靈。⑩⑩⑫王符潛夫論。詩賦者所以頌善醜之

德洩哀樂之情也。③④⑤法苑珠林。相聞而赴者咸見鸞師在多寶船上。③④⑤唐書循吏傳。賈敦頤爲洛州司馬弟敦實爲長史洛人爲立碑號棠棣碑。③④⑤莊子。養生主吾聞庖丁解牛得養生焉。③④⑤老子。谷神不死。③④⑤南史張興世傳。檄板不供由是有黃紙札。③④⑤劉峻廣絕交論。出平原而聯騎。③④⑤莊子。老聃死秦失弔之三號而出。④⑤世說。顧彥先喪張翰往哭之不勝其慟。

高鳳詔傳

余總角時。交於高兄秋厓。旣同井閭。得數晨夕。樹蕙百畝。足證其好修。采菽中原。有如其爲善。文戰屢失。禪悅自耽。遂息初心。以溪後起。子三人。長嗣於伯兄。鳳詔其次子也。肄簡肄諒之餘。佩鞶佩觿之歲。亦旣覲止。心焉契之。迨余庚戌假還。訪舊造門。與其弟攀桂出見。子衿之選。並雋其鬢聲。父書之傳。不愆於庭對。余顧秋厓而羨之。謂皆蘭筋已成。一蹴千里者也。甲寅。鳳詔舉於鄉。明年正

月北來。時余已還京師。遂同廬旅。破窗風緊。冷飈油燈。危檐雪深。凍生瓦硯。聲伊伊而課^五。筆颯颯而飛晨。學如雞跖之貪^六。射必蝨心之貫^七。每一藝就。輒質於余。見其杼軸羣言。蓄余古訓^八。銀手如斷。文已有然。玉汝於成。吾滋愧矣。無何禮闈報罷。以丙辰恩科會試留京。求秋駕之方更。勤於夢寐^九。仿夏課之例益。肆其揣摩^十。都下黻冕所興。華麗相尙。大酒肥魚之社。西音東舞之場^{十二}。獨能守枯蠹之一編。避黃鸝之三請^{十二}。垂帷制勝。味道求腴。方冀健翮高盤。強臺直上。而乃懸布再登。而再墜。焦桐半死。而半生^{十三}。瓊瑰之淚盈懷。孝廉之船千里^{十四}。風雲蕩氣。烟水招魂。歸次練市。卒於舟中。年僅三十有六。余聞信悼心。遺書唁友。以爲二惠競爽。又弱一個。豈意鵠原永歎。荆樹同摧。怕傷春草之心。合作秋墳之唱。曾不旬月間。而其弟之凶耗又至矣。嗚呼。喪予祝予。徒失聲於吾黨^{十五}。食子收子。竟爽報於善人。鬼伯不仁。天道難信。哀哉。鳳詔字麗江。號心齋。仁和人。祖居紹興。以山

陰籍中甲寅科舉人。弟攀桂。字倬雲。號夢書。應本郡試。補弟子員。

【註】①楚辭。余既滋蘭之九畹兮。又樹蕙之百畝。②晉書。涼昭王傳。經史道德如采菽。中原勤之者則功多。③維摩詰經。維摩詰誰復飲食。而以禪悅爲味。④書。斷桓靈寶常慕小王。善於草法。譬之於馬。則肉翅已就。蘭筋初生。畜怒而馳。日可千里。⑤黃庭堅詩。南窗讀書聲伊吾。⑥淮南子。善學者如齊王食鷄。必食跖數千而後足。⑦列子。紀昌學射於飛衛。飛衛曰。學視而後可。昌以蠅懸於牖南面。望之三年之後。如車輪焉。乃以燕角之弧。朔蓬之藋。射之。貫蠅之心。而懸不絕。⑧韓詩。經訓乃菑畚。⑨淮南子。尹需學御。三年中夜乃夢受秋駕于師。⑩國史補。進士退而肄業。謂之過夏。執業以出。謂之夏課。⑪魏文帝銅雀臺詩。齊倡發東舞。秦箏西音。⑫黃庭堅詩。春去不窺園。黃鶴頗三請。⑬枚乘七發。龍門之桐。其根半死半生。⑭晉張憑傳。憑詣劉惔。惔延之上。坐清言。彌日留宿。至旦遣之。憑還船。須臾惔傳教覓張孝廉船。召與同載。⑮公羊傳。子路死。孔子曰。天祝予。

汪氏二節婦傳

駢文觀止（傳部）

夫奏孤鸞之舞。而觸鏡之影^一。悲。緼寡女之絲。而戛桐之韻^二。苦。故帝娥填石。志喻於海矣。漆女矢音。心貞於木矣。若夫森森苦竹。有約凌寒。落落嬌雌。相依共命^三。室家再造。憂患備嬰。如我同年友汪君輝祖之繼母王太孺人。生母徐太孺人者。尤彤史之崇徽。柏舟之奇唱也已。方兩孺人之歸尊甫南有公也。一則三商却扇。膠乃麟煎^三。一則五夜抱衾。巢先燕搆。倘使此也。挾以小凌大之嫌。彼也存以新聞舊之憾。嘻。嗃寡吉。靜好奚言。而乃繭是同功^四。樹稱交讓^五。藁砧山上。同占破鏡之期^六。荔枝江頭。不妬側生之種^七。譬之少室爲嵩高之佐命。大瀛包幼海而成淵^八。比德儷心。合愛同敬。嗚呼美矣。然而在璞之玉。匪遭刖則不珍^九。款冬之華。必經霜而始耀。乃自刀環望斷。金玦寒生。寄公之席未安^十。仙尉之棺已返^{十一}。天荒地老。月苦風酸。恨欲摩笄。身將化石。此又青陵之夢。拚隨蝴蝶而飛^{十二}。麗玉之哀。不待箜篌而奏也。徒以白髮在堂。黃口在室。屋牽蘿而待補。袖倚竹而忘寒。曲

紀姑恩。禮成褰抱。惡筭露紛。偷息將雛。齊縷秦篝。同心作苦。血隱湘娥之簀。淚穿鮫女之珠。搜盡篋而蕭然。問楹書其讀未。一燈欲燼。四目相看。剖榴房而子亦酸多。入藥店而龍真骨出。天平已酷。人何以堪。而况豆泣燃箕。穀飛爲蠱。讒人之貝錦交織。蕭牆之風鶴皆驚。生值不辰。癡難醫叔。視同舟爲吳越。處一室若參商。從牧豬奴以遊。難填欲壑。在未亡人之側。幾覆危巢。議者或謂遷地爲良。或謂越境乃免。不知蒿火暴怒。而隱而戢之者。之有其時也。漏脯止饑。而隨而禍之者。之爲更烈也。未必身居苦縣。絕少回甘。就令逼上謬臺。安能逃債。敢陳大義。敬謝高賢。今夫處困而亨者。消陽之運也。返枯爲苑者。富媪之神也。雖傷弓之鳥。曲木皆驚。而食蓼之蟲。苦心能久。於是蛩因駢走。齒借唇存。如上下弦相應者。單鳧寡鵠。如左右手交襄者。荻字熊丸。擔有千鈞。孤纔六尺。心定於水。節高若山。一旦擢蓮葍於青泥。扇蘭芬於丹谷。燭龍銜照。蠟鳳飛空。支大廈

於不傾^{三十三}得一變而已足^{三十四}。今而後喜可知已。獨是當風暮樹。靡有常甯。銜索枯魚。幾何不蠹^{三十五}。羌何心而獨活。萱無種以忘憂^{三十六}。汪君每泣語從前。痛深罔極。蓋徐孺人怛化之日。華譚猶是秀才^{三十七}。及王孺人解脫之年。杜顗纔登進士^{三十八}。烏啼子夜。猿泣庚郵。負米之願難償。視簞之悲彌切。得毋歎死而食報。而報亦終虛。生不升榮。而榮將易沫也乎。不知婦行有四。而德永於貞。不朽者三。而名歸於實。故行義表閭。桓嫫見稱^{三十九}。懷清築臺。巴婦有耀。今則輜軒揚聖善之化。朝廷下綽楔之詔。翰墨表於搢紳之倫。芳烈騰於里巷之口。斷竹續竹。幸白首之全歸。大孤小孤。共青山而不改。慈雲欲活。寶月常明。視彼金珥鐫蟬。襦衣畫雉者^{四十一}。華顯一致。而久暫殊科。不可同年而語也。

【註】①范泰鸞鳥詩序。昔鬪賓王獲一鸞鳥。三年不鳴。其夫人曰。嘗聞鳥見其類而後鳴。何不懸鏡以照之。王從其言。鸞覩形悲鳴。哀響冲霄。一奮而絕。②李詩。孀雌憶故雄。③通鑑。唐中宗戲寶從一

以老乳母王氏嫁之令從一誦却扇詩數首。十洲記。養鳳喙及鱗角合煎爲膠謂之續絃膠。④蠶書。凡兩蠶同作一繭爲同功繭。⑤左思蜀都賦。交讓所植蹲鴟所伏。注。交讓木名也。兩樹對生一樹枯則一樹生如是歲更終不俱生俱枯也。出岷山在安都縣。⑥古樂府。山上復有山。何當大刀頭。破鏡飛上天。⑦蜀都賦。側生荔枝又荔江見前。⑧史記。稗海外復有大瀛海環之四海通曰稗海。山海經注。幼海卽少海。⑨韓非子。卞和得玉璞于楚山獻厲王王以爲誑而刖其足。文王卽位使玉人理之而得寶遂命曰和氏璧。⑩儀禮注。寄公者何。失地之君也。⑪風俗通。王喬爲葉令天下一玉棺。⑫搜神記。韓憑娶妻美宋康王欲奪之憑自殺其妻陰腐其衣與王登臺自投於臺下左右攬之著手化爲蝴蝶。按。臺卽青陵臺。⑬古樂府。有姑恩曲。⑭張正見鳳棲梧詩。別有將雛曲。按。晉樂志。鳳將雛者舊曲也。⑮楚辭。秦箏齊縷鄭錦絡些。⑯白居易詩。湘竹班如血。按。博物志。舜崩二妃啼以涕揮湘竹盡班。⑰洞宴記。味勒國有人取寶於鮫宮得淚珠則鮫女所泣之珠也。⑱元稹詩。顧我無衣搜蠹篋。⑲宋樂府。讀曲歌。自從別郎後臥宿頭不舉飛龍入藥店骨出只爲汝。⑳曹

子建詩。煮豆燃豆其。豆在釜中泣。本是同根生。相煎何太急。②⑩⑪晉書王濟傳。帝每見王濟輒調之曰。卿家癡叔死未濟曰。臣叔殊不癡。②⑩⑪孔叢子。吳越之人同舟濟江中流遇風波其相救如左右手者其患同也。②⑩⑪晉陶侃傳。曰。樗蒲者牧豬奴戲耳。②⑩⑪⑭稽康養生論。嗜酒者自抑於鴆醴貪食者忍饑於漏脯。②⑩⑪⑮神仙傳。老子居楚國苦縣。②⑩⑪⑯管子。天清陽無計量地化生無法崖注清古育字天以陽氣育生萬物物生不可計量。②⑩⑪⑰國策。傷弓之鳥聞弦音烈而高飛。②⑩⑪⑱張端義貴耳集。蓼蟲不知苦蜚蟻不知臭。②⑩⑪⑲爾雅。北方有比肩獸焉與叩叩距虛比爲叩叩距虛齧甘草卽有難叩叩距虛負而走其名謂之鑿。②⑩⑪⑳西京雜記。劉道強彈琴能爲單鳧寡鵠之弄。②⑩⑪㉑家語。蘭生深谷不以無人而不芬。②⑩⑪㉒山海經。鍾山之神名曰燭龍。②⑩⑪㉓後漢書。大廈將傾非一木所能支也。②⑩⑪㉔後漢書。曹褒傳。肅宗曰昔堯作大章一夔足矣。②⑩⑪㉕家語。子路見孔子曰。銜索枯魚幾何不蠹。②⑩⑪㉖本草。獨活莖直上不爲風搖故名獨活。又詩。傳萱草令人忘憂。②⑩⑪㉗晉書華譚傳。太康中刺史稽紹舉譚秀才。②⑩⑪㉘唐杜凱傳。凱字勝之幼病日母禁其

進士^③^④^⑨桓嫠見孟恭人墓誌銘。^④^⑩歸田錄。江南有大孤山小孤山而世轉孤爲姑故白居易詩云。山分大小姑。^④^⑪江總南木槿賦。趙女垂金珥燕姬抽寶珎。

【銘誄部】

誥封資政大夫常德府知府張古香墓誌銘

夫禮樂之士敬容。仁義之賢貴際。說學之吏毋害。慕古之儒絕俗^二。四者非牟而難知。實驗之有遂。是以先王端本於庠序。非進士不使治民。聖人莞爾於絃歌。必讀書然後爲學^三。如吾友張古香者。誠其選矣。公諱開士。字軼倫。浙之仁和人。五世壙僚。一門穆行^四。恭同機汜。夏日行陽。惠似黔敖。祿年施粥^五。此爲仁不富。世濟其美之效也。公生而孤露。幼有異徵。應劭懸弧。神光照社。虞延墮地。白氣升天。陸太夫人育而教之。以席爲門。編蒲作筆。澤四經而誦學。沿八索以披圖^六。忘

失猪羣。有承宮之苦。不知馬足。有朱穆之專。^七索冥則腸胃欲流。詣微則雷霆不^八入。余嘗同寓帝里。見攬韋編。^九雖屈元辰。依舊申旦。不覺嘆曰。溺苦於學。乃至是乎。公方以家少通書。朋無都養。^十復假館於劉智海。借冊於元行冲。^{十一}將瓜鎮心。把卷升屋。^{十二}不自覺其綿惓也。乾隆丙辰舉人。壬戌進士。無須覓覺。奪樊川之五名。高宴慈恩。步芳林之十哲。^{十三}天子召見。授銅陵知縣。銅陵者江南凋劫之鄉。皖上臬離之地也。^{十四}公解巾赴郡。露冕班春。^{十五}土辨五施。杜松蚡菴悉墾。山開九削。鬱棲陵^{十六}鳥無荒。文翁入都。常餽博士。何武到郡。先詣學宮。^{十七}邑大災。公請賑於巡撫范公。范有難色。公袖印再拜。願乞骸骨。范驚許之。蕭育是杜陵男子。言罷拂衣。汲黯非河內使臣。便宜從事。^{十八}時間親王總督兩江。聞之獎慰。奏調桐城。邑之人耆艾擔軫。壺漿祖道。崔戎離華。合郡持靴。楊君去繁。^{十九}頻年輦粟。未足方斯遺愛。匹此謳思。^{二十}桐城盜張六韜。誘某刼叔。轉誣爲魁。公超雪之。六韜臨刑悔曰。毋若某

之昧心以陷人也。西市禮佛。囚就死以心甘。東海覆盆。民懽呼而天雨。不圖此日。重見高風。他若察稻微芒。鞭絲見鐵。履田而起髦士。拔薤而弱強宗。都可編作州書。垂爲縣譜。大學士張文和公。桐人也。謂鄂相國曰。吾鄉張明府。今之龔黃。爲公門下得人賀矣。調南陵。擢宿州知州。時黃河灌城。黑蜢肆虐。竈居樹上。屋隱蘆中。公大餽國人。自程畚築。流庸廣汎舟之役。淖糜設續命之湯。鳳勅未頒。發棠已請。魚符乍下。振廩先空。昇疫者於公堂。蔭喝人於樹下。不顧上池藥貴。長府錢荒。有爲後慮者。公愀然曰。苟活民。雖破吾家。吾之願也。居亡何。天子發水衡百萬治河。公感激益奮。乃乘皮船。渡木罌。排梗湍。淪畎澮。王尊立水。三版不沈。史起穿渠。一鍾盡穫。至今鴻陂媚帝。蟹堞宜禾。竟障浮山。無堙息壤。公有力焉。兩江總督宮傳高公。兩薦公可太守。天子授常德府知府。詔甫下而太夫人卒。公本純孝。至是毀哀。子春食旨不甘。曾無一溢。崔九風吹卽倒。何待三

年終服葬親。竟以不起。年五十九。嗚呼痛哉。公以叔寶之神清。兼仲宣之體弱。

幼而學也。鐵搗竹素。都爲咯血之由。壯而仕也。穀賊風蝗。盡是傷生之物。加以

食無過菜。衣半穿空。精久消亡。年登大董。一旦蘭陔泣血。蓼莪廢詩。其何以取

目南離。收魂北極也哉。然而九重方召陽城。半途捐館。峴首未迎羊祜。何處刊

碑。善人云亡。海內痛之。子敬持秀出班行。潛躬味道。有趙衰之文。少連之孝。以

某月某日葬公於留下守樂山禮也。大夫之墓樹欒。此日我思隨會。寢邱之旁

立廟。他年人祀叔孫。銘曰。

我友古香。真想在衿。少不拾遺。待人還金。義心清尙。聲蜚士林。及腰銀艾。公然

健者。能治六雄。以終五馬。山甫將明。諸葛奇雅。曾賑姑熟。救民水火。移牧和州。

公曰不可。命重在民。爵輕在我。屢持玉尺。平章人文。捧出明珠。光於天門。有弟

槃槃。毋侗好逸。代公主進。不傷折閱。有壻悖悖。實惟我甥。先公怛化。公難爲情。

傷哉死孝。當景收蘭。黃堂未居。白骨先寒。^{四十六}我爲立傳。再銘華表。彷彿劉寬。兩碑
^{四十七}更好。

【註】①莊子。禮樂之士敬容仁義之士貴際。②左傳。葬曹平公往者見周原伯焉與之語不說學。漢百官志。遣毋害吏。後漢鍾皓傳。皓兄子瑾好學慕古有退讓風。又郭林宗傳。隱不違親貞不絕俗。③王制。大樂正論造士之秀者。以告於王而升諸司馬曰進士。司馬辯論官材論進士之賢者以告於王而定其論。論定然後官之。任官然後爵之。位定然後祿之。論語。子之武城聞絃歌之聲。夫子莞爾而笑。又何必讀書然後爲學。④韋少翁自劾詩。五世墮僚至我節侯。⑤說苑。魯有恭士名曰機汜。行年七十其恭益甚。逸周書。譬若冬日之陽夏日之陰不召而民自來。檀弓。齊大饑黔敖爲食於路以待餓者而食之。⑥管子。孝弟者仁之祖也。忠信者交之慶也。內不考孝弟。外不正忠信。澤其四經而誦學者是仁其身者也。左傳。是能讀三墳五典八索九邱。穆天子傳。天子西登崑崙之邱。至羣玉山披圖視典先王之所謂冊府。⑦後漢承宮傳。宮少孤八歲爲人牧豕。續漢書註。宮過徐子盛好之因

棄其猪而留聽其經猪主怪其不還求索得宮欲答之門下生共禁之因留之。又朱輝傳。朱穆字公叔。耽學銳意講誦。或時思至。不自知忘失衣冠顛墜坑岸。其父嘗以爲專愚。幾不知數馬足。⑧五代史王仁裕傳。仁裕爲人俊秀。以文詞知名。少夢剖腸胃。以西江水滌之。見江中沙石皆爲篆籀之文。由是文思益進。南史祖暅之傳。暅之有巧思。入神之妙。般倕不能過也。當其詣微之時。雷霆不能入。⑨杜詩。無錢居帝里。史記孔子世家。孔子晚而喜易。序彖繫象說卦文言。讀易韋編三絕。曰。假我數年。若是我於易。則彬彬矣。⑩史記賈誼傳。賈嘉最好學。世其家。與子通書。漢書倪寬傳。寬詣博士受業。孔安國貧。無資用。嘗爲弟子都養。⑪北史劉焯傳。武強交津橋劉智海家。多墳籍。焯就之讀書。向經十載。唐書。元澹字行沖。先是馬懷素。撰書志。褚無量。校麗正四部書業。未卒。相次物故。詔行沖並代之。⑫南史鄭灼傳。灼常蔬食。講授多苦心。熱若瓜時。輒偃臥以瓜鎮心。起便誦讀。又江泌傳。泌少貧。夜讀書。隨月光光斜。則握卷升屋。睡極墮地。則更登。⑬宋黃洽傳。若宰執臺諫。不爲人覓舉。覓覺似係覓舉之誤。辛氏三秦記。杜曲在韋曲之東。近樊川。杜岐公別墅。岐公孫牧嘗曰。吾得老

爲樊川翁有文章數百號樊川集顧草木禽魚亦無恨矣。雲翔十人交通權貴號芳林十哲。⑩④一統志。銅陵屬江南池州府。丹鉛錄。魏志蔣濟疏凋劫之民葛洪字苑劫作鰕九僞反顏氏家訓人問蔣濟書云。弊劫之民何字余曰意劫卽鰕倦之鰕耳。陸機疏。自關而西謂梟爲流離。⑩⑤華陽國志。郭賀爲荊州刺史明帝賜三公服敕行部去襜露冕使百姓見之以彰有德。後漢書崔駰傳。強起班春。⑩⑥大平寰宇記。九華山在池州青陽縣南廿里。舊名九子山。李白以爲九峯有如蓮花削成。故改名九華山。莊子。生於陵屯則爲陵烏陵。烏得鬱棲則爲烏足烏足之根爲蟪蛄其葉爲蝴蝶。⑩⑦漢文翁傳。景帝時爲蜀郡守好教化見蜀地僻陋有蠻夷風乃選都縣小吏張叔等十餘人遣詣京師受業博士減省少府用度買刀布蜀物齎計吏以遺博士。又何武傳。武爲刺史行部必先卽學宮見諸生試其誦論問以得失。⑩⑧漢蕭望之傳。子育爲茂陵令召詣後曹常以職事對育曰。蕭育杜陵男子何詣曹也。後漢孔融傳。明日便當拂衣而去不復朝矣。漢書汲黯傳。河內失火燒千餘家上使黯往視之。還報曰。家人失火屋比延燒不足憂。臣過河內河內貧人傷札旱萬餘家或父子相食。

臣謹以便宜持節發河內倉粟以賑貧民請歸節伏矯制罪上賢而釋之。⑩⑨隸釋繁陽令楊君碑。吏民攀轅老弱輒輸追慕跋涉蓋二千餘人續留守闕上書歷年運穀萬斛助官賑貧以乞還君自非慈愛孰能若茲。⑩⑩左傳。子產卒仲尼聞之出涕曰古之遺愛也。漢班固序傳。今民皆謳吟思漢鄉仰劉氏。⑩⑩⑩唐韋仁壽傳。仁壽性寬厚初爲蜀郡司法書佐所論囚至市猶西向爲仁壽禮佛然後死。抱朴子。是責三光不照覆盆之內也。漢于定國傳。東海有孝婦少寡無子養姑甚謹及後姑自經死姑女告吏誣婦殺母。孝婦自誣伏于公以爲此婦養姑十餘年以孝聞。必不殺也。太守竟論殺婦郡中枯旱三年後太守至卜筮其故殺牛自祭孝婦塚天立大雨。⑩⑩⑩南齊傳炎傳。炎父子並著奇績江左鮮有匹云。諸傳有治縣譜子孫相傳不以示人。古文苑。酈炎遺令書我十七而作酈篇二十四而州書矣。二十七而作七平矣。⑩⑩⑩史記趙世家。智伯攻晉陽歲引汾水灌其城城不沒者三版。淮南子。犧牛騂毛宜於廟牲其於致雨不若黑蜺。⑩⑩⑩漢霍光傳。顯夢井水溢流庭下竈居樹上。吳越春秋。蘆中人豈非窮士乎。⑩⑩⑩漢昭帝紀。民匱於食流庸未盡還。左傳。秦輸粟於

晉自雍及絳相繼命之曰。汎舟之役。漢文帝紀註。鬻淖糜也。崔鴻十六國春秋。盧循遣劉裕益智粽。裕報以續命湯。⑩⑥鄴中記。石季龍詔書用五色紙著鳳口中曰鳳敕。孟子。齊饑陳臻曰。國人皆以夫子將復爲發棠。隋文帝紀。開皇元年頒木魚符於總管刺史雄一雌一。唐車服志。高祖頒鹿符後改銅魚符以起軍旅易守長。左傳。自廬以往振廩同食。⑩⑦史記扁鵲列傳。乃出其懷中藥以與扁鵲飲以上池之水。論語註。長府魯藏名。宋史。歐陽修乞不受羨餘錢劄曰。淮甸近歲號爲錢荒。⑩⑧水經注。鴻河巨瀆故應不爲細梗躋湍。書。濬畎澮距川。⑩⑨漢王尊傳。遷東都太守河水盛溢泛浸瓠子金隄尊使巫策祝請以身填金隄因止宿廬居隄上吏民數千萬人爭叩頭救止尊終不肯去及水盛隄壞吏民皆奔走惟一主簿泣在尊旁立不動而水波稍却回還。⑩⑩漢翟方進傳。奏罷鴻隙大陂。說苑。蟹堞者宜禾汗邪者滿車。⑩⑪山海經。竹山西百二十里曰浮山。山海經。洪水浮天鯀竊帝之息壤以堙洪水不待帝命令祝融殺鯀於羽郊。⑩⑫檀弓。樂正子春之母死五日而不食。儀禮。喪服朝一溢米。北史崔鑣傳。喪母居喪哀毀骨立人云崔九作孝風吹卽倒。⑩⑬

③晉衛玠傳。玠字叔寶。風神秀異。或問杜又可方衛洗馬否。劉琨曰。宏治膚清。叔寶神清。魏文帝與吳質書。仲宣獨自善於詞賦。惜其體弱。不足起其文。至於所善。古人無以遠過也。④論語。比考識。孔子讀易。韋編三絕。鐵撻三折。漆書三滅。李商隱獻舍人河東公啓。韋編鐵撻。屢聞斷折。管子。田中有木者。謂之穀賊。宋史五行志。天禧元年六月。江淮大風。多吹蝗入江。⑤史記刺客傳。田光曰。今太子聞光盛壯之時。不知臣猜已消亡矣。又倉公傳。脈法曰。年六十以上。氣當大董。⑥東晉補亡詩。循彼南陔。言采其蘭。詩序。南陔。孝子相戒以養也。檀弓。高子臯之執親之喪。泣血三年。未嘗見齒。晉書王褒傳。褒痛父死於非命。讀詩至哀哀父母。生我劬勞。輒執書痛哭。受業者爲之廢蓼莪詩。⑦唐陽城傳。貞元十四年。貶爲道州刺史。順帝卽位。追赴京師。未聞追詔。而卒。士君子惜之。鮑昭詩。晨登峴山首。晉羊祜傳。祜卒。襄陽百姓於峴山祜所遊憩之地。建碑立廟。歲時享祀焉。望其碑者。莫不流涕。杜預因名爲墮淚碑。⑧韓愈太原王公神道碑。秀出班行。每動帝目。吳書。劉絳子基。遭多難。潛處味道。不以爲戚。⑨春秋緯。天子墳高三仞。樹以松。諸侯半之。樹以柏。大夫

八尺樹以欒。士四尺樹以槐。庶人無墳。樹以楊柳。檀弓。我則隨武子乎。④⑩陶淵明始作鎮軍參軍。經典阿詩。真想初在衿。司馬相如封禪書。蜚英聲騰茂實。吳志魯肅傳。交遊士林。魏管輅傳。吳季札道逢男子。五月披裘采薪於道。不拾遺金。④⑪後漢張奐傳。遺命曰。吾前後仕進。十腰銀艾。又袁紹傳。紹勃然曰。天下健者。豈惟董公。唐百官志。議定天下州府爲兩輔六雄十望十緊及上中下之差。遜齋閒覽。漢時朝臣出使。以駟馬太守增一馬。故曰五馬。詩。肅肅王命。仲山甫將之。邦國若否。仲山甫明之。蜀志諸葛亮傳。身使孫權求授吳會。權旣宿服。仰備又覩亮奇雅。甚敬重之。④⑫姑熟地名。今屬太平府。④⑬李詩。仙人持玉尺。費君多少才。梁書李孺傳。七歲能屬文。叔父瑱謂家客曰。此兒我家之明珠也。淮南子。乘雲車。排闥闢關。淪天門。④⑭續晉陽秋。語曰。大才槃槃。謝家安。漢廣陵厲王胥傳。毋侗好逸。史記高祖紀。蕭何爲主吏。主進荀子。良賈不爲折閱。不事。④⑮左傳。祈招之愔愔。式昭德音。莊子。俄而子未有病。喘喘然將死。其妻子環而泣之。子犁往問之。曰。叱避無怛化。④⑯晉王戎傳。劉毅曰。和嶠雖寢苦食粥。乃生孝耳。至於王戎。乃爲死孝。緇素雜記。天子曰黃。

闕三公曰黃閣給事舍人曰黃扉太守曰黃堂。④①⑦山堂考索。陳壽不爲丁儀丁廙立傳。續搜神記。遼東城門華表柱忽有白鶴來集。金石錄。寬有兩碑皆在洛陽上東門外。

羅兩峯墓志銘

君姓羅。名聘。字遯夫。號兩峯。世居歙之呈坎村。其二十一世祖乾宗公。始遷於揚。考愚溪公。應雍正辛卯武鄉試。中式舉人。有子五人。君其第四子也。幼遭孤露。長更博聞。通畫學十三科。讀奇書五千卷。時揚州馬嶰谷半查兄弟。開設壇坵。號召賢流。君以波瀾叻縱之才。值文酒風馳之會。蘭言自馥。松格彌高。獨師事吾杭金冬心先生。畫佛畫梅。皆出其指授。小詩亦逼肖之。又眼有慧光。洞知鬼物。煩冤地下。開變相之圖。有美山阿。寫離騷之狀。所製鬼趣圖一卷。栖毫甫竟。題翰已多。如蔣心餘先生。程魚門編修。諸作。尤膾炙人口。云。生平游跡所經。如越如楚。如齊如豫。如燕趙。山郵往復。波路參差。片席移雲。孤燈召夢。發余懷

之鬱勃。觸古事之蒼涼。不食者武昌之魚。可語者韓陵之石。數聲名於洛下。爭
唱檀來。邀禮遇於燕臺。請從隗始。嘗三遊都下。一時王公卿尹。西園下士。東閣
延賓。王符在門。倒屣恐晚。孟公驚座。覲面可知。所主者。如英竹井相國。翁覃溪
周載軒。余秋室諸前輩。並皆名賢碩德。送抱推襟。余亦得侍清談。時邀光接。見
其三升酒盡。十丈縑橫。山水方滋。雲烟相亂。或奚童易飽於一炙。或外國購價
以千金。酣嬉淋漓。無所遑惜也。然而一身道長。半世饑驅。人海浮沉。堂蓑偃蹇。
碧草綠波之賦。黃蘆苦竹之吟。溽雨歇而元蟬鳴。繁霜飛而涼雁叫。青苔及榻。
緇塵染衣。腰減帶長。髮疎簪重。死喪之戚。過向子期之生平。羈旅之年。已王仲
宣之踰紀。客何爲者。能不傷乎。比年以來。思歸綦切。而質衣欲盡。債帖難償。未
之能行也。會兩淮曾賓谷都轉。與君舊交。寄以資斧。俾其子迎還。得休倦鳥之
飛。幸遂首禾之願。余亦主講安定書院。間裁赤牘。用寫悃勤。每顧索郎。思同旅

語。方謂青氈道故。白首如新。豈知老洳波難。^{二十四}斜光暝易。會無一載。別卽千秋。能不悲哉。君夙耽禪理。悉究竺墳。^{二十五}一喝醒人。勝打頭之棒。^{二十六}十年契飯。愛折脚之鎗。^{二十七}嘗夢入一招提。^{二十八}榜曰花之寺。髣髴前生。卽其主僧。後遂號花之寺僧。鐫印識之。證漁洋之舊聞。踵圓澤之往事。因緣不昧。智慧有徵。在京師余嘗訪之。琉璃廠觀音閣下。向鐙王而借席。與彌勒而同龕。布薩森嚴。羸提無悶。^{二十九}巾瓶淨契。花水澄觀。雖僧迦湛志於苦空。^{三十二}釋子希心於止觀。^{三十三}弗之過已。所著香葉草堂詩一卷。一株柏樹。祖師之意可參。萬本梅花。處士之魂斯託。余喜其天懷刻露。神詣幽微。旣爲序而傳之。外此有正信錄諸書。多識前言。時呈新藻。類皆怪奇偉麗。鏗耀人間。所惜緝柳雖勤。^{三十四}編蒲未竟。^{三十五}莫能寫定也。至性友于。傷心中折。棣萼之華不耀。人琴之痛方深。^{三十六}比歸而更值三兄秀峯公之喪。逢此百罹。又弱一個。衰顏慘淡。老淚飄蕭。風乍急於鵲原。日已斜於鵬舍。仙龕遽築。家簣難延。^{三十七}踰秀峯公

之亡曾不數月遂以不起嗚呼哀哉君生於雍正十一年正月初七日子時歿於嘉慶四年七月初三日子時年六十七歲娶方氏名婉儀安徽歙縣人生於雍正十年六月廿四日以與荷花同日生也遂自號曰白蓮著有白蓮半格詩行世先君二十年卒雜佩以贈成夫子之賢彤管有貽列女士之表其貞行已詳其傳志中茲不具述子二人長允紹出繼爲伯兄咸萬公嗣次允瓚皆能以畫世其家學者孫三人以嘉慶四年十一月十二日葬於甘泉縣西鄉小胡家廠歙超之亡作誄者四十三十八林宗之葬執紼者數千三十九而令子允紹等以余爲知君之深獨以斯文見託謹徵素履用表貞珉銘曰

不隱不仕亦禪亦仙酒破詩械情深畫緣千載而後欲知此賢身爲梅花妻爲白蓮。

【註】①輟耕錄。宋元時畫學有十三科。②北史。崔儼大書其戶曰不讀五千卷書者無得入此室。③

晉書庾亮傳。贊筆敷華藻。吻縱波濤。④南史。智者法師曰。無量壽經云。慧眼見真。⑤楚辭。煩冤督容。實沛徂兮。⑥西陽雜俎。常樂坊趙景公寺東壁上。吳道元畫地獄變相。筆力勁怒。變狀陰怪。觀之。不覺毛豎。⑦楚辭。山鬼若有人兮。山之阿被薜荔兮。戴女蘿。⑧南史庾子山傳。或問北方人士何如。曰。祇韓陵一片石。差堪共語。按。謂溫子昇韓陵碑文也。⑨五代史。南唐世家。周師數萬。水陸齊進。軍師作檀來之歌。聲聞數十里。⑩史記。燕昭王招賢。郭隗曰。王必欲致士。請先從隗始。⑪後漢書王符傳。後度遼將軍皇甫規解官歸安定。白王符在門。驚遽而起。衣不及帶。屣履出迎。⑫前漢書陳遵傳。遵字孟公。所到衣冠懷之。惟恐在後。時列侯有與遵同姓字者。每至人門。曰。陳孟公座中。莫不震動。既至而非。因號其人曰陳驚座。⑬玉篇云。遴與吝通。⑭江淹別賦。春草碧色。春水綠波。送君南浦。傷如之何。⑮白居易詩。黃蘆苦竹遶宅生。⑯梁武帝責賀琛。敕昔腰腹過十圍。今之瘦削才二尺餘。舊帶猶存。非爲妄說。⑰楊奐詩。髮疎簪更重。⑱向秀字子期。有思舊賦。⑲王粲字仲宣。其賦云。歷春秋以踰紀。行復出於斯鄉。⑳㉑方回詩。持于富人肆。詎肯出質帖。㉒㉓淮南子。

夫子見禾之三變曰。狐鄉邱而死我其首禾乎禾穗垂而向根君子不忘本也。②⑩②漢書。陳遵瞻于文詞善書與人尺牘人皆藏弄以爲榮。按。王本作赤牘疑誤。②⑩③物詩。濡毫意僊僊一用寫情勤。②⑩④莊子。其厭也如緘以言其老洫也。②⑩⑤姚廣孝詩。竺墳五千卷。②⑩⑥傳燈錄。忻州打地和尙學者致問惟以棒打地。②⑩⑦傳燈錄。無業禪師曰。看往古得道人得意之後茅茨石室向折脚鐺子煮飯喫過三十年。②⑩⑧釋氏要覽。招提即今十方住持寺也。②⑩⑨褚遂良書。久弃塵世與彌勒同龕。②⑩⑩淨住子序。外國云布薩此云淨住亦名長養亦名增進。②⑩⑪法界次第羈提華言忍辱。②⑩⑫張籍詩。時到僧房問苦空。②⑩⑬金陵語錄。定慧爲菩薩止觀爲佛。②⑩⑭楚國先賢傳。孫敬在太學編柳爲簡以寫經。②⑩⑮漢書。路溫舒取澤中蒲截以爲牒編用寫書。②⑩⑯晉書王徽之傳。獻之卒徽之取琴彈之久而不調歎曰嗟乎子敬人琴俱亡。②⑩⑰唐書祝欽明傳。獨保腰須死家簪。②⑩⑱晉書敍超傳。超所交皆一時秀美及死之日貴賤操筆而爲誄者四十餘人。②⑩⑲後漢書郭泰傳。字林宗卒時年四十二四方之士千餘人皆來會葬。

孟恭人墓誌銘

嘉慶三年。余主講揚州。值李君逢春。來攝郡篆。清風入誦。甘澤興謠。廉春羽於桑郵。削秋荼於棘戶。孝經一卷。用代韋紃。政要三條。如陳圭臬。竊謂甘泉畫像。不忘法度之遺。官禮傳書。乃著宣文之號。賢如太守。必有自來也。既受代去。不數月。遭母太恭人之喪。陟屺之痛。方深。歸窆之期。斯卜。介其宗人。教授君保泰。以狀來。乞余銘。余受而讀之。始知恭人體季蘭之姿。稟先姑之訓。達恭儉均一之旨。肆德象女師之篇。居嗇而安。奉榮惟約。其所以養成令器者。蓋有道焉。不可無述已。按狀恭人姓孟氏。著籍漢軍。仍世仕族。年二十一。歸贈君詠庵公。爲繼室。善心爲窈。而娣姒以和。祥女入門。而僕媼皆喜。既容既德。宜室宜家。時韓太恭人在堂。以行義之桓。嫠得扶風之子。婦姑恩制曲。潤灑慈雲。女誠裁章。誠通孝水。晨見升堂之乳。夕聞隔戶之棋。憂以萱忘。寒惟竹倚。燂湯緝典。上履修

儀。凡侍奉者幾三十年如一日焉。初詠庵公因先世占旗籍爲護軍。會裁汰民人入旗者。改宛平籍。旣歸戶版。並歇身糧。八口常饑。數椽磨定。恭人茹牛衣之泣。銜雁戶之悲。折箸代簪。牽蘿補屋。荒鷄夜半。刀尺猶聞。深雪天寒。樵蘇不爨。莫不拓艱難於棘手。貯辛苦於荷心。而舉案之風。無違夫子。折蓼之教。用啓後人。內政秩然。閭德斯諒。夫剝然後復。驗之碩果之爻。塞極必通。兆始蒙泉之象。自太守困鱗得水。健翮乘風。兒寬因從史知名。^{十三}江以革參軍見賞。^{十四}大江東去。仙鶴南飛。畫舫遙迎。板輿親捧。雖頻年冷宦。未改儒酸。而一路順風。早看帆正。迨至雷封報最。露冕行春。^{十五}張孟遷階。上壽北第。^{十六}汝南持節。待袂洛濱。可謂榮矣。^{十七}乃恭人轉因致養之隆。彌怵思謙之訓。往往觸挽前事。追念故綦。蘆被寒多。糠燈焰小。未嘗不淚涔涔下也。是以太守每歷一官。必以平反爲最。每進一秩。必以盛滿相提。芑野矢音。則惠行彫勅。貪泉示戒。則潤謝脂膏。要使白水旌心。蒼生

飲福。而身被九升之布。日餐小甲之蔬。整設藤蒲。澄觀花水。受持千偈。身前已證淨因。生活萬人。膝下亦稱佛子。非所謂緣兼福德。行備孝慈者歟。宵魄寢輝。秋霜告肅。感林柯之薦響。傷慈竹之落陰。以嘉慶三年九月十日。歿於揚州行館。年七十有七。誥封恭人。長子逢春。江蘇海門直隸同知。陞徐州府知府。次子逢年。候選州同知。將以明年二月扶柩北歸。葬於某原禮也。嗚呼。故里言旋。賢墳永式。風吹斷杼。堪尋孟氏之隣。心慰寒泉。待述瀧岡之表。爲之銘曰。

亮哉母儀。稟自婦式。健乃持門。柔能盡職。姑慈以甘。娣下以色。含德之英。爲中外則。匏有苦葉。灤有困鱗。衣單耐冷。屋破棲貧。落毛紡夜。空瓶汲晨。撫今悼往。咀酸吮辛。苑枯豈常。蘭玉蔚起。崔邠導輿。班昭就子。^{十六}齒被在公。^{十九}饘蔬約己。福不唐捐。善有餘喜。劬躬致瘁。懷恩實多。哀纏邦水。淚溢江波。落日桑梓。寒風薜蘿。彤管有煒。玉版不磨。

【註】①鹽鐵論。秦法繁於秋荼網密於凝脂。②唐韋景駿傳。爲貴鄉令有母子相訟者景駿授孝經使習大義。③晉劉頌傳。政務多端難遍以疏舉振領總綱要在三條九政欲靜倉廩欲實爲政欲著信。④漢金日磾傳。母教誨兩子有法度上聞嘉之圖畫於甘泉宮日磾見畫常拜向之涕泣。⑤晉書。韋逞母宋氏時年少宋氏晝則樵採夜則教逞逞遂學成名立仕苻堅爲太常。⑥班昭女誡。有女師德象篇目。⑦唐盧徹爲吉州刺史一女有幽間之德馬暢求之卜者曰祥女入門而僕御皆喜公姑遂皆賀之。⑧後漢書列女傳。沛劉長卿妻者同郡桓鸞之女也生一男長卿卒妻慮不免乃刑其耳以自誓。⑨後漢書列女傳。扶風曹世叔妻者同郡班彪之女也名昭作女誡凡十六篇子婦丁氏爲撰集之又作大家讚。⑩西征賦。澡孝水而濯纓嘉美名之在茲。⑪唐書。崔澹曾祖母長孫氏年八十無齒不粒食祖母唐夫人至孝每旦梳洗拜姑於堂下卽升堂乳其姑。⑫漢書王章傳。章爲諸生學長安疾病無被臥牛衣中與妻訣涕泣。⑬漢書兒寬傳。除爲從史會廷尉有疑奏已再見却矣掾吏莫知所爲因使寬爲奏讀之皆服。⑭南史江革傳。字休映濟陽考城人也建安王爲雍州

刺史表求管記以革爲征北記室參軍。④⑤華陽國志。郭賀字喬卿爲荊州刺史有殊政明帝到南陽巡狩賜三公服制行部去襜露冕使百姓見之以彰有德。④⑥後漢書張酺傳。酺雖在公位而父常居田里酺每有遷職輒一詣京師常來候酺適會歲節公卿罷朝俱詣酺府奉酒極歡卒日人皆慶羨之。④⑦晉書汝南王亮傳。母伏太妃有小疾被於洛水亮兄弟三人侍從並持節鼓吹震耀洛濱武帝登凌雲台望見曰伏妃可爲富貴矣。④⑧文選東征賦注。曹大家集曰子穀爲陳留長大家隨至宮作東征賦。④⑨范曄後漢書輿服志。公卿列侯中二千石二千石夫人紺繒黃金龍首銜白珠。

林編修誄

維乾隆丙申秋九月初六日。清故承德郎翰林編修侯官林君卒。嗚呼哀哉。昔赤靈佐命。遠疏平棘之封。綠錯傳經。高議石渠之上。國乘光於領聞。家牒襲於緜世。父諱英茂。山陰知縣。桃街清禁。棠政流美。君以支子爲叔父嗣。禮也。少男

彭祖。繼張侯之封。後子伏恭。世齊詩之學。君諱樹蕃。字子宣。羈負夙成。岐嶷早
異。馬客卿六歲酬賓。黃子炎七齡對日。百畝垂蔭。擢潭根之初莖。九里被潤。導
靈河之枝。持中學心聽。上智日成。稷嗣粦人。潁川涉獵。縵橐百氏之說。斧藻六
朝之文。既志勵緯蕭。亦藝勤緝柳。歲乙酉。鄉舉中式。辛卯成進士。廣森與同榜
焉。君蓋逾方朔獻書之歲。僕初履叔皮著論之年。三齒已長。執敬雁行。六載同
官。趨陪鵷序。因共朝夕。逮觀終始。君動爲善棟。禮用闕郵。四徹中繩。三雜若矩。
言有壇宇。而未嘗臧否於人。行有坊表。而未嘗踳跂爲義。嗟乎。豈無百鷺。諤諤
者斯希。亦有五錐。鈇鈇者必挫。偶影難獨。衆和易同。亭伯階高。日倒通侯之履。
君卿門小。雨露從者之衣。而君恥彼造緇。戒於奪赤。翹材之館。自絕芝帷。修刺
之家。未餐蔥葉。所謂招之不來。麾之不去。當求之於古人。鮮遇之於今日者也。
甲午秋試。奉詔爲浙江副考官。一封軺傳。八月輜軒。回選儒臣。誰差多士。君提

衡允望。砥節首公。竿牘不行。苞苴無謁。耕柱遊楚。遺金必卻。正禮在梁。餉錢爲
怒。是以陸賈南使。未有千金之裝。貢禹西征。先賣百畝之產。介性至已。端操異
已。君室如懸磬。家惟祇裯。二二三董少平之敝車。揚子雲之儋石。二二四貧豈非病。憂能傷人。二二五
重以洗馬神清。侍中體弱。二二六自分職三閣。典司四部。二二七編削旣勤。員程無曠。二二八心深力
淺。簪短帶長。遂嬰戚於伊年。卒沈繇於美疢。二二九三門九宅。兼違築蓋之凶。五苦六
辛。莫覘劇易之效。三三〇至於眠繭啓足之際。屬續聽息之辰。三三一清明在躬。平度無改。三三二發
言不及於先令。內顧靡戀於妻子。死生有命。不其達歟。然而少婦零青。高堂戴三三三
白。遺孤在腹。難卜維熊。黝女扶牀。未占射雀。三三四中郎有琰。雖家緒之可傳。當戶生
陵。庶將軍之有後。三三五情瀾不竭。遺恨終多。溫序死而魂欲歸。荀偃沒而目猶視。嗚
呼哀哉。廣森與君。居嘗連境。行亦離載。志協壘簷。言投水石。三年之字。未滅於
懷袖。九言之贈。猶存於巾篋。而永辭官牒。遽執鬼中。三三七獲人亡而輟斤。鍾期逝而

息引。寢門之哭。於禮斯宜。宿草之痛。非子誰爲。况君本羈孤。柩將歸薄丹旄。一
去。白雲千里。寄縑二匹。空慕於往哲。過車三步。有待於他年。尤離合之殊感。朋
友之極艱也。禮諡以易名。誄以表行。爵非有諡。誄何作焉。然文中貞節。青簡有
私諡之法。孝若仲武。黃門多述哀之詞。敢援斯義。而爲之誄曰。金飆北轉。玉衡
西遷。小榆兆節。長柳占愆。芳薰秀萎。朗撲摧堅。嗟我良執。值此週年。嗚呼哀哉。
貧瘁爾躬。官勞爾心。南瞻孝永。北出憂深。偏枯倍劑。嫫媿何斟。懷才怛化。齎志
湮沈。嗚呼哀哉。美製拳華。殊裁韞櫝。一曙云亡。十典誰續。聽笛嵇鄰。鳴琴阮曲。
繼杖含悲。宋寮隕哭。嗚呼哀哉。牀塵鼠跡。庭絕驢鳴。誼親羊左。痛感殤彭。仰念
民母。旁瞻俊兄。魂歸閩海。形滯燕城。嗚呼哀哉。道布垂筵。問車在砌。京兆新阡。
西州舊第。遺像窈冥。精靈髣髴。楚挽流聲。蘭交洵涕。嗚呼哀哉。存亡隔世。哀樂
中年。孰愚而壽。或夭而賢。大道如此。予復何言。子宣逝矣。逝矣子宣。嗚呼哀哉。

【註】①漢書郊祀志。南方炎帝赤靈祝融時。又高惠高后文功臣表。平棘懿侯林摯以客從起亢父。斬章邯所置蜀守用燕相侯千戶七年封。軒轅紀。黃龍負圖而出於河其圖五色畢具白圖蘭葉而朱文以授黃帝帝乃名曰綠錯圖。②漢書揚雄傳。君子純終領聞。宇文適庾信集序。國史家牒世莫詳焉。水經註。世代緜遠難以詳矣。③漢書張安世傳。兄賀無子子安世少男彭祖宣帝封彭祖爲陽都侯。後漢書儒林傳。湛弟黯字稚文以明齊詩改定章句作解說九篇。④詩。克岐克嶷。⑤後漢書馬援傳。子客卿年六歲能應接諸公專對賓客。又黃琬傳。字子炎建和正月日食京師不見祖父瓊時爲魏郡太守以狀聞太后詔問所食多少瓊思其對而未知所況琬年七歲在傍曰何不言日食之餘如月之初。⑥抱朴子。結根於泰岱者雖竦蓋千仞垂蔭百畝而莫之知也。管子。潭根之無伐。莊子。河潤九里澤及三族。穆天子傳。以飲於枝特之中。⑦文子。上學以神聽之學在骨髓矣中學以心聽之學在肌肉矣。陳後主與江總書。觸目成誦。⑧漢書叔孫通傳。漢王拜通爲博士號稷嗣君。法言。或問叔孫通曰。槩人也。漢書賈山傳。潁川人祖父祛故魏王時博士弟子也。⑨漢書敘傳。緯六經綴道。

綱總百氏贊篇章。法言。吾未見斧藻其德如斧藻其粲者。小學紺珠。六朝吳東晉宋齊梁陳。①莊子。河上有家貧恃緯蕭而食者。梁書王僧孺傳。照螢映雪編蒲緝柳。②漢書東方朔傳。朔初來上書曰臣朔年二十二。後漢書班彪傳。字叔皮沈重好古年二十餘著王命論。③禮記。兄之齒雁行。左傳。同官爲僚。周必大賀啓。鵷序班庭聳聞大號。④管子。動爲善棟。尙書中候。洞五丸禮闕郵闕止也。⑤路史。平阿無隘四徹中繩。說苑。選矩之三雜規之三雜。⑥荀子。言有壇宇行有坊表。世說。晉文王稱阮嗣宗至慎每與之言言皆元遠未嘗臧否人物。莊子。及至聖人鑒鑒爲仁踳跂爲義而天下始疑矣。⑦史記商君傳。千人之諾諾不如一士之謬謬。墨子。今有五錐此其銛銛者必先挫。⑧後漢書崔駰傳。字亭伯駰嘗候侍中竇憲憲屣履迎門笑謂駰曰亭伯吾受詔交公公何得薄哉遂揖入爲上客。漢書樓護傳。字君卿成都侯王商罷朝欲候護其主簿諫將軍至尊不宜入閭巷商不聽遂往至護家家狹小官屬立車下久住移時天欲雨主簿謂西曹諸掾曰不肯強諫反雨立閭巷。⑨詩。緇衣之好兮敝予又改造兮。呂氏春秋。石可破也而不可奪堅丹可磨也而不可奪赤。

①⑨西京雜記。平津侯自以布衣爲宰相乃開東閣營客館以招天下之賢士。一曰欽賢館。次曰翹材館。次曰接士館。後漢書井丹傳。字大春。性清高。未嘗修刺。候人信陽侯陰就使人要刼之。丹不得已。既至。就故爲設麥飯蔥葉之食。丹推却之曰。以君侯能供甘旨。故來相過。何其薄乎。更置盛饌。丹乃食。②⑩風俗通。周泰常以八月遣輜軒使者採異代方言藏之祕府。③④後漢書郎顗傳。回選賢能以鎮撫之。漢書陸弘傳。誰差天下求索賢人。詩。濟濟多士。⑤⑥墨子。子墨子遊荊耕柱子在楚。二三子過之。食之三升。客之不厚。二三子復於子墨子曰。耕柱子處楚無益矣。梁書顧協傳。字正禮。吳郡吳人。少清介。有志操。及爲舍人。同官者皆潤屋。協在省十六載。器服飲食不改於常有。門生始來。事協。知其廉潔。不敢厚餉。止送錢二千。協發怒。杖二十。因此事者絕於饋遺。⑦⑧左傳。室如懸磬。野無青草。後漢書羊續傳。拜南陽太守。其資藏惟有布衾。敝祗裯。鹽麥數斛而已。⑨⑩後漢書董宣傳。字少平。卒於官。有大麥數斗。敝車一乘。漢書揚雄傳。字子雲。家產不過十金。乏無儋石之儲。晏如也。⑪⑫家語。原憲曰。無財者謂之貧。學道而不能行。謂之病。孔文舉論盛孝章書。若使憂

能傷人。②⑩⑥晉書衛玠傳。字叔寶。拜太子洗馬。劉琨謝尚共論中朝人士。或問杜乂可方衛洗馬否。三國志王粲傳。字仲宣。嘗之荊州。依劉表。表以粲貌寢而體弱。通悅不甚重也。魏國既建。拜侍中。②⑩⑦陸機謝平原內史表。身登三閣。官成兩宮。唐六典。尚書局司籍二人。掌四部經籍。教授筆札。几案之事。②⑩⑧後漢書蘇竟傳。與劉襲書曰。走昔以摩研編削之才。與國師公從事。出入校定祕書。漢書尹翁歸傳。責以員程。不得取代。②⑩⑨漢書揚雄傳。伊年春暮。將瘞后土。左傳。美疢不如惡石。石猶生我疢之美。其毒滋多。②⑩⑩漢書淮南王傳。子母同居。縣爲築蓋。又藝文志。假藥味之滋。因氣感之宜。辨五苦六辛。致水火之齊。後漢書章帝紀。駕言出遊。欲深知其劇易。②⑩⑪易林。盡我筋力。眠繭爲疾。論語。啓予足。啓予手。禮記。疾病男女改服。屬纊以俟絕氣。②⑩⑫禮記。清明在躬。志氣如神。北征賦。夫何陰暄之不陽兮。嗟久失其平度。②⑩⑬史記滑稽傳。東方朔用所賜錢帛。取少婦於長安中。好女率取一歲所卽棄去之。李詩。抱劍辭高堂。漢書嚴助傳。戴白之老。不見兵革。②⑩⑭詩。維熊維羆。男子之祥。韓詩外傳。女子七歲而齠齔。元稹詩。扶牀小女君先識。②⑩⑮韓詩。中郎有

女能傳業。史記李將軍傳。廣三子曰當戶椒敢當戶早死有遺腹子名陵。③④⑤後漢書獨行傳。溫序爲賊所迫伏劍而死。光武憐之命送喪洛陽。傍爲冢地。子壽夢序告之曰。久客思鄉里。壽卽棄官上書乞骸骨歸葬。左傳。荀偃卒而視不可含。⑥⑦鮑照謝表。邁命逢天得汗官牒。國語。楚靈王虐白公子張。諫驟諫王患之。史老曰。若諫君則曰。余左執鬼中右執殤宮。凡百箴諫君盡聞之矣。⑧⑨揚子解難。鍾期死。伯牙絕絃破琴而不肯與衆鼓。夔人亡則匠石輟斤而不肯妄斷。劉孝標廣絕交論。伯子息流波之雅引。⑩⑪謝莊月賦。親戚莫從羈孤遞進。尙書大傳。夏人飲酒醉者持不醉者不醉者持醉者和而歌曰。盍歸於薄。盍歸於薄。薄亦大矣。⑫⑬東觀漢記。王丹子有同門生喪親家在中山。白丹欲往奔慰。結侶將行。丹怒撻之五十。令寄縑二匹以祠焉。後漢書橋玄傳。曹操嘗感玄知己。後過玄墓爲文祭奠曰。承從容約誓之言。徂歿之後。路有經由。不以斗酒隻雞過相沃酹。過車三步腹痛勿怨。⑭⑮禮記。公叔文子卒。其子戌請諡於君曰。日月有時將葬矣。請所以易其名者。又註。誄之爲言累也。累舉其生平實行爲誄而定其諡而稱之也。又。死而諡今也。古者生無爵死

無諡。^{④⑩}後漢書范丹傳。辟太尉府以疾不行卒於家大將軍何進移書陳留太守累行論諡僉曰宜爲貞節先生。又吳祐傳。以火炙簡令汗取其青易書復不蠹謂之殺青亦謂汗簡。唐彥謙詩。相看莫浪哭私諡有前聞。昭明文選。潘安仁有夏侯孝若楊仲武諸哀誄。^{④⑩}古詩。玉衡指孟冬衆星何歷歷。管子。十二小榆賜予。漢書藝文志。黃帝長柳占夢十一卷甘德長柳占夢廿卷。又龔勝傳。薰以香自燒。陸機演連珠。朗璞蒙垢不能吐輝。潘岳夏侯常侍誄。慘爾其傷念我良執。舞鶴賦。窮陰殺節急景凋年。^{④⑩}左傳。君子勞心。詩。出自北門憂心慙慙。漢書外戚傳。嫫婫太息。莊子。無怛化。恨賦。齋志沒地長懷無已。又。含酸茹歎銷落湮沈。^{④⑩}柳宗元送獨孤申叔序。溫清奉引之隙必有美製。楚詞。搴芙蓉兮木末。張衡西京賦。取殊裁於八都。唐詩紀事。崔曙試明堂火珠詩。日夜來雙月滿曙後一星孤曙以是詩得名明年卒惟一女名星星是其識也。晉書華嶠傳。所傳十典未成而終。何秀思舊賦序。余少與嵇康呂安居正接近其後各以事見法余逝將西邁經其舊廬鄰人有吹笛者發聲寥亮追思曩昔遊宴之好感音而嘆故作賦云。水經註。穀水又東南轉屈而東注謂之阮

曲云是阮嗣宗之故居也。史記衛將軍傳註。襁長尺二寸闊八寸以約小兒於背也。④⑤⑥世說。晉簡文爲撫軍時見牀上塵不拂見鼠行迹視以爲佳。又王仲宣好驢鳴既葬文帝臨其喪顧語同遊曰王好驢鳴可各作一聲以送之赴客皆一作驢鳴。烈士傳。羊角哀左伯桃爲死友聞楚王賢往尋之道遇雨雪計不俱全乃并衣糧與角哀入樹中死。又韋玄成傳。茅土之繼在我俊兄。④⑤⑦周禮。司巫祭祀則共匱主及道布及菹館。漢書原涉傳。初武帝時京兆尹曹氏葬茂陵民謂其道爲京兆阡。晉書謝安傳。安薨羊曇輟樂彌年行不由西州路嘗因大醉扶路唱樂不覺至州門左右曰此西州門也曇悲感不已以馬策叩扉詠曹子建詩慟哭而去。隋書音樂志。精靈畢臻。楚詞。存髣髴而不見兮。④⑧⑨晉書王羲之傳。謝安謂羲之曰中年以來傷於哀樂與親友別輒作數日惡。劉峻相經序。雖壽夭參差賢愚不一其間大較可得而聞矣。

洪節母誄

夫煒管無不朽之徽。則期頤壽矣。中閨乏飛華之列。而禕翟榮矣。故蘭芬於委

灰。无假冥靈之年。松貞乎嚴洑。不晞寒谷之律。^二乃投畚辟纊之抱。却符待姆之
貞翼。此坤德。由其闕觀。豈可使陰律罷揚。光靈不屬。餘徽既衰。前冊疑誣。不亦
惜乎。孺人玉華早映。觚奇幼操。動合經曲。言成軌則。^四年二十一。歸午峯先生。家
遘遞衣之貧。室無賃廡之隘。^五布裳而前。簪飾既斥。^六先生射矢有志。斷機非箴。^七高
文通坐視流麥。謝彥貞傾身結交。懷哉君子。二人同心矣。^八昊天不忱。漂搖其室。^九
既罹烹雌之別。遽覲在己之災。^十私諡闔棺。邪衾入殯。^{十一}剪顏亡生。則筭總莫恃。對
影忽絕。而孤嬰既藐。^{十二}實乃伐蠹於背。樹荼於心。^{十三}歲華端憂。室有不黔之突。郈成
燼落。隅亡不恤之緯。^{十四}既而市居數易。士壟遂成。^{十五}窆棺要離之旁。屬子李杜之後。^{十六}
蓋二十五年於茲。寒泉不流。悲谷謝景。^{十七}以乾隆四十一年十月二十六日。卒於
內寢。嗚呼哀哉。一絕之袂。無救既搯之臂。在負之米。不盈一日之奠。^{十八}稚存至性
過禮。喪幾不勝。^{十九}星衍既辱拜母之知。不辭誄長之僭。云爾。^{二十}誄曰。

俗非嚴禮。時亦漓古。光光賢母。有此心苦。^{二十一}相夫成義。翼子令名。含貞斯芳。致身
匪榮。^{二十二}織聲在樞。誦聲在牖。兒方燂掌。母亦龜手。^{二十三}明明三千。世無能知。禍從小宗。
葬而復總。^{二十四}衣裳在笥。戒女副尺。截肉斷葱。方正是式。^{二十五}粲粲處子。負書以游。不營
不欲。^{二十六}日宏而修。范逵來初。張劭別久。爲爾醢酒。視其所友。^{二十七}清切舊華。里鄰司徒。
襟分夢投。鷄號舞俱。^{二十八}傷哉北門。出而殷殷。始嚙其指。遂馳其魂。^{二十九}魂之茫茫。集此
空戶。帷緹以總。扉黝易堊。^{三十}靈衣卽設。髻麻來歸。瞻霜有傷。涉波無知。^{三十一}子刪蓼莪。
我覲蒙楚。灑零冰苦。雪洒血土。^{三十二}倚廬沈沈。白日刺目。有林有風。萃此宵服。志實
誓臆。喪無毀身。厲汝節行。母之斤斤。^{三十三}

【註】①詩。彫管有煒。禮記。百年曰期頤。七啓。微步中閨。晉書列女傳。魯冊於是飛華。隋書后妃傳序。
衣褱翟稱中宮者凡有五。②陸機連珠。郁烈之芳出於委灰。列子。荆之南有冥靈者以五百歲爲春。
五百歲爲秋。劉向別錄。燕有寒谷鄒衍吹律溫氣乃至。③列女傳。老萊子耕於蒙山之陽。楚王駕至。

其門曰守國之孤願見先生老萊子曰諾妻曰妾聞可食以酒肉者可隨以鞭捶可受以官祿者可隨以斧鉞今先生食人酒肉受人官祿爲人所制也妾不能爲人所制投畚而去。孟子。仲子妻辟纊。列女傳。貞姜楚昭王之夫人也昭王出遊留夫人漸臺之上而去王聞江水大至使使者迎夫人忘持符夫人曰大王與宮人約命曰召若必以符今使者不持符妾不敢從使者行而大水至乃死號曰貞姜。④禮記。經禮三百曲禮三千。晉書庾皇后傳。思媚軌則。⑤後漢書獨行傳。李充家貧兄弟六人同食遞衣。⑥後漢書列女傳。鮑宣妻桓少君裝送資賄甚盛宣曰少君生富驕習美飾而吾實貧賤不敢當禮少君乃悉歸侍御服飾更著短布裳與宣共挽鹿車歸鄉里。⑦易。射雉一矢亡終以譽命。⑧後漢書高鳳傳。字文通妻嘗之田曝麥於庭令鳳護雞時天暴雨而鳳持竿誦經不覺潦水流麥。⑨詩。予室翹翹風雨所漂搖。⑩百里奚妻歌。憶別時烹伏雌炊扊扅。⑪唐彥謙詩。相看莫浪哭私諡有前聞。晉書劉毅傳。大丈夫闔棺事方定。⑫禮記。櫛縱并總衣紳。後漢書列女傳。蔡文姬悲憤詩。煢煢對孤影怛咤糜肝肺。左傳。以是藐諸孤辱在大夫。⑬詩。焉得護草言樹之背。劉基獨漈

篇。上山采茶下山采藥。心在腹中何由可白。⑩④淮南子。孔子無黔突。墨子無煖席。左傳。嫫不恤其緯。而憂宗室之隕。⑩⑤梁簡文劉顯墓銘。爾其戒行窮途。士壠。⑩⑥後漢書梁鴻傳。鴻卒。伯通等爲求葬地於吳要離塚旁。又范滂傳。母曰。汝今得與李杜齊名。死亦何恨。⑩⑦詩。爰有寒泉在浚之下。淮南子。至於悲谷。是謂晡時。⑩⑧論衡。曾子出薪於野。有客至而欲去。曾母卽以右手搯其左臂。曾子左臂立痛。卽馳至問母。臂何故痛。母曰。今者客來欲去。吾搯臂以呼汝耳。家語。子路曰。由事二親之時。食藜藿之食。爲親負米百里之外。親沒。南遊於楚。積粟萬鍾。列鼎而食。雖欲爲親負米。不可復得也。⑩⑨禮記。居喪之禮。毀瘠不形。視聽不衰。不勝喪。乃比於不慈不孝。⑩⑩吳志。孫策與周瑜同年。友善。瑜推道南大宅。以舍策。升堂拜母。有無通共。禮記。幼不誄長。⑩⑪楊雄侍中箴。光光當伯。詩疏。文王之聖。由其賢母所生。⑩⑫儀禮。士昏禮。父醯。子命之辭曰。往迎爾相。承我宗事。詩。以燕翼子。⑩⑬荀子。有子惡臥而燂掌。可謂能自忍矣。莊子。宋人有善爲不龜手藥者。世以泝。辟統爲事。⑩⑭禮記。曲禮三千。又。繼禰爲小宗。儀禮。改葬總。⑩⑮書。惟衣裳在笥。後漢書陸績傳。楚王

英獄連逮陸續續之母自吳來作食以饋續續對食悲泣曰母來不得見治獄者問何以知之續曰母截肉未嘗不方斷葱以寸爲度故知之。①④東晉補亡詩。粲粲門子。又。堂堂處子無營無欲。戰國策。蘇秦去秦而歸嬴膝履躡負書擔囊。②④晉書陶侃傳。侃早孤貧鄱陽孝廉范逵嘗過侃時倉卒無以待賓其母乃截髮得雙髮以易酒肴樂飲極歡。後漢書范式傳。字巨卿少遊太學爲諸生與汝南張劭爲友劭字元伯二人並告歸鄉里謂元伯曰後二年當還將過拜尊親見孺子焉乃共尅期日後期方至元伯具以白母請設饌而候之母曰二年之別千里結言爾何相信之審耶對曰巨卿信士必不乖違曰若然當爲爾醢酒至其日巨卿果到升堂拜母盡歡而別。③④南史謝朓傳。清切蕃房寂寥舊華。洪北江先生年譜。移居白馬三司徒里賃宅。南史張充傳。所可通夢交魂推襟送抱者惟丈人而已。⑤⑥詩。出自北門憂心殷殷。⑦⑧謝朓詩。總帷飄井幹。廣雅。黝堊塗也。禮記。三年之喪廬堊室之中。⑨⑩謝莊殷貴妃誄。靈衣虛襲。禮記。斬衰括髮以麻。⑪⑫晉書王褒傳。讀詩至哀哀父母生我劬勞未嘗不三復流涕門人受業者並廢蓼莪之篇。宋嚴氏粲詩輯。葛生

蒙楚此悼亡之詩。顏廷之元后哀策。灑零玉墀。雪泗丹掖。③④⑤禮記。居倚廬寢苦。禮記。居喪之禮。毀瘠不形。詩。斤斤其明。

原任漳州太守徐公竹村誄

某年某月某日。原任漳州府知府徐府君。卒於貴州銅仁縣故里。嗚呼哀哉。維乾產嘏。維坤毓珍。道淳凝化。德粹納真。祈融世喆。以福顓民。寥廊翱翔。大命倏謝。棠幹凋晨。珠輝殞夜。芒芴潛形。希夷委化。④嗚呼哀哉。虞淵易迫。⑤白雲莫追。含辛曷厝。懷悲蓄思。洪跡無已。表之素旂。其辭曰。

銅厓之秀。⑥月鏡之靈。⑦谷穎騰藻。巖華散馨。七世壙僚。俊乂實生。如玉剖璞。如珠發瑩。望歲能言。結髮勵操。至心爲內。孝乎惟孝。茂德棲音。朗思沈照。牙琴啓彈。由瑟易調。目見登心。神研悅貌。懷今孰希。餐古獨笑。樵蘇不爨。枕蓆彌勤。饑能煮字。貧乃市文。鑽燈散表。剔蠹搜芸。思樂泮水。言采其芹。呦呦鹿野。亦食其苹。

從我白屋。登於青雲。雷震百里。權輿厥勲。岷山盤盤。劍嶺峨峨。蠶叢閣道。螺女江波。^八飛鳥仰接。吟猿俯多。黎風莫洗。蠻語承訛。文翁下車。詩書化俗。後舞前歌。左餐右粥。^九庭有懸魚。戶無佩犢。覺以歲遷。鵠不日浴。^十湛然懷清。凜乎慎獨。誠斯感物。才以匡時。惠聲雨及。薦牘風馳。以牧以守。棠陰不移。一錢或選。^{十一}千樹無資。^{十二}法謝茹荼。網解凝脂。^{十三}名無赫赫。去乃見思。^{十四}潔已澤民。以康二老。廉泉自甘。仁粟斯飽。養勤純志。幕展孩抱。逮乎作孝。風吹卽倒。生事死葬。罔極維昊。終制而起。爰蒞臨川。橫秋坐月。玉茗吹烟。^{十五}靈谷之山。^{十六}豫章產焉。翹林登質。巡芳沐鮮。儒紳雀躍。惟太守賢。閩嶠鷗張。赤嵌蜂起。塵蹴候蹄。^{十七}渡號蒼兕。轉粟百萬。挽芻千里。衆沸若麻。公定如水。往昔金川。具資經理。今者之役。合轍同軌。勞閱辛王。呼無庚癸。事歲而思。厥功蓋偉。維帝念才。乃荷殊旨。移任漳江。實維器使。雲路方長。慈航頓艤。如陣聞金。詘然而止。衡茅偃息。仰賴生成。攝心儒術。返策書城。石墨

驅歲。湘紈送齡。花資夏色。葉翫冬榮。烏蟾代謝。榱棟以傾。委華孤世。背景藏靈。嗚呼哀哉。河導源長。椿培本厚。德積於身。慶鍾厥後。卞氏六龍^{十八}。翱翔雲藪。循風振鱗。仰流驤首。觥觥長君。學粹道純。魚先跋浪。鳳自鳴春。木天簪筆。烏府紆紳。念昔過庭。稟訓諄諄。以我同譜。子嫉誼均。得聞緒論。兼覲光塵。龍門不遠。芳徽竟淪。嗚呼哀哉。遠嶺嵯峨。荒波瀕洞。雁字縈悲。魚書纏痛。執紼無從。摧絃致慟。敢薦生芻。望停雲轍。

【註】①顏延之詩。祈融世哲。注。融長也。②淮南子。往古之時。猛獸食顓民。注。顓善也。③莊子。雜乎芒芴之間。變而有氣。注。芒即混茫之義。芴即沕穆之義。④老子視之而不見。名曰夷。聽之不聞。名曰希。⑤淮南子。日入於咸池。迫於虞淵。⑥貴州通志。銅厓在貴州銅仁縣。⑦貴州通志。梵勝山一名月鏡山。⑧按搜神記。福州有江曰螺女。江洲曰螺女洲。廟曰螺女廟。疑四川另有螺女江。⑨韓文。今飽而歌。左餐右粥。⑩莊子。鵠不日浴而白。烏不日黔而黑。⑪後漢書。劉寵傳。臨行各選一錢。⑫史記。

貨殖傳安邑千樹棗河濟之間千樹萩其人皆與千戶侯等。①②桓寬鹽鐵論昔秦法繁於秋荼石網密於凝脂。③④漢書何武傳武爲人仁厚好進士獎稱人之善其所居無赫赫名去後常見思。⑤⑥名勝志玉茗亭在撫州府治內庭下種玉茗花大如山茶而色白人以比之瓊花亭北爲橫秋閣皆宋嘉定中建。⑦⑧江西通志靈谷山在撫州城東南。⑨⑩穀梁傳車軌塵馬候蹄注凡田車塵不出轍馬發足相應遲速相投。⑪⑫晉卞壺傳父粹兄弟六人並登宰府稱卞氏六龍。

馮師母陸恭人誄

夫四星炳符在天。垂須女之紀。六德觀義以南。肆夫人之詩。要惟勰芳矩於佩彤。體崇規於篆素。故能踵跡前載。延光後來。維我師母陸恭人者。孟亭夫子之淑儷也。徽嫺載凝。柔嘉允蹈。禮不愆於內則。家自守其荒莊。薄華銓之飾容。結琦璜而表度。善心爲竊。應流荇之風。靜女其姝。稱歸荑之美。相我夫子。宜其家人。嘻嘻不形。吉乃占乎中饋。媿媿自好。歡無失於威姑。門庭常覺其春多。婢媼

亦分其冬愛。然而藁砧念遠^七。須捷棲貧。空倉之雀方饑^八。束脩之羊不至。釵恆摘髻。貲且傾奩。詩有盤中^九。言無梱外。陳其俎豆。修季蘭尸祭之儀。慈以旨甘。謹儒門事親之禮。所謂虔恭內政^十。榮耀中闈者非歟。及我夫子。入承明^{十一}。歷清要。琴瑟在御。井臼彌勤。料理米鹽。常操量鼓。儲收薑蒜。不挂屏風。被浣濯於翟茀之餘。甘粗糲於膏粱之日。華粹一致。欣鬱兩恬。是以白首相莊。青山可買。仍置隱居之服^{十二}。彌高林下之風^{十三}。挽少君之鹿車。不忘前事^{十四}。陳大家之女誠。備述先賢^{十五}。雖復桂樹齊芳。鳳毛競美^{十七}。或建屏藩於江國。或標聲望於木天。而翬翬焉。抑抑焉。曾不知其身之榮也。閔德斯崇。福應宜厚。奄收世跡。遽散慈雲。於嘉慶元年某月日卒於里第。春秋七十有九。嗚呼哀哉。金護萎花。寶婺沈曜。朝飛之雉。和莊缶而增悽^{十八}。夜泣之烏。漬萊衣而成血。錫麒師門卅載。有愧崇宣^{十九}。京國頻年。兼交軾轍。得究塞淵之化。具聆聖善之徽。敢托素旂。作爲斯誄。其辭曰。

惟芝之英。惟玉之榮。^{二十}懿此淑質。含章以貞。生自名門。來歸鼎族。祥女宜家。王母
迓福。事我夫子。貍其德音。紡車夜戛。繭紙朝吟。煥講謀酒。貫書典簪。^{二十一}千秋對面。
雙祿共心。^{二十二}從宦長安。是尸中壺。三白佐餐。^{二十三}二紅治飯。^{二十四}論主儉先。道憂退晚。陌上
花開。山中雲返。昨歲夫子。鳴鹿重歌。榜經周甲。記羨登科。歡迎歸櫂。聽話大羅。
早年禁苑。中歲烟波。君子偕老。其樂如何。胡天不弔。頓失貞柯。嗚呼哀哉。上壽
將臻。化臺已築。雪翅飄鸞。仙音替燭。^{二十五}黯黯蕙幃。蕭蕭松谷。柱誌穿中。^{二十六}衣迷臯復。
珩珮莫聞。瑤儀空穆。情惻淵塗。淚枯竹木。嗚呼哀哉。

【註】①爾雅須女謂之婺女又按星經須女四星其一名婺女。②吳都賦篆素注篆書於油素也。③

王粲賦雜華鋌之葳蕤注鋌小釵也。④楚辭招魂纂組綺縞結琦璜些。⑤爾雅媿媿安也。⑥爾雅疏

漢律歸告告威姑。⑦古樂府藁砧今何在山上更有山。⑧庾信小園賦聚空倉而雀抱。⑨按蘇伯玉

妻有盤中詩玉臺新詠以盤中詩爲傳休弈作。⑩虔恭二語見庚子山周安昌公夫人鄭氏墓誌銘。

①①漢書注承明廬在石渠閣外又應璩詩三入承明廬。①②後漢梁鴻傳孟光曰妾自有隱居之服。①③世說王家夫人神情朗澈有林下風按王家夫人謂王凝之妻謝道韞。①④列女傳鮑宣妻桓少君悉歸侍御服飾更著短衣布裳與宣共挽鹿車歸鄉里。①⑤後漢書班昭作女誡七篇有助內訓按家與姑同大家女之尊稱漢班昭稱大家卽超妹。①⑥五代史竇禹鈞生五子馮道贈詩有丹桂五枝芳之句。①⑦世說王劭字敬倫風姿似父桓溫曰大奴固自有鳳毛又南史謝鳳子超宗善文詞帝曰超宗殊有鳳毛。①⑧琴操牧犢子七十無妻見雉雙飛感之而作。①⑨漢書張禹傳成就弟子尤著者淮陽彭宣沛縣戴崇宣恭儉有法度而崇愷悌多智。①⑩山海經玉榮注玉華也以爲玉種。①⑪懶真子溫公在夏縣每日與從學者講書每五日作一煥講一杯一飯一麵一肉一菜而已。①⑫古樂府婦婦夫夫雙心一株。①⑬漫笑錄錢文穆一日召東坡餐品飯及至乃設飯一盃蘿蔔一碟白湯一盞而已蓋以三白爲品也。①⑭類說東坡在齊安作麥飯雜小紅豆王夫人笑曰此新樣二紅飯。①⑮清異錄同昌公主薨帝以仙音燭賜安國寺冀追冥福。①⑯周

禮。喪祝。注壙謂穿中也。

林氏子哀辭

予友林編修亡後匝月。而其子永健生。生二十四日而夭。嗚呼。鄭小同之紹業。絕望今辰。南孺子之生男。深悲昔事。君學成士範。行爲世表。不永其年。復替其後。天道無知。斯非信歟。方其室中飛練。門左張弧。庭角殊凡。覃訏載路。謂宜榜榆得銑。桑樹藏環。辨楊梅於鞞佩之年。擬榛戟於瑯車之歲。豈謂瓦棺遽歛。金瓠同嗟。違寡母於襁抱。從嚴父於泉穴。二旬嬰鬼。未識軒渠。三日咳名。僅書赴告。悲夫。是子弱喪。誰還羸博之封。有女慙遺。空銘項伯之槨。以是思哀。哀可知已。乃爲辭曰。

君何隔兮人世。長太息兮人事。旣永睽兮素交。復短折兮遺嗣。前悲兮未弭。後感兮仍集。屑涕兮萑蘭。摧懷兮於邑。福兮禍所因。喜兮憂爲鄰。名鄭孫兮丁卯。

瘞潘子兮甲辰^{十六}。嗟生命兮何促。曾未更兮晦朔^{十七}。殤易月兮有盡。哀終古兮相續^{十八}。
轉絨兮委階。營魂兮弱骸^{十九}。昨咷泣兮猶聞。今雍樹兮長乖^{二十}。謂苗生兮不秀。謂蘭
茁兮不茂^{二十一}。石樓兮少女。空城兮寡婦^{二十二}。風泠泠兮襲帷。雪濂濂兮承雷^{二十三}。曾積善兮
非慶終。理冥冥兮不可窮^{二十四}。呼三閭兮門九重。慟何爲兮萃爾躬^{二十五}。

【註】①鄭玄別傳。子益恩爲孔融吏舉孝廉融被圍往赴難被賊害有遺腹子以丁卯日生玄以丁卯歲生故名曰小同。左傳。季孫有疾命正常曰吾死南孺子之子男也則以告而立之。②晉書荀崧傳。昔咸甯太康永嘉之中侍中常侍黃門通洽古今行爲世表者領國子博士。③書。惟以永年。晉書鄧攸傳。天道無知使伯道無兒。④後漢書虞延傳。延初生上有物如一匹練遂上升天占者以爲吉。後至太尉。禮記。子生男子設弧於門左。⑤唐書唐儉傳。珠庭日角非庸人之相。詩。實覃實訏厥聲載路。⑥史記封禪書。高祖初起禱豐枌榆社。銑卽美金言最有光澤也。晉書羊祜傳。祜年五歲令乳母取所玩金環乳母曰汝先無此物祜卽指鄰人李氏東園桑樹中探得之主人驚曰此吾亡兒所失。

物也。⑦世說楊修年九歲孔融詣其父設果有楊梅融指云之曰此居家果也修應聲對曰未聞孔雀是夫子家禽。詩童子佩鞶。楊炯魏哲碑。楊子參元發自銅車之歲。⑧禮記有虞氏以瓦棺。曹植金瓠哀辭。金瓠余之首女。⑨後漢書清河王慶傳。太后以殤帝襁抱遠慮不虞。劉令嫺祭夫文。百年何幾泉穴方同。⑩易林。朝生夕死名曰嬰鬼不可得祀。後漢書荀子訓傳。兒識父母軒渠笑說。⑪莊子。長梧子曰予惡乎知說生之非惑耶。予惡乎知惡死之非弱喪而不知歸者耶。禮記。延陵季子適齊其長子死葬於贏博之間既封且號者三。⑫杜詩。素交零落盡。汲冢周書。短折不成曰殤。未嫁短折曰殤。潘岳南陽公主誄。噉噉道嗣。⑬鮑照詩。前悲尙未弭。後戚方復起。⑭漢書息夫躬傳。涕泣流兮萑蘭。楚辭。氣於邑而不可止。⑮鵬鳥賦。禍兮福所依。福兮禍所伏。憂喜聚門兮吉凶同域。⑯潘岳西征賦。子無七旬之期。⑰陸機魏武帝文。結餘情之婉戀。何命促而意長。莊子。朝菌不知晦朔。⑱禮喪服傳。生未三月不爲殤。晉書禮志。孝文權制三十六日之服以日易月。離騷。余焉能忍與此終古。⑲庾信傷心賦。藤絨轡轡。文賦。攬營魂以深蹟。⑳方言。少時泣而不止曰嘔。

史記夏侯嬰傳註。南陽人謂抱小兒爲雍樹。②③④論語。苗而不秀。韓愈殿中少監馬君墓誌。幼子娟好靜秀。環瑤瑜珥蘭茁其芽。稱其家兒也。⑤⑥⑦水經註。蜀郡太守王子雅。南陽西鄂人。有三女。無男。父歿。常葬三女。各出錢五百萬。一女築墓。二女各建石樓。以表孝思。又。寡婦城賈。復從光武追銅馬五蟠於北平。所築也。⑧⑨⑩風賦。清清泠泠。愈病析醒。潘岳寡婦賦。霏泠泠而夜下。兮水濛濛而微凝。⑪⑫⑬易。積善之家。必有餘慶。莊子。視乎冥冥。聽乎無聲。⑭⑮⑯史記。屈原至於江濱。漁父見而問之。非三閭大夫歟。楚詞。圓則九重。孰營度之。

【祭文部】

祭錢大令文

大令名汝器。知武功。卒於任。自言當爲神汾河。余適汾州。爲文祭之。

昔者巨卿死友。厥有素車之馳。子文酒徒。無損成神之骨。恭聞故實。不謂逢君。曩以燕遊。妨君小節。圍花作縣。傾穴移金。桃分子瑕之筵。手進襄成之袖。一日

則古疑無死。千秋則魂猶樂斯^五。無何越人大去。淒涼山木之心。向生重來。淚墮
山陽之笛^六。宛其入室。喪予生平。然而文翁之知亡日。燕飲如常。子通之令太山。
妻帑有夢^七。雲旂晝接。鳧鳥宵分^八。彼汾一曲。如玉娛戲之方。姑射藐然。神人翔泊
之所^九。僕後車日載。五嶽遊來^十。渡妬婦之津。過臺駘之廟^{十一}。所思予美。勿藉君靈^{十二}。邈
逅壺觴。徘徊祠宇。方冀靈衣羽葆。損爾尊嚴。散髻斜簪。助予跌宕^{十三}。嗚呼。參差誰
思。猶揚楚江之靈。絃歌赴節。尙涌舒姑之浪^{十四}。我懷如夢。君豈忘心。倚玉何時。模
金宛在^{十五}。况復愁加歧路。悲甚生離^{十六}。靡蕪感再逢之難。桃梗被漂流之笑^{十七}。罔兩問
影。慙先後之無期。丹朱馮身。庶歡娛之有託^{十八}。澆君壘塊。保此嬋媛^{十九}。知我幽冥。庶
其歆饗。

【註】①後漢書范式傳。字巨卿與汝南張劭字元伯友善。元伯寢疾。歎曰。恨不見吾死友。尋而卒。式
忽夢見元伯。呼曰。巨卿。吾以某日死。當以爾時葬。子未忘我。豈能相及。式便服朋友之服。投其葬。日

馳赴之未到而喪已發引既至壙將窆而柩不肯進其母撫之曰元伯豈有望耶移時見有素車白馬號哭而來母曰是必范巨卿也。搜神記。蔣子文廣陵人嗜酒好色嘗自謂己骨清死當爲神。①禮記。燕遊曰歸。後漢書馮衍傳。不守小節。②白帖。潘岳爲河陽令多植桃李號曰花縣。後漢書郭皇后紀。后弟况遷大鴻臚帝數幸其第賞賜金錢縑帛豐盛莫比京師號郭况家爲金穴。③韓非子。昔彌子瑕見愛於衛君與君遊果園食桃而甘不盡。說苑。襄成君始封之日衣翠衣帶玉劍履縞烏立於遊水之上。④左傳。古而無死其樂何如。⑤越人歌。山有木兮木有枝心說君兮君不知。左傳。紀侯大去其國。向秀思舊賦序。余少與嵇康呂安居正接近其後各以事見法余逝將西邁經山陽舊廬於時日薄虞淵寒冰淒然隣人有吹笛者發聲寥亮追思曩昔遊宴之好感音而歎故作賦云。⑥後漢書任文公傳。蜀武擔石折文公曰噫西州智士死我當之。⑦楚詞。乘迴風兮載雲旂。後漢書王喬傳。喬爲葉令有神術每月朔望詣臺朝帝帝怪其來數密令太史伺之有雙鳧從東南飛來舉網張之得雙鳥乃所賜尙書官屬履也。⑧詩。彼汾一曲言采其蘋彼其之子美如玉。韓詩。文章自娛戲。莊子。

藐姑射之山有神人。楚詞。忽翺翔其高泊。①詩。命之後車謂之載之。①①西陽雜俎。臨濟有妬婦津。相傳劉伯玉妻段氏性妬。伯玉嘗誦洛神賦。語其妻曰。娶婦如此。吾無恨矣。妻曰。君何得以水神美。而欲輕我。吾死何患。不爲水神。乃自沈而死。左傳。晉侯有疾。卜曰。實沈臺駘爲祟。子產曰。實沈參神也。臺駘汾神也。①②詩。予美亡此。左傳。敢藉君靈以濟楚師。①③楚詞。靈衣兮披披。又雋不疑傳。容貌尊嚴。南史王儉傳。儉作解散髻。斜插簪。曰。江左風流宰相。惟有謝安。蓋自況也。蜀志簡雍傳。簡傲跌宕。①④楚詞。吹參差兮誰思。又。橫大江兮揚靈。宣城記。舒姑泉俗傳有舒氏女。與父折薪蓋山。忽坐泉處。牽挽不動。父遽告家。比來惟見清泉湛然。其母曰。女好音樂。試作絃歌。泉乃湧流。有雙鯉赴節。①⑤世說。魏明帝使后弟毛曾與夏侯泰初共坐。時人謂之兼葭倚玉樹。吳越春秋。范蠡既去。吳王乃使良工鑄金像范蠡之形。置之座側。①⑥淮南子。楊朱見歧路而泣。說苑。孔子晨立堂上。聞哭者。聲音甚悲。顏淵曰。今之哭者。音甚悲。非獨哭死。又哭生離者。①⑦古詩。上山采蘼蕪。下山逢故夫。戰國策。有土偶人與桃梗相與語。①⑧莊子。罔兩問影曰。曩子行。今子止。曩子坐。今子起。何其無特。

操與國語。昔昭王娶於房。曰房后實有爽德。協於丹朱。丹朱馮身而儀之。生穆王焉。^①^②世說。阮籍胸中壘塊。故須洒澆之。楚詞。心嬋媛而傷懷兮。

爲己丑進士祭石顯庵處士文

仰惟萬石訓恭。五傳共睦。^一徂徠松柏。自開隱士之廬。京洛芙蓉。別有神仙之館。^二遂復承家榆社。運佐興朝。衍胄瓜宗。世生俊彥。^三高陽表邑。四方式才子之門。德宿聯輝。百里見賢人之聚。^四先生歧嶷幼挺。趙趨羣超。^五瓊照彩於崑林。竹浮筠於鄧植。^六孝言無間。友篤因心。^七白水澄懷。素絲練節。^八國爵全而屏貴。天真樂而遺榮。^九和嶠千丈之松。不足以喻其高。黃憲千頃之波。不足以方其度。^十九流兼洞。六籍旁該。讀科斗之書。已搜奇於楚簡。辨豹文之雅。應訪對於雲臺。^{十一}以及六觚正律之方。五雀平衡之術。^{十二}事關游藝。總制清衷。^{十四}文握槩而立成。詩緣情而不靡。^{十五}山中招隱。非無叢桂之篇。衡下棲遲。卽製河魴之句。^{十六}重以芝蘭植砌。詩禮趨庭。三語

藏楹。晏大夫之家俗。一經勸學。韋丞相之遺詩。^{十七}故能重弈揚聲。五長并秀。鵷鸞接翼。羔雁成羣者。^{十六}也。嗟乎。天不憖遺。善無積慶。^{十九}賈占鵬鳥。鄭識龍蛇。巽籟冬嚴。珠彩晦少微之色。豐鐘霜急。金樞頽小華之峯。^{二十}斯則梁木擢柯。因之涕隕。召棠留蔭。所以悲來。^{二十一}某等忝種新坡。空聞舊德。臨淮都養。遂莫與於談經。董相門人。終無期於識面。^{二十二}所冀素靈如在。鑒我椒漿。丹旄匪遙。顧茲蕪謫。^{二十三}云爾。

【註】①漢書萬石君傳。奮積功勞孝文時仕至太中大夫無文學恭謹舉無與比魏書石文德傳。五世同居閨門雍睦。②詩。徂徠之松新甫之柏。王禹偁詩。他日相尋隱士廬。六一詩話。石曼卿卒後故人有見之者恍惚如夢言我今爲仙主芙蓉城。陸機詩。京洛多妖麗。③史記封禪書。高祖初起禱豐枌榆社。詩。綿綿瓜瓞民之初生。書。旁求俊彥。④後漢書荀淑傳。昔高陽氏有才子八人今荀氏亦有八子故改其里曰高陽里。續晉陽秋。陳仲弓從子姪造荀季和父子於時德星聚太史奏五百里賢人聚。⑤詩。克岐克嶷。西都賦。遑蹠諸夏。⑥僧皎然詩。瓊彩何輝映。晉書卻詵傳。猶桂林之一枝崑山

之片玉。禮記。如竹箭之有筠。列子。夸父追日道渴而死棄其杖尸膏肉所浸生鄧林。鄧林彌廣數千里焉。⑦詩。惟此王季。因心則友。則友其兄。則篤其慶。⑧左傳。所不與舅氏同心者有如白水。詩。素絲五紵。⑨莊子。至貴國爵屏焉。史通。樂道遺榮。安貧守志。⑩晉書。和嶠傳。庾顗見而嘆曰。嶠森森如千丈松。後漢書。黃憲傳。叔度汪汪若千頃波。⑪漢書。藝文志。孔子既沒。諸弟子各編成一家之言。凡爲九曰。儒家流。道家流。陰陽家流。法家流。名家流。墨家流。縱橫家流。雜家流。農家流。東都賦。註。六籍六經也。⑫南史。王僧虔傳。科斗書考工記。周官所缺文也。寶氏家傳。寶攸治爾雅。舉孝廉爲郎。世祖與百僚大會。靈臺得鼠。身如豹文。瑩瑩光澤。世祖異之。問羣臣。莫知攸對。曰。鼯鼠也。詔問何以知對。曰。見爾雅。詔按秘書。如攸言。因賜帛百匹。⑬漢書。律歷志。其算法用竹徑一分。長六寸。二百七十一枚。而成六觚爲一握。九章算術。五雀六燕。飛集於衡。適平。⑭禮記。游於藝。任昉。王文憲集序。總制清衷。遞爲心極。⑮李休烈。備書判。或削觚成學。或握槩求工。文賦。詩緣情而綺靡。⑯淮南小山。招隱士。桂樹叢生兮山之幽。又。山中兮不可以久留。詩。衡門之下可以棲遲。又。豈其食魚必河

之魴。⑩⑦晏子春秋。晏子將死鑿楹納書焉。謂其妻曰。楹語也。子壯而示之。及壯發書之言曰。布帛不可窮窮。不可飾牛馬。不可窮窮。不可服士。不可窮窮。不可任國。不可窮窮。不可竊。漢書韋賢傳。少子少翁復以明經歷位至丞相。故鄒魯諺曰。遺子黃金滿籝。不如一經。⑩⑧洛陽伽藍記。宗廟之美。百官之富。鸞鸞接翼。杞梓成陰。後漢書陳實傳。父子并著高名。時號三君。每宰府辟召。同時旌命。羔雁成羣。當世榮之。⑩⑨詩。不愁遺一老。易。積善之家。必有餘慶。⑩⑩湯惠休明妃曲。珠彩珍榮。晉書天文志。少微四星在太微西。士大夫之位也。一名處士。山海經。豐山有九耳鐘。霜降則鳴。海賦。大明撫轡於金樞之穴。山海經。小華之山。其陽多瑇瑁之玉。⑩⑪禮記。泰山其頽乎。梁木其壞乎。哲人其萎乎。詩序。甘棠美召公也。劉孝綽棲隱寺碑銘。召棠且思羊碑。猶泣。⑩⑫漢書兒寬傳。受業孔安國。貧無資用。嘗爲弟子都養。時行賃。作帶經而鉏。又董仲舒傳。下帷講誦。弟子傳以次相授業。或莫見其面。⑩⑬潘尼釋奠頌。素靈乃暉。楚辭。奠桂酒兮椒漿。駱賓王詩。丹旄背王畿。

祭吳桓王廟文

駢文觀止（祭文部）

余年十七。讀吳桓王傳。心感慕焉。後十年。宰江寧。過銅井廟。有美少年像。披王者冕旒。英氣弈弈。野人曰。是桓王也。余欷歔拜謁。奠少牢。爲民祈福。而使祝讀文曰。惟王值天地之睢刺。爲孤露之童牙。初亡姑蔑之旗。便射徒林之兕。先破虜將軍。玉璽方收。金棺遽掩。有功帝室。未享侯封。王收斟灌之遺兵。零星一旅。就渭陽之舅氏。涕淚千行。志在復讎。身先下士。神亭擲戟。立竿知太史之心。金鼓開城。解甲拜子魚之坐。鳴角以招部曲。戎衣而習春秋。則有公瑾同年。捨道南之宅。喬公淑女。聯吉偶之歡。自覺風流。私夸二壻。有誰旗鼓。敢鬪三軍。江有霧以皆清。陣無堅而不破。待豪傑如一體。用降兵若故人。逐奉佛之竿融。功高明帝。誅妖言之于吉。識過茂陵。起家曲阿。收軍牛渚。廓清吳會。奄有江東。百姓以爲龍自天來。虎憑風至。勢必山傾地坼。井堙木刊矣。而乃望見兜鍪。陳平冠玉。再瞻談笑。子晉神仙。三軍無雞犬之驚。千里有壺漿之獻。氣吞魏武。避劉兒

之鋒。表奏漢皇。迎許田之駕。^{十九}蓋不踰年而大勳集矣。不圖天意佳兵。三分已定。丹徒逐鹿。一矢相遺。^{二十}劍出匣以沙埋。日東升而雲掩。^{二十一}天實爲之。非偶然也。夫漢家之火德方衰。妖讖之黃龍已死。^{二十二}王如創業。美矣君哉。然觀其絕公路之手書。宣昭大義。問劉繇之兒子。繾綣平生。^{二十三}雖神勇之非常。偏深情之若揭。就使請隧周室。謀鼎暉臺。^{二十四}必非操莽之姦邪。終見高光之磊落也。^{二十五}而說者謂坐竟垂堂。勇忘重閉。^{二十六}未免麤同項羽。死類諸樊。^{二十七}不知伏弩軍門。亦傷劉季。深追銅馬。幾失蕭王。^{二十八}成敗論人。古今同慨。彼齊武王之沈鷺。晉悼公之雍容。^{二十九}俱未輕身。亦無永歲。抑又何也。今者廟貌雖頽。風雲自在。^{三十}端坐悒悒。郎君之神采珊然。秋草茫茫。討逆之旌旗可想。三吳士女。皆王之遺民。六代雲山。皆王之陳迹。^{三十一}守土官袁枚。幼讀史書。掩卷生慕。來瞻祠宇。雪涕沾襟。^{三十二}難從隔代以執鞭。誤欲升堂而拜母。^{三十三}修下士天臺之表。寄將軍帳下之兒。^{三十四}願安泰厲之壇。永錫編氓之福。^{三十五}勿孤普淖。鑒

此丹誠^{三十六}。嗚呼。千載論交。王識少年之令尹。九原若作。吾從總角之英雄^{三十七}。

【註】①吳志孫策傳。權稱尊號追諡策曰長沙桓王。②吳縣志。銅井在鄧尉西。杜詩。宗之瀟灑美少年。③禮記。季夏之月以祠宗廟社稷之靈以爲民祈福。④張衡南都賦。方今天地之睢刺帝亂其政豺狼肆虐。嵇康絕交論。少加孤露母兄見驕。後漢崔駰傳。唐且華顛以悞秦甘羅童牙而報趙。⑤左傳。吳王孫彌庸見姑蔑之旗曰吾父之旗也。晉語。昔我先君唐叔射兕於徒林殪以爲太甲。⑥吳志孫破^{一作}傳。堅到魯陽與袁術相見術表堅行破虜將軍領豫州刺史。又本傳註。吳書曰堅入洛掃除漢宗廟祠以太牢堅軍城南甄官井上且有五色氣舉軍驚怪莫有敢汲堅令人入井探得前漢傳國璽文曰受命於天既壽永昌。⑦破虜本傳。時長沙賊區星攻城圍城邑乃以堅爲長沙太守到郡克破星等周朝郭石亦起零桂與星相應遂越境尋討三郡肅然漢朝錄前後功封堅烏程侯。⑧左傳。昔有過澆殺斟灌以代斟鄩滅夏后相。又。少康有田一成有衆一旅。吳志孫策傳。堅薨還葬曲阿策舅吳景爲丹陽太守策乃載母徙曲阿與呂範孫何俱就景因緣召募得數百人。後漢書註。辰之

神爲零星。^⑨吳歷。策謂張紘曰。策願報讎雪恥爲朝廷外藩。因涕泣橫流。^⑩吳志太史慈傳。劉繇使慈偵視輕重。時獨與二騎卒遇策。策從騎十三皆韓當宋謙黃蓋輩也。慈使前鬪。正與策對策刺慈馬而墜。得慈頂上手戟。慈亦得策兜鍪。兩家兵騎並各來赴。於是解散。又時因進住涇縣。慈躬自攻討。遂見囚。執策卽解縛。執其手曰。甯識神亭時耶。魏志華歆傳。歆字子魚。詔拜豫章太守。^⑪⑫北史。武帝乃駐馬鳴角收兵。漢制。大將營有五部。部下有曲。招卽因緣召募事。吳錄。時有高岱隱於餘姚。策命出使聞其善左傳。乃自玩讀。欲與講論。^⑬⑭吳志周瑜傳。瑜字公瑾。初孫堅興義兵。徙家於舒。堅子策與瑜同年。獨相友善。瑜推道南大宅以舍策。升堂拜母。有無通共。又策欲攻荊州。以瑜爲中護軍。從攻皖。拔之時。得喬公兩女。皆國色也。策自納大喬。瑜納小喬。^⑮⑯江表傳。策戲瑜曰。喬公二女得吾二人爲壻。亦足爲歡。左傳。晉張侯曰。師之耳目在吾鼓旗。大國三軍。^⑰⑱吳志劉繇傳。笮融者。初聚衆數百。依陶謙。謙使督運漕。遂大起浮屠祠。以銅爲人。黃金塗身。重樓閣。道可容三千餘人。悉課讀佛經。民人來觀。及就食。萬計。本傳駐。道士瑯琊于吉。往來吳會。作符水以治病。吳會人多事。

之策嘗於郡城門樓集會諸將賓客吉趨度門下諸將賓客三分之二下樓迎拜掌賓者禁呵不能止策卽令收之曰此子妖妄能幻惑衆心不可不除也卽雇斬之懸首於市。④⑤本傳註。策渡江由牛渚營盡得邸閣糧穀戰具。⑥⑦易。雲從龍風從虎。易。飛龍在天。⑧⑨韓詩。地坼天分非所恤。左傳。當陳隧者井堙木刊。⑩⑪說文。兜鍪者鎧也。史記陳平世家。平雖美丈夫如冠玉耳其中未必有也。策傳。策爲人美姿顏好笑語。後漢王喬傳註。王子喬周靈王太子晉也好吹笙作鳳鳴游伊洛間道士浮邱公接上嵩山二十餘年後來於山上告桓良曰告我家七月七日待我緱氏山頭乘白鶴駐山頭望之不得到舉手謝時人而去。⑫⑬本傳註。吳歷曰曹公聞策平定江南意甚難之常呼獠兒難與爭鋒也。又建安五年曹公與袁紹相拒於宮渡策陰欲襲許迎漢帝。⑭⑮老子。夫佳兵者不祥物或惡之故有道者不處。諸葛亮出師表。今天下三分益州疲敝。本傳註。策軍到丹徒須待運糧將步騎數出馳驅逐鹿所乘馬精駿從騎絕不能及初吳郡太守許貢表於漢帝曰孫策驍雄與項籍相似宜召還京邑若放於外必爲世患策候吏得貢表以示策策令武士絞殺之貢奴客欲爲報仇

獵日卒有三人卽貢客也策問何人答曰韓當兵在此射鹿耳策曰當兵吾皆識之未嘗見汝等因射一人應弦倒地二人怖便舉弓射策中頰後未幾瘡裂而卒。⑩⑪李詩。劍花秋蓮光出匣。韓詩。杲杲寒日升於東。⑫⑬漢高帝紀贊。斷蛇著符旗幟尙赤協於火德自然之應。袁宏三國名臣贊。火德旣微運躔太過。隋李渾傳。李敏金才名當妖讖。漢王葬傳。天鳳二年訛言黃龍墮死黃山宮中。⑭⑮策傳。時袁術僭號策以書責而絕之術字公路。吳志太史慈傳註。策謂慈曰今劉繇喪亡恨不及其生時與共論辨今兒子在豫章不知華子魚待遇何如其故部曲復依隨之否。⑯⑰左傳。晉侯朝王王饗禮命之宥請隧弗許。戰國策。顏率曰梁之君欲得九鼎謀之暉臺之下沙海之上。⑱⑲操莽。謂曹操王莽。高光。謂高祖光武。⑳㉑司馬相如諫獵書。諺曰家累千金坐不垂堂。左傳。勇夫重閉况國乎。㉒㉓史淮陰侯傳。項王暗鳴叱咤千人皆廢。左傳。吳子諸樊伐楚門於巢牛臣曰吳王勇而輕若啓之將親門我獲射之必殪從之吳子門焉牛臣隱於短垣以射之卒。㉔㉕史記高祖本紀。高祖姓劉氏字季。後漢光武紀。更始遣侍御史持節立光武爲蕭王。又。光武擊銅馬賊。

於順水北乘勝輕進反爲所敗。賊追急，短兵接。光武自投高岸，遇王豐，授馬得免。②⑩⑨後漢齊武王縯傳。縯字伯升，光武之長兄也。性剛毅，慷慨有大節。又范曄贊。齊武沈雄，義戈乘風。春秋襄公十五年，晉侯周卒。③⑩⑪詩清廟序箋。廟之言貌也。生者精神不可得而見，但以生時之居立宮室象貌爲之耳。後漢書二十八將傳論。感會風雲。③⑩⑪圖經。漢分會稽爲吳郡，與吳興、丹陽爲三吳。王貞白詩。六代江山在。③⑩⑪李詩。片言苟會心，掩卷忽而笑。列子。公雪涕而顧晏子。漢蘇武傳。泣下沾襟。③⑩⑪史記管晏列傳。假令晏子而在，余雖爲之執鞭，所欣慕焉。③⑩⑪南史沈炯傳。炯嘗獨行經漢武帝通天臺，爲表奏之。魏略。劉表自作書與孫伯符，以示禰衡。衡曰：「欲示孫郎帳下兒耶？」③⑩⑪禮記。王爲羣姓立七祀，曰司命、曰中霤、曰國門、曰國行、曰泰厲、曰戶、曰竈。宋史汪大猷傳。害及編氓。③⑩⑪儀禮。士虞禮嘉薦普淖。唐戴至德傳。高宗嘗爲飛白，賜李敬元曰：「資啓沃罄丹誠。」③⑩⑪漢官儀。令尹銅章墨綬。江表傳。策令曰：「周公瑾與孤有總角之好，骨肉之分。」

公祭襄勤伯鄂公文

鄂公名容安字虛亭滿洲人太學士鄂文端公爾泰子也雍正十一年進士官至兩江總督加太子少保襲三等襄勤伯爵殉節伊犁

諡剛烈

嗚呼。徹曉含芒。天星所以高上將。見危授命。人世所以重尸臣。乃有枉矢西流。赤烏夾日。班超之行萬里。韓弇之歿三邊。海內爲之招膺。天子聞而郊弔。豈非犀軒直蓋。光爭鐘鼎之先。馬革殘屍。位列雲臺之上者哉。恭惟虛亭尙書。殷代巫咸。姜家呂伋。華嶽削成於面目。雷精感應於胎生。受五運之金多。太阿立斷。得九秋之氣勁。止水無波。少步花磚。三清受職。長持玉節。十部宣威。謝傅領丹陽者一年。陶公穆風聲於千里。天子受降伊里。命公出鎮呼韓。明知梨樹請盟。吐蕃難信。涇州獻簿。醜奴可疑。祇因王者推誠。聖人無外。故使甘陳爲都護。將賴頗牧如長城。公奉詔鑿行。誓心采入。戎裝別母。有淚無言。秋日從軍。多霜少露。蓋早已笑看金玦。長辭玉關矣。亡何豺虎起於轂下。烽煙莽若雲來。犬不早

牽。轡難御突。抱九地九天之智。莫可施爲。聽一甄兩甄之鳴。長圍漸逼。拳毆突厥。肘見骨而未休。旗偃雷門。血溺驂而尙戰。短拳困拔山之手。妖雲遮捧日之心。雖必死是期。不去敖曹鼓蓋。而大臣難辱。終抽光弼鞞刀。嗚呼痛哉。白草青燐。誰辨蔣侯之骨。廡旌冷翠。虛歸穆伯之喪。一柱西傾。九重天泣。驚聞鼙鼓。痛甚沙場。養孤兒於羽林。錫高堂以胎穀。刻木以像鮑信。碧葬風涼。臨池而痛彥昇。綠沈瓜墮。假使公竟維婁質子。牢籍賢王。封驃騎之狼胥。築韓公之中壘。轉不過策勳雙闕。磨崖一碑已耳。又安能氣肅三靈。而哀騰七萃也哉。今日者旄頭宵落。龍庭晝空。鳴鏑者銷聲。沸唇者讐伏。終軍被害。卒梟南越之頭。來歙雖亡。終取公孫之蜀。公之目可以瞑矣。公之心可以安矣。某等曾依麾下。同沐清風。過細柳之軍營。尙思刁斗。望周南之茆舍。敢折甘棠。方期式像於凌煙。豈料招魂於絕域。雍容裘帶。涉想猶存。叱咤風雲。音塵不再。謹以牲牢之奠。聊申部

曲之心黍稷非馨。丹誠可鑒。^{三十四}所冀弓刀自動。卽爲來享之徵。穀左歸來。莫作思鄉之夢。^{三十六}哀哉尙享。

【註】①史記天官書。斗魁戴匡六星曰文昌宮。一曰上將。漢郊祀志。美陽得鼎。獻之鼎中有刻書曰。王命尸臣。官此枸邑。②表異錄。項羽救鉅鹿。枉矢西流。魏志方技傳註。赤鳥夾日。殃在荆楚。③後漢班超傳。相者曰。祭酒布衣諸生耳。而當封侯萬里之外。唐李元賓。有監察御史韓弇。沒蕃文。晉書張軌傳論。阻三邊而高視。④國語。公父文伯卒。其母戒其妾曰。請無瘠色。無洵涕。無楸膺。無憂容。左傳。齊侯襲莒。莒子親鼓之。獲杞梁。齊侯歸。遇杞梁之妻於郊。使弔之。⑤左傳。齊侯得敝無存尸。公三禭之。與之犀軒。與直蓋。而先歸之。周禮疏。古者人臣有功。銘於鐘鼎。後漢馬援傳。男兒當效死於邊野。以馬革裹尸還葬耳。又。永平中。顯宗追感前世功臣。乃圖畫二十八將於南宮雲臺。⑥書。巫咸。乂王。家在祖乙時。則有若巫賢。史記齊世家。太公之卒百有餘年。子丁公呂伋立。⑦山海經。太華之山。削成而四方。論衡。子路感雷精而生。尙剛好勇。⑧徐陵書。五運相推。戰國策。龍淵太阿。皆陸斷馬牛。水

擊鴻雁。莊子。仲尼曰。人莫鑑於流水而鑑於止水。水唯止能止衆止。⑨周禮。宰節守邦國者用玉節。晉書劉宏傳。遷荊州刺史。每有與廢手書。守相丁寧款密。莫不感悅。成曰。得劉公一紙書。賢於十部從事。⑩晉書。謝安歿。贈太傅。其始領丹陽郡一年。晉陶侃傳。數千里中道不拾遺。⑪北史崔延伯傳。萬俟醜奴置營涇州。延伯爲排城出討。未戰之間。有賊數百騎詐持文書云。是降簿。乞緩師。延伯謂其事實。逡巡未閱。俄而賊乘間得入排城。延伯軍大敗。⑫公羊傳。王者無外也。中說。周公推之以誠。則不言而信。⑬漢甘延壽傳。車騎將軍許嘉薦延壽爲郎中諫大夫。使西域都護騎都尉與副校尉陳湯共誅斬郅支單于。唐李勣傳。我用李勣守并突厥。不敢南賢於長城遠矣。頗牧。廉頗李牧。⑭公羊傳。公自京師。其言自京師何。公鑿行也。公鑿行。奈何不敢過天子也。詩。豕入其阻。⑮後漢班超傳註。玉門關屬燉煌郡。⑯禮記。效犬者左牽之。註。大噬齧。人右手當禁備之。漢刑法志。今漢承衰周暴秦極敝之流俗。已薄於三代而行堯舜之刑。是猶以轆而御驛突。違救時之宜也。⑰孫子。善守者藏於九地之下。善攻者動於九天之上。晉書周訪傳。杜曾等攻陷陽口。王廙使訪擊

之訪使將軍李桓督左甄許朝督右甄自領中軍令其衆曰一甄敗鳴三鼓兩甄敗鳴六鼓。⑩⑪北史達奚長儒傳。開皇三年突厥寇掠西南詔以長儒爲行軍總管擊之轉鬪三日五兵咸盡士卒以拳毆之手皆骨見殺傷萬計。春秋感精符。戰兵雷合龍門溺驂。⑫⑬拳音鞏。周禮。掌囚上罪梏拲而桎中罪桎梏下罪梏。錢起詩。霄漢長懸捧日心。⑭⑮北史高允傳。高昂字敖曹昂心輕敵建旗蓋以臨陣西人盡銳攻之一軍皆沒。唐李光弼傳。光弼將戰謂左右曰戰危事光弼位爲三公不可死於賊手及擊賊常納短刀於靴中有決死之志。⑯⑰漢西域傳。鄯善國生白草。周禮。司常大喪共銘旌建廠車之旌。左傳。齊人歸公孫敖之喪。⑱⑲淮南子。天傾西北。洛神賦。日旣西傾。楚詞。君之門兮九重。⑳㉑禮記。君子聽鼓鼙之聲則思將帥之臣。王翰詩。醉臥沙場君莫笑古來征戰幾人回。㉒㉓魏志鮑信傳。與太祖擊黃巾力戰死求喪不得衆乃刻木如信形狀祭而哭焉。南史任昉傳。昉字彥昇爲新安太守卒於官武帝聞問方食西苑綠沈瓜投之於盤悲不自勝。㉔㉕公羊傳。且夫牛馬維屢委己者也而柔焉。列子。長幼羣聚而爲牢簪。漢書南蠻傳。求留質子。漢書匈奴傳。單于

有左右賢王。②④⑥漢霍去病傳。封狼胥居山禪於姑衍登臨瀚海。唐張仁愿傳。仁愿請奪取漢南之地於河北築三受降城首尾相應以絕南寇之路六旬而三城俱就以拂雲祠爲中城與東西兩城皆據津濟遙相應接景龍二年封韓國公。②④⑦唐元結。有磨崖碑。左傳。飲至策勳。②④⑧晉書孝友傳註。分渾元而立體道貫三靈。穆天子傳。天子乃樂賜七萃之士戰。②④⑨岑參詩。輪臺城北旄頭落。②④⑩史記匈奴列傳。冒頓作爲鳴鏑習勒其騎射令曰鳴鏑所射而不悉射者斬之。白帖。賈誼曰沸唇擾塞垣之下匈奴號也。漢書項籍傳。諸將讐伏。②④⑪漢終軍傳。自請願受長纓必羈南越王而致之闕下軍遂往說越王越王聽許越相呂嘉不欲內屬發兵攻殺其王及漢使者皆死。後漢來歙傳。歙與蓋延馬成進攻公孫述蜀人大懼使刺客刺歙未死歙召蓋延受所誡自書表投筆抽刃而絕。②④⑫漢周亞夫傳。亞夫爲將軍軍細柳。史記李廣傳註。以銅作鐃器受一斗晝炊飯食夜擊持行名曰刁斗。詩甘棠孔疏。芟草舍也。周禮。仲春教芟。舍草中止舍故曰芟舍古車行有草止之法。②④⑬唐太宗紀。十七年圖功臣於凌煙閣。後漢班超傳。超以一身轉側絕域。②④⑭漢李廣

傳。將軍領軍皆有部曲。庾信樂府。牲牢修牧。^③^④^⑤左傳。黍稷非馨明德惟馨。任昉勸進牋。冒奏丹誠。^⑥^⑦隋周羅暉傳。羅暉進兵圍之爲流矢所中卒於師其年秋子仲隱夢見羅暉曰我明日當戰其靈座弓箭刀劍無故自動若人持帶之狀。徐陵書。西洛孤墳恆表思鄉之夢。

祭竇東臯先生文

嗚呼。爛繁星以昭夜兮。揭卿月之孤光。受金法於風后兮。躬執矩而爲方。^一神默凝其梗梗兮。義鏘聲以璜璜。朝驂余之鳴鳳兮。夕將騁乎神羊。嗽沆瀣而折若木兮。塈浮雲而上翔。闕元宿於辰尾兮。^二森回回其孔陽。^三惟夫子之韞靈兮。齊崧高之駿極。降鵷冠以瞰詞兮。曰謫自陳芳之國。沐日浴月以生百寶兮。華裾襲而翠織。^四雲肥奮其怒霆兮。洩萬古於胸臆。引謨觴而斟酌兮。蒞二酉以娛其矰弋。^五內純終其領聞兮。外神禪而無飾。^六循軌度之汪汪兮。亮蘇世以爲德。^七方河鯉之跋浪兮。倏尺木之階升。^八踵柯亭劉井而揚翠兮。宛躡蓬島而上登。鍊寒清以

爲質兮。洛乎埒實於條冰。照春坊之寶字兮。^九硃蓮鐔之棱棱。試畿輔而奏績兮。罔陶誕突盜之不懲。^十宗二星其彪列兮。爰俾子衛爲之丞。逮升華於烏府兮。知非堯其莫勝。^{十一}絲以漚而愈潔兮。鏡乃磨而益澄。終保全而牲植兮。^{十二}賴聖主之曲矜。肯詘要而撓臆兮。^{十三}惟心署其兢兢。念雅聲之遠姚兮。嗟時俗之瓊喬。工蒲葦之柔從兮。^{十四}不能利跂以自潔。^{十五}故君子之用拙兮。^{十六}恆繩墨之先設。準六經爲淳制兮。庶齊度於先哲。奏七始華始之和音兮。^{十七}非蠅咬之取悅也。^{十八}涓衆蘂而選休成兮。嘉蘭苕之可折也。信閉門而造車兮。行千里而一轍也。沂漸江兮。^{十九}湯湯望吳山兮。嶸嶸再三留兮。使節往復照兮。文昌始董衆而勰變兮。羣傾葉而晞陽。及慶雲之將返於霄漢兮。又因風而回翔。紛鸞鳳之萬舉兮。翅翻翮其相望。豈禹行而舜步兮。徒修襮而外章。府然若渠。匱隳枯之於已兮。^{二十}廼宗原應變之各得其方。愧季材之玷乎大匠兮。眇朱儒之爲柱。告緇帷以春及兮。復申之以化雨。

身非顏而受鑄兮。^{二十一}敢以卓而鳴苦。^{二十二}瞻梁木其帶霓兮。將于鼓而于無。胡殷奠之在楹兮。謂廣桑待而爲主。^{二十三}令恆幹之永藏兮。貞大壽於終古。耿丹誠其不沫兮。結還雲之縷縷。感絲竹於生平兮。靈放悲其在戶。託旨酒以布蘭生兮。^{二十四}幸鑒誠於芳杜。嗚呼尙饗。

【註】①羣輔錄黃帝七輔風后受金法天老受天籙五聖受道級。②漢書魏相傳西方之神少昊乘兌執矩司秋。③淮南子傳說所以騎辰尾也。④張衡賦焱回回其揚靈。⑤大禹寶鼎詞沐日浴月百寶生。⑥荀子第佗其冠神禪其辭禹行而舜趨是子張氏之賤儒也。⑦楚辭蘇世獨立橫而不流兮。⑧吳志太史慈傳龍欲騰翥先階尺木者也。⑨李賀詩直是荊軻一片心莫教照見春坊字。⑩荀子飾邪說文姦言爲倚事陶誕突盜惕悍驕暴以儉生反側於亂世之間是姦人之所以取危辱死刑也。⑪史記周昌傳高祖持御史大夫印玩弄之曰誰可以爲御史大夫者熟視趙堯曰無以易堯遂拜堯爲御史大夫。⑫元包經羣類罔育所化者衆也庶類性植所生者多也。⑬荀子猶使處女嬰寶珠佩寶玉負戴黃金而遇中山之盜雖爲之逢蒙視詘要撓膺君盧屋妾由將不足以免也。

①④淮南子。屈伸偃仰無常儀表時屈時伸卑弱柔如蒲葦非攝奪也以乘時變也。①⑤荀子忍性情綦谿利跂注利與離同離跂違俗自潔之貌。①⑥荀子君子度已則以繩待人則用拙。①⑦漢書禮樂志。七始華始肅倡和聲。①⑧東京賦咸池不齊度於蠲咬而衆聽者咸疑能不惑者其唯子野乎。①⑨浙江通志浙江一名漸江。②①荀子與時遷徙與世偃仰紉急羸紉府然若蓬匭墜枯之於己也。②②楊子或曰人可鑄與曰孔子鑄顏淵也或人踧爾曰旨哉問鑄金得鑄人。②③楊子顏不孔雖得天下不足以爲樂然亦有苦乎曰顏苦孔之卓也。③①②太平廣記商客李順漂船泊一山下問此爲何處曰東海廣桑山也魯國宣父仲尼得道爲真官理此山。③④漢書禮樂志百末旨酒布蘭生。

爲同年公祭胡恕堂先生文

嗚呼。夕照馳而梁陰缺。春風歇而棠蔭遷。亮立德之不朽。胡粥壽之莫延。飛鵬之徵。預憂於庚日。白雞之兆。乃應於酉年。絮越酒而屑涕。囊牙琴而輟絃。悼星

精之實地。速雲馭而徂天。當其下董子帷。坐崔生室。飽千蹠而未已。答十問而無失。讀已等身。吟或擁膝。穿壁引照。結匡鼎之鄰。解經不窮。據戴憑之席。及夫咀徵含宮。陶精鍊質。金石畢宣。雲霞橫溢。又足詫君苗使焚硯。駭王朗爲閣筆也。孝廉船歇。苜蓿盤供。問字之酒常繼。束脩之羊亦豐。射瓠葉而習禮。舞鷺翻而爲容。光風扇人。勝木舌之相警。洪鑪鑄物。知金心之在中。守齋甕而得味。狎書堆而豈窮。旣而百里牽絲。一行作吏。圍春樹之新紅。拭秋桐之落翠。裁闊狹而無害。設圓方而並肆。庭化一臬。戶足五袴。顧建康如醇酒。盡得人利。王汝南問大魚。要由德致。亦何異鄉號更生。碑稱墮淚。有仁人聲。得賢者意。凡居官者幾及二十載。計陰行者何止三千功。崇蘭發乎階砌。文杏倚乎房櫓。君家養炬。今日士龍。斫蓬池之鱸。騰御史之驄。九苞耀其鳳羽。三霄降其鸞封。而先生雅賦。遂初。遽高引退。邱壑暢乎素心。功名付之兒輩。筵橫夕琴。門聽午碓。水落堂

陰。峯圍屋背。呼挈榼之小奚。課引泉之阿對。十畝^{二十五}蠶桑。一畦^{二十六}種菜。竹移醉後之^{二十七}青。松表古時之黛。將魚鳥之與偕。尙詩書之不廢。至於睦族屬。崇房祀。匡困而資無。採生而匱死。收未償之券。熯若飛蓬。聞可拜之言。從如流水。雖復積資易匱。應物亦劬。而律身則霜儉。効義則風趨。鄭太五百頃田。食恆不足。全悰數千斛米。散輒無餘。此又宜廬有上仁之頌。人多佛子之呼者也。白太傅仙龕已成。辛彥之新宮有待。證位於極瑤之天^{三十二}。游魂於紫泥之海^{三十三}。將湛寂其神明。乃韜潛其精采。小敷山下之路。清唱都遙。少微天上之星。餘芒安在。某等典型是仰。德教恭承。無李邕之識面^{三十八}。有元規之挹膺。徐州先賢。合之止足之傳^{三十九}。江都舊相。眷言下馬之陵^{四十}。椒蘭用薦。馨香告升。白雲宛在。素旄式憑。嗚呼尙饗。

【註】①荀子其求物也養生也粥壽也。②賈誼鵬鳥賦庚子日斜兮鵬集予舍。③晉書謝安曰昔桓

溫在時忽夢乘溫輿行十六里見白雞而止乘溫者代其位也十六里止今十六年矣白雞主酉吾

病殆不起乎。④陳陶詩。越酒豈不甘。⑤黃滔詩。十問九通離義床。今時登第信非常。⑥宋史。賈黃中幼聰穎。父玘每日令正立展書卷。比之謂之等身書。⑦後漢書。帝令羣臣說經者。更相詰難。義有不通。輒奪其席。戴憑坐五十餘席。語曰。解經不窮。戴侍中。⑧唐李頎詩。韞精殊豹隱。鍊質同蟬蛻。⑨魏志。王粲傳注。粲才既高。辯論應機。鍾繇王朗等。雖各爲魏卿相。至於朝廷奏議。皆閣筆不能措手。⑩管子。金心在中。不可匿。⑪貢師泰詩。陶家齋饗庾家菹。⑫黃庭堅詩。來檢舊書堆。⑬嵇康與山濤書。游山澤。觀魚鳥。心甚樂之。一行作吏。此事便廢。⑭漢書。兒寬傳。寬收租稅時。裁闊狹。與民相假貸。⑮漢律歷志。規矩相須圓方乃成。⑯後漢書。仇覽傳。選爲蒲亭長。初到亭。人有陳元者。獨與母居。而母詣覽告。元不孝。覽親到元家。與其母子飲。因爲陳人倫孝行。譬以禍福之言。元卒成孝子。鄉人爲之諺曰。父母何在我庭。化我鷗臯。今哺所生。⑰孔叢子。子順曰。猗頓聞陶朱公富。往而問術焉。朱公告之曰。子欲速富。當畜五牝。⑱南史。顧憲之爲建康令。爲政甚得人和。故都下飲酒者。醇旨輒號爲顧建康。⑲海錄碎事。客有貢大魚於王襲。襲曰。汝南乃有此大魚乎。曰。魚大。

由明府之德。②⑩水經注鄭產爲白土嗇夫漢末產子一歲輒出口錢產乃勅民勿得殺子口錢當自代出更名白土爲更生鄉。②⑪①南史王泰傳沈約嘗曰王有養炬謝有覽舉炬泰小字養筠小字也。②⑫③晉書周浚曰陸士龍當今之顏子也。②⑬④後漢書桓典爲侍御史常乘聰馬京師語曰行行且止避聰馬御史。②⑭⑤晉書孫綽居於會稽遊放山水乃作遂初賦。②⑮⑥陸游詩霜清南陌課蠶桑。②⑯⑰庾信賦寒菜一畦。②⑱⑲避暑錄話世言五月十三日爲竹醉可移。②⑳㉑宋顧愷之傳宣語遠近負三郎債皆不須還凡券悉燒之矣。②㉒㉓後漢書鄭太傳靈帝末知天下將亂陰交結豪傑家富於財有田四百頃而食常不足。②㉔㉕三國志全儆父柔嘗使儆齎米數千斛到吳有所市易儆至皆散用空船而還。②㉖㉗南唐書邊鎬傳克湘潭市不改肆日飯沙門以希福人稱邊佛子葉注輟耕錄費榮敏公裕輕財好施勇於爲義人皆呼爲費佛子。②㉘㉙隋書辛彥之傳州人張元暴死數日乃蘇云遊天上見新構一堂制極崇麗元問其故人云潞州刺史辛彥之有功德造此堂以待之彥之聞而不悅其年卒。②㉚㉛雲笈七籤色界十八天十曰極瑤天。②㉜㉝洞冥

記。東方朔曰兒至紫泥海有紫水汚衣。③④⑤杜牧詩斯人清唱何人和草徑苔蕪不可尋一夕小
敷山下路水如環珮月如襟。⑥⑦⑧史記注少微處士星也。⑨⑩⑪唐李邕傳早有名既入朝人傳
其眉目瓌異至任陌聚觀後生望風內謁門巷填溢又杜詩李邕求識面。⑫⑬⑭晉書陶侃傳贊元
規以戚里之崇挹其膺而下拜。⑮⑯⑰按梁書止足傳首顧憲之亦見徐州先賢傳。⑱⑲漢書董仲
舒爲江都相又國史補董仲舒墓門人過之皆下馬故謂之下馬陵。

【碑誌部】

重修唐太宗廟碑記

蓋聞天眷有德。五運所以疊隆。民報惟功。百世而有必祀。矧大矣遠矣。聿臻上
治之休。唐哉皇哉。爰同中古之號。則黃帝之壽三百。以畏其神。炎宗之廟六十。
思廣其報者矣。醴泉縣。唐太宗廟者。在宋建隆之歲。創自東郊。逮明萬歷之年。

移茲南郭^四。嗣後百有餘歲。曠而勿修。守土者懼焉。請於上官。發茲中帑^五。銀凡九百有奇。工甫數月而畢。乾隆四十五年。歲在庚子也。天作高山。成萬年之寢室。漢立原廟。藏一帝之衣冠^六。固知魂魄樂遊之地。近在武功。神明永聚之鄉。先瞻谷口^七。祀典所以重歟。夫閔位不列。則嗣漢者首唐。大統有開。則名宗而實祖^八。必推其始。有可言焉。爰自黃星既見。天習瓜分。黑水羣飛^九。民隨波沸。未嘗知九州百縣。統於盈尺之圭。四海萬夫。責成一人之抱^十。金宿則時時入斗。玉璽則頻頻出宮^{十一}。天地之厭亂至矣。神人之望治切矣。於是六合再朗。成於戊午之朝。星辰忽降。光茲甲乙之館。允矣哉。太平之運。兆於開皇十八年乎。一治一亂。運天地之生。前聖後聖。拯斯民之死。故上古未奠。則八黿開媧氏之勳^{十二}。中天未平。則雙龍建神禹之績^{十三}。近古未靖。則六馬昭唐室之功^{十四}。亦越萬年。甫聞三聖。蓋凌晉跨漢。超秦軼周者焉^{十五}。尤可異者。禮樂征伐。並曜一時。文德武勳。兼隆俄頃^{十六}。定龍鯨。

之駭浪握管而賦小池。戢兕虎之雄威。擘箋而吟豔體^{十七}。何其盛也。美矣君哉。是以廿三年之政。紀在史官。十八士之文。壓於御製^{十八}。梁魏二武。對金甲而顏慚。高光兩朝。見華詞而色沮^{十九}者也。至於自家及國。則畧跡論心。陳混一之策。奮袂而起王師。挈九五之尊。拱手而歸嚴父^{二十}。此則漢尊太上。終非有位之稱。周得武王。方具無憂之實^{二十一}。卽或閼伯構釁。元武貽譏^{二十二}。此之播稱。或云慚德。不知西京歌尺布斗粟。廟亦稱宗。東征賦取子毀巢。名無嫌聖^{二十三}。恢恢乎包舉天人之概。非一端可議者乎^{二十四}。知縣蔣君。宰斯三載。禮祀歷時。護青蒼之冢樹。繚以紅牆。法太紫之星垣^{二十五}。建茲黃屋。三過昭陵之作。世遜其工。式瞻畫像之文。人推其博。當惟新之落成。乃徵詞而授簡^{二十六}。亮吉再辭不獲。三嘆以興^{二十七}。昔者龍鳳挺質。表偉度於書生。今茲蠶癩負文。紀殊勳於下士^{二十八}。則通天峨峨。曾嘉沈炯之表。漳水浩浩。永鑒陸機^{二十九}之文。英爽邁昔者。諒鑒觀在今也^{三十}。遂使兒童父老。嬉游忘天日之尊。懷棟几

筵環拱聚川原之勢^{三十一}。他日者過驗穹碑。來觀典禮^{三十二}。庶幾衝山之風忽起。西接上郡之祠。如龍之雲怒飛。東連豐水之廟云爾^{三十三}。

【註】①書。天命有德。史記封禪書。自齊威宣之時鄒子之徒論著終始五德之運及秦帝而齊人奏之。左傳。盛德必百世祀。②盧昇之釋疾文。遠矣大矣臣太岳兮。班固典引。唐哉皇哉皇哉唐哉。易。易之興也其於中古乎。③帝王世紀。黃帝在位百年而崩年一百一十歲或傳以爲仙或言壽三百歲故宰我疑以問孔子。漢書韋賢傳。初高祖時令諸侯王都皆立太上皇廟至惠帝尊高帝廟爲太祖廟景帝尊孝文廟爲太宗廟行所嘗幸郡國各立太祖太宗廟至宣帝本始二年復尊孝武廟爲世宗廟行所巡狩亦立焉凡宗祖廟在郡國六十八。④陝西通志。唐太宗廟舊在醴泉縣東。⑤後漢書任延傳。善事上官無失名譽。蘇舜欽詩。橫賜傾中帑。⑥詩。天作高山太王荒之。庾信碑。乃命冬官成此寢室。史記叔孫通傳。願陛下爲原廟渭北衣冠月出遊之蓋廣多宗廟大孝之本也上乃詔有司立原廟。⑦史記高祖本紀。謂沛父兄曰遊子悲故鄉吾雖都關中萬歲後吾魂魄猶樂思沛。元和郡

縣圖志。慶善宮在武功縣南十八里皇家舊宅也。南臨渭水。武德元年置宮。史記封禪書，東北神明之舍。西方神明之墓也。宜立祠上帝以合符應。元和郡縣圖志。醴泉縣本漢谷口縣地，在九嵎山東。仲山西當涇水出山之處，故謂之谷口。⑧舊唐書禮儀志。天寶九載，處士崔日上五行應運歷請國家承周漢以周隋爲間。貢師泰詩。一元間大統。漢書景帝紀註。應劭曰。始取天下者爲高帝，稱高祖是也。始治天下者爲宗文帝，稱太宗是也。⑨魏志武帝紀。初桓帝時有黃星見於楚宋之分。遼東殷馗善天文言，後五十年當有真人起於梁沛之間。晉書地理志。當塗馭寓瓜分鼎立。陸倕石闕銘。龍飛黑水。謝希逸文。波沸外關，雲蒸內澤。⑩書九州攸同。汲冢周書。分以百縣。周禮。以土圭之法測土深，正日景以求地中。萬夫之長可以觀政。一人元良萬邦以貞。⑪隋書天文志。太白入南斗，占曰太白入斗，天下大亂，將相謀反，國易政。玉璽譜。魏文帝纂漢璽歸於魏，晉武帝纂魏璽歸於晉，趙王倫纂立，使義陽王威就惠帝取璽，帝不與，強奪之。晉永嘉五年，漢王彌入寇洛陽，執懷帝及傳國六璽詣平陽，後爲石勒所并，璽復屬石勒氏爲冉閔所滅，璽又屬閔，閔敗，璽存於閔大將軍蔣幹所管。

謝尙遣何融購得之以晉穆帝永和八年還江南。①淮南子。上古之時四極廢九州裂女媧氏鍊五色石以補蒼天斷鼇足以立四極。②括地圖。禹平天下二龍降之禹御龍行域內既周以還。③明一統志。六駿石刻在醴泉縣昭陵六駿曰青驪曰什伐赤曰特勒驃曰颯露紫曰拳毛騮曰白蹄烏。④顏師古聖德頌。超軒跨皞凌周軼漢。⑤禮記。文以文德武以武功。⑥唐太宗賦序。許敬宗家有小池作賦賜之。西京賦。威攝兕虎莫之敢抗。唐書虞世南傳。太宗嘗作宮體詩使庾和世南曰上作誠工然體非雅正上之所好下必有甚者臣恐此詩一傳天下風靡不敢奉詔。⑦通鑑。太宗在位二十三年壽五十三。又。帝嘗謂褚遂良曰卿知起居注所書可得觀乎對曰史官書人君言動備紀善惡庶幾人君不敢爲非未聞自取而觀之也。唐書褚亮傳。太宗作文學館以房杜等爲學士命閣立本圖像使亮爲之贊題名字爵里號十八學士藏之書府以章重賢之禮天下向慕謂之登瀛洲。⑧二武。漢武帝魏武帝。唐書太宗紀。太宗被金甲陳鐵騎前後鼓吹獻俘太廟。高光高祖光武。⑨論衡。四海混一天下定寧。詩。於鑠王師。唐書太宗紀。高祖欲還兵太原太宗諫曰義師

爲天下起宜直入咸陽號令天下。易履卦疏。居九五之尊。過秦論。秦人拱手而取西河之外。孝經。孝莫大於嚴父。嚴父莫大於配天。①②③史記高祖本紀。後高祖朝太公擁篲迎門。却行。高祖大驚。下扶太公。太公曰。帝人主也。奈何以我亂天下法。於是高祖乃尊太公爲太上皇。④⑤⑥左傳。昔高辛氏有二子。伯曰閼伯。季曰實沈。居於曠林。不相能也。日尋干戈。以相征討。唐書太宗紀。太宗以兵入玄武門。殺太子建成及齊王元吉。⑦⑧⑨又孝文本紀。孝文皇帝廟宜爲帝者。太宗之廟。詩序。東山周公東征也。詩。鷓鴣鷓鴣。既取我子。無毀我室。⑩⑪⑫漢書董仲舒傳。以觀天人相與之際。甚可畏也。禮記。夫言豈一端而已。⑬⑭⑮李商隱詩。本來銀海是紅牆。西都賦。倣太紫之圓方。唐書天文志。紫宮垣十五星。在北斗北。太帝室也。⑯⑰⑱左傳。楚子成章華之臺。願與諸侯落之。⑲⑳㉑禮記疏。禮有三辭。初曰禮辭。再曰固辭。三曰終辭。禮記。一唱而三嘆。有遺音者矣。㉒㉓㉔唐書太宗紀。有書生謁高祖曰。公在相法。貴人也。然必有貴子。及見太宗曰。龍鳳之姿。天日之表。其年幾冠。必能濟世安民。西京賦。巨靈曄曄。李詩。勘難光殊勳。㉕㉖㉗上林賦。南山峨峨。曹植銅雀臺賦。臨漳水之長流。

甯戚歌。浩浩者水。育育者魚。昭明文選。陸機有弔魏武帝文。③④晉書王濟傳。風姿英爽。氣蓋一時。詩鑒觀四方。⑤⑥莊子。含哺而嬉。鼓腹而遊。梁簡文詩。仰瞻棧棟。俯察几筵。宋史儀衛志。環拱而居。備物而動。⑦⑧司空圖復安南碑。遂揭穹碑。易觀其會通。以行其典禮。⑨⑩冊府元龜。太宗所居處。有紫雲當其上。俄又變爲五色狀如飛龍。陝西通志。軒轅廟在中部縣北五里。以后土風后力牧配祠。又禹王廟在長安縣西四十里。爲豐水而建。豐水在縣西南。

重修曾襄愍公祠碑文

明史曾銑傳。字子重。江都人。舉嘉靖八年進士。由長樂知縣。徵爲御史。巡按遼東。擢大理寺丞。遷右僉都御史。巡撫山東。進副

都御史。改撫山西。進兵部侍郎。總督陝西三邊軍務。爲嚴嵩讒死。隆慶初。詔贈兵部尙書。諡襄愍。

揚州三元巷。舊有公祠。歲久傾圯。公之裔孫某。請予議修。余爲上之巡鹽使者。捐公資集事。落成之日。公裔乞余爲文以記之。余感公之事。而不能無言也。夫國家之安危。常繫於一二人之好惡。事功之成敗。每爭於一二言之主奴。無他。權勢使然也。權在必爭。則黨同伐異之見出。勢有相角。則挾私廢公之事多。端

起於大臣。而禍流於庶職。事壞於一代。而論待於千秋。機括甚微。關捩匪細。可勝慨哉。然以余遐稽往史。歷考前賢。立功者惟恃乎得君。得君則南仲伐獫狁。亦賴乎有相。有相則充國討先零。道濟嬰宋武之疑。始不用於索虜。岳侯犯秦檜之忌。乃急召於朱仙。未有主上銳意以任之。輔臣竭力以贊之。而變故猝發。戳辱驟加者也。公之請復河套也。八議甫上。而有壯猷之褒。八圖繼陳。而有廓清之諭。撫臣會奏。不果則切責之。本兵覆議。少遲則誚讓之。而首輔夏言。方且相倚爲功。力主其說。廟謨英武。不減漢明之取匈奴。政府協同。何異馮唐之舉魏尚。將使拂雲祠畔。築受降之城。勅勒川邊。置屯田之尉。公且望玉關而生入。渡交河而洗兵。復祖宗百年之土疆。息秦晉三邊之烽火。不其偉歟。何以君言在耳。朝令夕更。朝局如棋。前反後覆。司馬但知畫諾。諫官無故罹刑。舉朝皆驚。中旨莫測。異矣哉。人知嚴嵩他日之顯攻。而不知世宗此時之先入也。且夫開

邊生事。在昔有之。博望初歸。李廣利興戎於宛馬。烏孫新輯。馮子明矯制於莎^{十四}車。害尙切膚。功真黷武。乃若河套之患。外連西海。內搆大同^{十五}。環衛旣頻有殺傷。延安復屢遭蹂躪^{十六}。豈可置邊氓於皮膚。養外寇於門庭。今取公前後奏疏而觀之。修築邊牆。則周宣之城朔方也。預儲芻餉。則費誓之峙糗糧也。選練士卒。乃仲淹之閱州兵。兼備舟車。乃王濬之營樓艦^{十七}。而竟徒揮神筆。自壞長城^{十八}。得臣旣誅。晉文不憂於仄席。廉頗已死。秦襄何憚於窺兵^{十九}。迨延甯之犯方張。宣府之攻更急。而世宗云報復至此。嚴嵩謂起釁有由^{二十}。豈知壁忘鼠。鼠不忘壁。即使不議恢復。能晏然乎^{二十一}。况乎言縱莫行。罪不至死。何以三字之獄。不待再聽而刑。嗚呼。嚴嵩此時。徒以夏言故耳。疾夏言則必傾襄愍。傾襄愍則必阻河套。河套阻而俺答入。俺答入而明社危。誰實爲之。而以君國之謀猷。聽諸執政之好惡哉。噫。詩刺青蠅。書嗟黃髮。有自來矣^{二十二}。

【註】①後漢書黨錮傳序。至有石渠分爭之論黨同伐異之說守文之徒盛於時矣。晉書羊祜傳。人臣樹私則廢公是大惑也。②書。若虞機張往省括于度則釋。晉書天文志。張衡製渾象與天相應因其關戾。③詩。王命南仲往城于方出車彭彭旂旐央央天子命我城彼朔方赫赫南仲玁狁于襄。漢書趙充國傳。先零叛充國馳至金城圖上方略奏每上輒下公卿議丞相魏相曰臣愚不習兵事利害後將軍數畫軍冊其言常是臣任其計可必用也。④宋書檀道濟傳。道濟立功前朝威名甚重左右腹心並經百戰諸子又有才氣朝廷疑畏之彭城王義康慮宮車宴駕道濟不可復制索虜爲邊寇召道濟入朝會上疾動收付廷尉。宋史岳飛傳。檜度飛志不可回乃先召諸將還後言飛孤軍不可留一日奉十二金牌令班師飛東向拜曰十年之勞廢於一旦矣。⑤漢書楊惲傳。遭遇變故橫被口語。又賈誼傳。廉恥節禮以治君子故有賜死而亡僇辱。⑥菽園雜記。延安綏德之境有黃河一曲俗名河套。⑦明史本傳。條八議以進詔報曰賊據套爲中國患久矣朕宵旰念之邊臣無分主憂者今銑倡恢復議甚壯。明史本傳。又獻營陣八圖並優旨下廷議。⑧明史本傳。初銑建議時輔臣夏言

欲倚以成大功主之甚力。⑨後漢書光武紀贊。明明廟謨。赳赳雄斷。後漢書明帝紀。十六年遣太僕
軾彤出高闕。奉車都尉竇固出酒泉。駙馬都尉耿秉出居延。騎都尉來苗出平城。伐匈奴。宋史歐陽
修傳。其在政府。與韓琦同心輔政。史記馮唐傳。今臣竊聞魏尚爲雲中守。匈奴遠避。不近雲中之塞。
虜曾一人尙率車騎擊之。所殺甚衆。且尙坐上功首虜差六級。陛下下之吏。削其爵。罰作之。由此言
之。陛下雖得廉頗李牧。弗能用也。文帝說令馮唐持節赦魏尚。復以爲雲中守。而拜唐爲車騎都尉。
主中尉及郡國車士。⑩唐書張仁愿傳。仁愿於河北築三受降城。首尾相應。以絕其南寇之路。古樂
府。勅勒川。陰山下。西漢曾要。屯田校尉屬西域都護。⑪後漢書班超傳。臣不敢望到酒泉郡。但願
生入玉門關。漢書西域傳。車師前王居交河城。⑫後漢書黨錮傳。汝南太守范滂。博南陽宗資主
畫諾。唐書李景伯傳。真諫官也。明史本傳。兵部尙書王以旗會。廷臣覆奏。遂盡反前說。言套不可復
帝乃遣官逮銑。出以旗代之。責科道官不言悉杖於廷。停俸四月。⑬明史本傳。時嚴嵩方與夏言
有隙。欲因以傾言。乃極陳套必不可復。旋復顯攻言。謂向擬旨褒銑。臣皆不預聞。⑭漢書張騫傳。

封博望侯使烏孫還拜爲大行諸後使往者言大宛有善馬在貳師城匿不示漢使天子旣好宛馬
迺以李廣利爲將軍伐宛。又馮奉世傳。字子明是時烏孫大有擊匈奴之功而西域諸國新輯奉世
以衛侯使持節送大宛諸國客至伊修城都尉宋將言莎車與旁國共攻殺漢所置莎車王萬年並
殺漢使者奚充國奉世以爲不急擊之則莎車日強必危西域遂以節諭告諸國因發其兵進擊莎
車攻拔其城莎車王自殺傳首長安蕭望之以奉世奉使有指而擅矯制違命發諸國兵雖有功效
不可爲後法。④⑤隋書地理志。西海郡置在古伏侯城卽吐谷渾國。大同府隸山西卽古雲中雁門
代郡等地。⑥明史記事本末。俺答入塞凡掠十衛三十八州縣殺戮男女二十餘萬。明史地理志。
延安府元延安路屬陝西行省。⑦宋史范仲淹傳。知延州分州兵爲六將將三千人訓練齊整使
更禦賊諸路皆用以爲法。晉書王濬傳。武帝謀伐吳詔濬修舟艦乃作大舩連舫方百二十步受二
千餘人以木爲城起樓櫓開四出門其上皆得馳馬來往。⑧南史檀道濟傳。濟見收目光如炬脫
輜投地曰乃壞汝萬里長城。⑨左傳。楚子玉旣敗王使謂之曰大夫若入其若申息之老何及連

谷而死晉侯聞之而後喜可知也。曰莫予毒也已。禮記有憂者側席而坐。史記廉頗列傳。藺相如曰。強秦所以不敢加兵於趙者。徒以吾二人在也。①①明史紀事本末。俺答入套將謀犯延甯。聲勢甚張。巡撫延綏楊守謙以聞。嵩激上怒。謂俺答合衆入套。皆曾銑開邊啓釁所致。後復寢宣府上曰。寇以銑收河套。故報復至此。①①越絕書。夫壁忘鼠鼠不忘壁。今越人不忘吳矣。①①詩序。青蠅刺幽王也。書詢茲黃髮。則靡所愆。

儀徵張孝女廟碑

夫側陋之賢。其跡易晦。純至之行。爲天所哀。^一是故荆棺號峽。一女之氏族無聞。梅根作冶。廿里之江流終在。^二儀徵張孝女巧姑者。里閭所不表。邑乘所不書。以今年戊午仲春。工浚揚子之津。土出曹娥之石。^三古文不滅。軼事如新。聞諸高年。證其實行。蓋天實爲之焉。^四孝女姓標於星宿。名乞於天孫。^五無向日之螢花。有病風之椿樹。^六雁行遠散。烏口獨傷。^七歲在甲子。年甫十四。鄰人不戒於火。孝女驚社

鳥之鳴。有池魚之害^八。人或呼之使出。彼不忍於獨生。方欲竊負而逃。竟以蹈仁而死^九。火熄。鄰人啓焦土視之。父尸猶壓女背也。嗟乎。劉殷叩殯。猶幸反風。余丙投身。亦逢暴雨^十。乃白髮紅顏之同盡。何女丁婦王之不仁^{十一}。撥朽骨於灰中。誰其葬者。附親魂於地下。猶似生時^{十二}。嗟乎。大道之衰。名教偶存於閨秀。天性之薄。真誠不喪於童年^{十三}。彼親在遠遊。獨非人子。此孝思維則。兼代阿兄^{十四}。唐李白詩云。十子若不肖。不如一女英。信矣。龐娥親之烈行。叔先雄之苦心^{十五}。屬在寒微。幾於湮沒。事隔五十餘年。始上於有司而立廟焉。漆室之女來過。從此見女貞之木。縣上之田未有。且當禁寒食之烟^{十六}。爰勒豐碑。庶彰潛德^{十七}。

【註】①書。明明揚側陋。任昉王儉集序。汝郁之幼挺純至。②古今記荆棺峽壁隙有棺以荆爲之。紀聞。宣城郡青陽縣有梅根治孝女李娥父吳大帝時爲鐵官冶以鑄軍器一夕鍊金爐竭而金不出。罪當誅娥年十五痛傷之因火烈遂自投爐中於是金溢爐口娥所躡二履浮出於爐身則化矣。③

李白詩。橫江西望阻西秦。漢水東連揚子津。後漢書列女傳。孝女曹娥者。會稽上虞人也。父盱溺死。不得屍骸。娥年十四。乃沿江號哭。晝夜不絕聲。旬有七日。遂投江而死。至元嘉元年。縣長度尙改葬。娥於江南道傍爲立碑焉。④漢書武帝紀。先者艾奉高年。詩。天實爲之。⑤徐陵詩。張星舊在天河上。從來張姓本連天。史記天官書。織女者天女孫也。⑥聶夷中遊子吟。萱草生堂階。遊子行天涯。慈親倚堂門。不見萱草花。馮道詩。靈椿一株老。丹桂五枝芳。以椿比父始此。⑦異苑。顏烏以純孝著。後有羣烏啣鼓。集顏所居之村。烏口皆傷一境。以爲顏至孝。遂名縣爲烏傷。王莽改爲孝烏。以彰其行。⑧左傳。烏鳴於亳社。如曰譖譖。甲午宋大災。廣韻。古有池仲魚者。城門失火。池魚燒死。故諺云。城門失火。殃及池魚。⑨孟子。竊負而逃。遵海濱而處。論語。未見蹈仁而死者也。⑩晉書劉殷傳。曾祖母王氏卒。夫婦毀瘠。幾至滅性。時柩在殯。而西鄰失火。風勢甚盛。殷夫婦叩殯號哭。火遂越燒東家。元史孝友傳。余丙建德遂安人。幼喪母。泣血成疾。父亡。不忍葬。結廬古山下。殯其中。日閉戶守視。有牧童遺火。延燒殯廬。丙與子慈。亟撲不止。欲投身火中。與柩俱焚。俄暴雨火滅。⑪韓愈陸渾山火詩。女丁

婦千傳世昏。①②晉書元帝紀。育豐肌於朽骨。①③晉書樂廣傳。名教內自有樂地。世說。顧家婦清心玉映。自是閨房之秀。鮑照詩。寶餌緩童年。①④論語。父母在不遠遊。詩。永言孝思。孝思維則。古焦仲卿妻詩。阿兄得聞之。悵然心中煩。①⑤皇甫謐列女傳。酒泉烈女龐娥親者。表氏龐子夏之妻。祿福趙君安之女也。君安爲同郡李壽所殺。娥親有男弟三人。會遭災疫。三人皆死。娥親遂棄家事。乘鹿車伺壽。遇於都亭。刺殺之。後漢書列女傳。孝女叔先雄者。犍爲人也。父泥和墮湍水物。故戶喪不歸。雄感念怨痛。常有自沈之計。所生男女二人。並數歲。雄乃各作囊盛珠環。以繫兒數。爲訣別之辭。①⑥列女傳。漆室女魯處女也。倚柱悲吟。而嘯。人謂曰。欲嫁耶。何吟之悲也。女曰。嗟乎。吾傷民心。悲而歎。豈欲嫁哉。後漢書周舉傳。太原舊俗。以介之推焚骸。有龍忌之禁。至其亡月。咸言神靈不樂舉火。由是士民每冬中。輒一月寒食。莫敢煙爨。①⑦禮記。公室視豐碑。韓文。發潛德之幽光。

六營公立兩江總督尹公去思碑

夫聖相道行。安民必用武。健兒性直。知感莫如兵。古之人。庚念其軍帥者。或銘

謝城之功。上邽閣之頌。建轡公之社。拜石相之祠。^二莫不夸鳬藻。奮鷹揚。在當時
爲詠歌。傳後世爲聲響。况乎深識九變。妙察六術。^三義路霜肅。仁風澤宣。^四十年有
積貯之糧。千里無拾遺之事。^五如今大學士望山尹公。能不謳思哉。公之督兩江
也。以端右之才。敷塞晏之化。^六沈幾應智。濡迹匡時。^七常以活國爲首謀。撫軍爲餘
事。丈人律重。君子營高樹。^八六枳以爲籬。飾三嚴而聽鼓。^九早已師不陵正。旅不偪
師。^十七萃帖然。兩甄肅若矣。每至霜落。演緇劉之禮。迹人有介。櫟之告。^{十一}公則朱旗
爛空。元甲耀體。募僧騰客。招曳落河。^{十二}罰必當郵。賞無慮渴。^{十三}訓之如子弟。敦之以
詩書。辨輦鐸而琅闌無訛。教步伐而跣跣應節。^{十四}爲鵠爲鶴。先偏後伍之彌縫。如
火如荼。八陣六花之出沒。^{十五}洸洸乎被廬之帥略。細柳之軍容焉。雖然。可久者。賢
人之德也。可大者。賢人之業也。^{十六}土狹則草木不長。資淺則功德不茂。^{十七}倘河東借
寇。不過一年。僕射稱周。僅止三日。^{十八}公亦不能簫勺羣慝。張皇六師。^{十九}爾乃開府卅

年。持節四次。戎容暨暨。黃髮皤皤。警角吹鞭。半是軍門箕帚。奇材劍客。無非竹馬兒童。恩以樹而愈深。政以習而愈肅。故劍不必試蒲元。刀不必詢楊僕。揚威不必畫干櫓。識面不必去兜鍪。凡夫水犀陸隊。野戍村烽。革挾跋芮之防。弩父亭公之設。莫不綱渠彌於有階。塞境确以夷庚。陳洗星芒。營空海霧。銅駝無恙。鐵牡常關。民之慶也。公之力也。今年天子南巡。公念毛馬而頒。承華或缺。奏廣庾人之額。備騎士之需。天子制曰可。於是吳驂走練。增渠黃山子之材。楚騎追風。馱橫水明光之甲。使爆槩燦雲霞之色。旄頭耀儀仗之形。可謂石畫無方。羅縷悉貫者矣。九月初六日。補文華殿大學士入都。抗手六軍。雨泣熊羆之士。焚香九鎮。金鐫韜略之書。召蔡茂於荊州。檐帷望斷。登仲華爲太傅。部曲心孤。某等或大父童孫。累世同依麾下。或三貂八座。起家半在轅間。每憶馮公。遙瞻大樹。感思子重。便望旌旗。爰紀五事於郭冲。書數行於孫綽。雖編堂垂範。明知非

郭丹之心。而冒禁刊碑。終難忘阮略之德。乃爲頌曰。

三十八

穆穆尹相。克佐隆平。秉鞭作牧。久鎮金陵。能耀七德。以佐三曾。吁荼萬物。皋牢

三十九

四十

羣能。常羊之維。奉令貫行。陵水經地。威燁旁達。智可奪梟。勇常設爵。隊肅銀刀。

四十一

四十二

四十三

四十四

歌騰鐵拔。組練三千。蛇矛丈八。罔敢籠東。而不操刺。神偉鳥弈。厥勳隆隆。王鈇

四十五

四十六

藏鏐。蕭楯歛鋒。聞公警欬。玉燭消虹。授公平章。金甲春農。冒衫有慶。橫草無功。

四十七

四十八

四十九

五十

一朝枚卜。逃矣旄麾。登於九乾。匪我能私。凡我同袍。含甘吮滋。彼葭又茁。甘棠

五十一

五十二

生枝。公歸不出。如之何勿思。

【註】①列子。列子曰自我之事夫子三年之後心不敢念是非口不敢言利害始得夫子一眄而已

五年之後心庚念是非口庚言利害夫子始一解顏而笑。②史記正義註。故謝城在龔邱縣東七十

里齊歸侵魯龜陰之田以謝魯魯築城於此以旌孔子之功因名謝城。陝西通志。鄆州在略陽縣西

陵巖寺。漢欒布傳。後爲燕相燕齊之間皆爲立社號曰欒公社。又石慶傳。出爲齊相齊國慕其家行

不治而齊國大治爲立石相祠。③南齊書高帝紀。深識九變妙察五色。賈誼新書。易書詩春秋禮樂六者之術以爲大義謂之六術。④續晉陽秋。袁宏字彥伯太傅謝安賞宏機捷辨速自吏部出爲東陽郡乃祖之於治亭時賢皆集安欲以捉迫試之執手將別顧左右取一扇贈之宏應聲答曰輒當奉揚仁風慰彼黎庶合座嘆其要捷。⑤左傳。有十年之備。家語。孔子相魯三月道不拾遺。⑥蔡邕上漢書十志疏。遂由端右出相外藩。後漢邳壽傳。竇憲陷壽下吏何敞上疏理之曰誠不欲聖朝行誹謗之誅傷塞晏之化。⑦後漢光武紀贊。沈幾先物深略緯文。又荀爽傳論。平運則弘道以求志陵夷則濡迹以匡時荀公之急急自勵其濡迹乎。⑧易。師貞丈人吉。又。師出以律。吳越春秋。越王躬率君子之軍六千人以爲中陣。⑨馮衍顯志賦。鍵六枳以爲籬兮築薰石而爲室。唐禮樂志。日未明四刻槌一鼓爲一嚴二刻槌二鼓爲再嚴三刻槌三鼓爲三嚴。⑩左傳。師不陵正旅不偪師。⑪後漢禮儀志。龜劉之禮祠先虞也。左傳。迹人來告曰逢澤有介麋焉。周禮迹人註。迹之言跡知鳥獸之處也。⑫南史侯景傳。募敢士厚衣袍鎧名僧騰客。唐房琯傳。琯自將平賊每日彼曳落河雖多安能當

我劉秩乎。①③禮記。凡制五刑必卽王論郵罰麗於事。孫楚爲石苞與孫皓書。渴賞之士鋒鏑當先。④周禮。大司馬辨鼓鐸鐃之不用。書。不愆于六步七步乃止齊焉。夫子勗哉不愆於五伐四伐六伐七伐乃止齊焉。勗哉夫子。史記張儀傳。虎賁之士跽跼科頭。⑤左傳。高渠彌以中軍奉公爲魚麗之陣。先偏後伍。伍承彌縫。蜀諸葛亮傳。亮嘗推衍兵法作八陣。成都圖經。武侯八陣有三在夔者六十有四方陣法也。⑥易繫辭。有親則可久。有功則可大可久者。賢人之德。可大者。賢人之業。⑦禮。土敝則草木不長。晉書殷仲堪傳。仲堪雖有時譽而資望猶淺。新唐書白居易傳。左拾遺歲滿帝以資淺且家素貧而聽自擇官。⑧後漢寇恂傳。潁川百姓曰。願從陛下復借寇君一年。世說。周伯仁風德雅重。深達危亂。過江積年。恆大飲酒。嘗經三日不醒。時人謂之三日僕射。⑨漢禮樂志。行樂交逆。簫勺羣慝。書。張皇六師。無壞我高祖寡命。⑩後漢樊稠傳。爲右將軍。開府如三公。漢書張騫傳。騫留匈奴十餘歲。然持節不失。⑪⑫禮記。戎容暨暨。書。皤皤黃髮。⑬⑭元經薛氏傳。簡文初立。未解嚴而桓溫屯中堂。吹警角。譙王祐劾奏溫大不敬。宋書禮志。甄會大司馬鳴鼓。感圍衆。

軍鼓譟警角至武場止。又樂志。李伯陽入西戎所造箠號曰吹鞭。漢李陵傳。陵叩頭曰請曰臣所將屯邊者皆荆楚勇士奇材劍客也。後漢郭伋傳。伋爲并州牧始至行部到西河美稷有兒童數百各騎竹馬道次迎拜曰聞使君到喜故來迎。①②世說補。蒲元多奇思於斜谷口爲諸葛武侯鑄刀三千口。漢酷吏傳。上責楊僕曰欲請蜀刀問君價幾何對曰率數百武庫日出兵而陽不知挾僞干君是五過也。③④吳志賀齊傳。齊性奢競尤好軍事所乘船雕刻丹鏤青蓋絳檐干櫓戈矛葩爪文畫弓弩矢箭皆取上材。唐薛仁貴傳。永淳元年突厥餘黨入寇仁貴將兵擊之虜問庫將軍爲誰應之曰薛仁貴虜曰我聞仁貴流象州死久矣何以給我仁貴免胄示之面虜相顧失色。⑤⑥越語。今夫差衣水犀之甲者億有三千。桓寬鹽鐵論。飭烽燧屯戍以備之。⑦⑧國策。當敵則斬堅甲盾鞬整鐵幕革抉啖芮無不畢具。揚子方言。楚東海間亭父謂之亭公卒謂之弩父。⑨⑩國語。使海於有蔽渠彌於有階。左傳。披其地以塞夷庚。後漢南蠻傳。荒服之外土地境确。⑪⑫李白塞下曲。陣解星芒盡營空海霧消。⑬⑭周禮。校人凡大祭祀朝覲會同毛馬而頒之。漢舊儀。天子六廄

未央承華駟駘騎馬輅鈴大廐也。③④李白大獵賦。吳騶走練宛馬蹀血。穆天子傳。次車之乘右服渠黃而左踰輪右騶道驪而左山子。中華古今註。秦始皇有七名馬其一曰追風。唐武宗會昌四年河東橫水戍卒作亂使馬元寶覘之還言曰自牙門至柳子列十五里曳地明光甲。⑤⑥宋祁筆記。宣獻宋公著鹵簿記至燔燼不能得其始予後方得其義。漢官舊儀。選羽爲旄頭被髮先驅。晉五行志。王敦在武昌鈴下儀仗生華如蓮華。⑦⑧漢匈奴傳。石畫之臣。⑨⑩羽獵賦。移珍來享抗手稱臣。書。則亦有熊羆之士。漢異姓諸侯王表。鐫金石者難爲功。按。今制總兵官江南福山鎮崇明鎮淮揚鎮徐州鎮狼山鎮安徽皖南鎮壽春鎮江西九江鎮南贛鎮凡九。⑪⑫後漢蔡茂傳。郭賀拜荊州刺史有惠政百姓便之顯宗巡狩至南陽特見嗟賞賜以三公之服黼黻冕旒敕行部去襜帷使百姓見其榮服以彰有德。又鄧禹傳。禹字仲華顯宗卽位以禹爲先帝元功拜爲太傅進見東向甚見尊寵。漢李廣傳。及出擊胡而廣行無部曲行陣。⑬⑭漢鄭當時傳。自見年少官薄然知其友皆大父行。書。幼子童孫。漢李廣傳。得賞賜輒分其戲下。南齊書何戢傳。上以戢資重欲加常侍褚

淵曰臣以王儉旣已左珥若復加戢則八座便有三貂。③④⑤後漢馮異傳。諸將並坐論功異常獨屏樹下軍中號曰大樹將軍。左傳。欒鍼見子重之旌請曰楚人謂夫旌子重之麾也請攝飲焉。③④⑤蜀志諸葛亮傳註。金城敦冲以爲亮權智勇略有踰管晏功業未濟論者惑焉。晉孫綽傳。於時文士綽爲其冠溫王郗庾諸公之薨必須綽爲碑文然後刊石。③④⑤後漢郭丹傳。太守杜詩請爲功曹丹薦鄉人長者自代而去詩乃歎曰昔明王興化卿士讓位今功曹推賢可謂至德敕以丹事編署黃堂以爲後法。陳留志。阮略字德規爲齊國內史風化大行卒於郡齊人欲立碑時官制嚴峻齊人思略不已遂共冒禁樹碑然後詣闕待罪。③④⑤莊子。善養生者若牧羊然視其後者而鞭之。楚詞。伯昌號哀乘鞭作牧。④⑤左傳。武有七德我無一焉。管子。大文三曾而貴義與德大武三曾而偃武與力。④⑤⑥書大傳。陽盛則吁荼萬物而養之外也。荀子。皋牢天下而制之若制子孫也。④⑤⑥淮南子。東北爲報德之維西南爲背陽之維東南爲常羊之維西北爲躡通之維。古文。奉令承教。④⑤⑥史記秦始皇本紀。瑯琊臺石刻曰是維皇帝匡飭異俗陵水經地憂恤黔首之眾刻石曰奮揚

武德義信誅行威燁旁達莫不賓服。④⑩④戰國策。孫臣見魏王曰王獨不見博者之用梟乎。左傳。莊公爲勇爵殖綽郭最欲與焉。④⑩⑤左傳。組甲三百被練三千。④⑩⑥北史李穆傳。芒山之戰周宇文泰馬中流矢驚逸墜地李穆下馬以策擊泰背因大罵曰籠東軍士爾主何在。五伐史。漢高祖初事晉祖爲親軍都虞侯契丹耶律德光曰此都軍甚操刺。④⑩⑦鵬冠子。王鈇非一世之器者厚德降俊也。蕭蕭斧也干謂之楯蕭以戮人楯以衛己知此則知兵矣。④⑩⑧北齊書崔悛傳。鄭伯猷歎曰身長八尺面如刻畫警欬如洪鐘響。爾雅。四時和謂之玉燭。④⑩⑨玉海。唐貞觀八年僕射李靖辭位詔三兩日一至中書門下平章事平章事之名始此。杜詩。稍喜臨邊王相國肯銷金甲事春農。⑤⑩⑩後漢章帝紀。冒彰之類。漢終軍傳。自請曰軍無橫草之功。⑤⑩⑪書。枚卜功臣。又。右秉白旄以麾曰逝矣西土之人。⑤⑩⑫詩。與子同袍。蔡邕釋誨。泯泯庶類含甘吮滋。

國子監生洪先生暨妻蔣氏合葬壙誌

乾隆四十三年十二月五日。吾友洪禮吉。奉其母孺人蔣氏柩。合葬於尊甫午

峯先生之墓。季武子之成寢。不嫌非古。趙臺卿之立石。遂其生平^二。始屬其友爲文識之。禮也。先生諱翹。字午峯。武進人。孺人其同里也。洪先世故居徽州。先生父豐旅君。始爲秦贅。竟保趙孤。好義以破其家。趨仁而美吾里^三。有華望焉。明德焉^四。先生既有父風。亦騰英氣^五。粼粼出石之水。落落在松之颺^六。先是孺人父嶠峨君。品藻人物。偃蹇淑^七。其見先生。如伯喈之傾仲宣。尼父之締子芝焉^八。旣而第五窮居。百年偕隱^九。蓬藜之琴夜引。甌鬲之蟄朝生^十。先生方跌宕文采。友于昆季。一尺之布。必推李元之衣。三年之券。親折田嘗之手^{十一}。泊乎宣尼告夢。堯典同棺。會稽之厄。少微隕而誰爭。彭城之喪。父老弔而莫識^{十二}。顥顥乎有古之節槩者也。孺人罹此屯災。終其禮教。勉卷施之不死。泣飛蓬而無顏。礪門子之陵華。卻遺金於繩^{十三}。華能通喪禮。便守孺悲。親授漢書。獨師孟博^{十四}。至夫髮鬢修容。乾蘂示惠^{十五}。三德七戒之篇。秋菊春椒之誦。固以昭此大節。後彼餘行。方先生之卒也。鶚室

斯搖馬鬣未卜^{十六}。踰月之禮不成。五父之殯斯愴^{十七}。孺人辛勤墓櫬。奠茲兆窆^{十八}。甫覲有見之子。奄當不待之年^{十九}。日月有時。歸於其室。林宗之葬。執紼而會者千。延陵之封。好禮而觀者百。星衍慚彥升之無文。信有道之不愧。嗚呼哀哉。搏搏之士。晞晞之暉。然膏永閉。移帳無回。神驚沙起。啼冷禽來^{二十一}。光光員石。識此女士其陵^{二十四}。其谷何年何世。松楸露盡。非無染淚之株。溟渤塵揚。祇有生金之字^{二十五}。先生生康熙五十三年三月十日。卒以乾隆十四年七月二十四日。春秋三十有八。孺人生康熙五十三年五月二十日。卒以乾隆四十一年十月二十四日。春秋六十有三。

【註】①洪北江先生年譜。先生少孤。午峯先生未及命名。初名蓮。字華峯。後改名禮吉。就試禮部。復改今名。②禮記。季武子成寢。杜氏之葬在西階之下。請合葬焉。許之。後漢書趙岐傳。字邠卿。初名嘉。生於御史臺。因字臺卿。年三十餘有重疾。乃爲遺令。勅兒子曰。可立一圓石於吾墓前。刻之曰。漢有

逸人姓趙名嘉有志無時命也奈何。③孫星衍洪稚存傳。先世徽州祖公案爲趙氏贅壻因居常州趙氏太守太原坐法籍沒家產洪保其孤以義聞。漢書賈誼傳。秦人家富子壯則出分家貧子壯則出贅。馬援誡兄子書。杜季良豪俠好義。後漢書張儉傳。破家相容。仁里見論語。④庾信慕容寧碑。以君華望召爲主簿。易。君子以自昭明德。⑤晉書阮籍傳。子渾有父風。唐書藩鎮傳。羅紹威少有英氣。⑥詩。揚之水白石粼粼。⑦洪北江外家紀聞。外祖父嶧峨大令。舉雍正甲辰科鄉試。後曆官雲南江山嶧峨數縣。南齊書文學傳論。子桓品藻人才。後漢書梁鴻傳。妾亦偃蹇數夫矣。詩。窈窕淑女君子好逑。⑧魏志王粲傳。字仲宣。蔡邕見而奇之。常當車騎填巷賓客盈座。聞粲在門倒屣迎之。曰。此王公孫也。有奇才。吾不如也。邕字伯喈。史記孔子弟子列傳。公冶長齊人。字子長。孔子以其子妻之。⑨晉書何準傳。高尙寡欲弱冠知名。州府交辟并不就。兄充爲驃騎將軍勸其令仕。準曰。第五之名何減驃騎。準兄弟中第五。故有此言。南史朱百年傳。百年少有高情。親亡服闋。攜妻孔氏入會稽南山以伐樵採筍爲業。人稍怪之。積久方知是朱穩士。⑩尙書大傳。子夏日作壤室編蓬戶尙彈琴其中。

以歌先生之風。後漢書范丹傳。桓帝時以丹爲萊蕪長。遭黨人禁錮。不到官。有時絕糧。閭里歌之曰。甑中生塵。范史雲釜中生魚。范萊蕪。①②史記淮南王世家。一尺布尙可縫。一斗粟尙可舂。後漢書李充傳。家貧。兄弟六人同食遞衣。史記孟嘗君列傳。名文。姓田氏。使馮驩收債於薛。馮驩至薛。召取孟嘗君錢者。皆會貧不能與息者。取其券而焚之。③④晉書謝敷傳。入太平山。十餘年。徵召皆不就。月犯少微。占者以隱士當之。漢書龔勝傳。死年七十。有九有父老來弔。喪甚哀。旣而曰。嗟乎。薰以香。自燒膏以明。自銷龔生。竟天天年。非吾徒也。遂趨而出。莫知其誰。勝居彭城廉里。⑤⑥補亡詩。粲粲門子如磨如錯。又。白華絳趺在陵之陬。後漢書列女傳。河南貞義者。樂羊子妻。羊子出學。貞義截髮賣以供其費。後羊子得遺金一餅。以與貞義。貞義曰。妾聞君子不以利汚行。羊子慚而棄之。⑦⑧禮記。恤由之喪。哀公使孺悲之孔子學士喪禮。於是乎書。宋史蘇軾傳。生十年。父洵遊學四方。母程氏親授以書。程氏讀東漢范滂傳。慨然太息。軾請曰。軾若爲滂母。許之否乎。程氏曰。汝能爲滂。吾顧不能爲滂母耶。滂字孟博。⑨⑩儀禮。婦被楊主。周禮。籩人饋食之筵。其實棗栗桃乾榛榛實。⑪⑫豳風。

鷓鴣詩。予室翹翹風雨所漂搖。禮記。從若斧者焉。馬鬣封之謂也。⑩⑦左傳。士踰月外姻至。禮記。孔子少孤。不知其墓。殯於五父之衢。⑪⑧左傳。伍子胥曰。樹吾墓檟。周禮。卜葬兆而窆。⑫⑨禮記。寡婦之子。非有見焉。弗與爲友。韓詩外傳。曾子曰。往而不可還者。親也。至而不可加者。年也。是故孝子欲養而親不待也。⑬⑭後漢書。郭泰傳。字林宗。卒年四十二。四方之士千餘人。皆來會葬。禮記。助葬必執紼。⑮⑯梁書。任昉傳。字彥升。幼學雅善屬文。後漢書。郭泰傳。蔡邕謂盧植曰。吾爲碑銘多矣。皆有慚德。惟郭有道。無愧色耳。⑰⑱江文通齊太祖誄。寂帳寂兮。寂已遠。⑲⑳蕪城賦。驚沙坐飛。庾信步陸逞神道碑。庭際之禽聞悲者則下。㉑㉒漢書。馮奉世敍傳。子明光。光員石。見上趙臺卿註。詩。釐其女士。㉓㉔陸機周處碑。墳前之樹染淚先枯。神仙傳。麻姑謂王方平曰。見東海三變爲桑田矣。向到蓬萊。水淺於往略半也。東海行復揚塵乎。鮑照詩。穿池類溟渤。王隱晉書。石端記。賈逵石碑中生金人。鑿取賣賣已復生。此江東之瑞也。

蔣定安墓碣

駢文觀止（碑誌部）

君諱寶善。字定安。從舅企宸先生幼子也。澤門之哲。長號多姿。江夏之黃。生而善悟。爰自能言之歲。卽標獨異之稱。母董安人。尤愛之。以善病未令苦讀也。所居枕溪。樓閣尤勝。成童後。出居外舍。軒楹啓日。雲麗迷花。門徑臨波。風疏振柳。羣從旣盛。執友時來。饒茲勝地之吟。益以華年之樂。君顧簡靜。無所嗜也。默然視層城之移陰。輿飛鳥之過蹟。則停觴以思。淒淚忽墮。故銅臺之遊。乏謝莊而寡韻。南皮之會。有吳質而損歡。一日。偕送友人葬。夜歸。室冷無寐。秋蟲鳴階。鑑薄影於星河。弔浮光於林露。是夕言鬼神之事甚悉。烏乎。君蓋有悟夫年命之靡常。而修短之合致者矣。君以療疾。遺命以道士服。歛。爲詩若干首。母不忍覩。亦納諸棺中。化形之鶴。猶愛羽衣。識字之蟬。偏隨病骨。予與君知愛特甚。自君卒及歛。嘗守君之寢。嗚呼哀哉。生何如死。願入夢以諮魂。夜已嚮晨。尙陳尸而待暝。以乾隆三十年歲在乙酉七月二十一日卒。年二十有三。卽以其年九月

附葬於先人之壠。禮也。君聘妻孫氏。誓節不嫁。奉姑以居。雖無子之痛。較甚羊舌。而嗜義之念。有重熊掌。可嘉也矣。^{十四}予爲君從表弟。少君三歲。懼夫江水衝溢。高陵或沉。^{十五}爰爲立石於墓。而誌其歲月云。

【註】①左傳。澤門之皙。實與我役。邑中之黔。實慰我心。嵇康琴賦。旣豐贍而多姿。後漢書黃香傳。京師號曰天下無雙江夏黃童。②禮記。能言男唯女俞。離騷。民好惡其不同兮。惟此黨人其獨異。③禮記。成童舞象。大戴禮。古者年八歲而出就外舍。④晉書阮咸傳。羣從昆弟。禮記。執友稱其仁也。⑤晉書孫統傳論。窮觀勝地。會其心焉。李商隱詩。錦瑟無端五十絃。一絃一柱思華年。⑥鮑照詩。停觴不御。欲誰須。漢書外戚傳。秋氣憊以悽淚兮。⑦南史謝裕傳。子恂恂。子孺子少與族兄莊齊名。多藝能。尤善聲律。車騎將軍王彧孺子姑之子也。嘗與孺子宴桐臺。孺子吹笙。彧自起舞。旣而歎曰。今日眞使人飄飄有伊洛間意。魏文帝與吳質書。昔南皮之遊。誠不可忘。⑧蘇詩。窗下獨無眠。秋蟲見燈人。孟浩然詩。何以發秋興。陰蟲鳴夜階。⑨杜詩。滿空星河光破碎。韓偓詩。林露墜空階。⑩史記賈生傳。

孝文帝方受釐坐宣室因感鬼神事而問鬼神之本賈生具道所以然之狀。①②古詩。浩浩陰陽移年命如朝露。蘭亭序。修短隨化終期於盡。③④段成式詩。歸來已化千年鶴。酉陽雜俎。蠹魚三食神仙字則化爲脈望。李賀詩。病骨猶能在人間底事無。⑤⑥後漢書向長傳。讀易至損益卦喟然歎曰吾已知富莫如貧知貴莫如賤但未知死何如生耳。詩。夜如何其夜嚮晨。⑦⑧左傳。叔向曰肸之宗十一族惟羊舌氏在而已肸又無子。中說。我未見嗜義如嗜利者也。孟子。魚我所欲也熊掌亦我所欲也。⑨⑩楚詞。使江水兮安流。詩。高岸爲谷深谷爲陵。

贈提督任勇烈公神道碑

山西出將。應運生祈父之才。巴蜀從軍。從古落大星之地。故知玉粲之瑟。其璦猛也。沉檀之貴。其香焚也。苟推轂於凶門。必立懂於天下。乃若兩軍未愬。方交河曲之綏。三鼓不上。竟墓宜陽之郭。①②③④⑤⑥⑦⑧⑨⑩⑪⑫⑬⑭⑮⑯⑰⑱⑲⑳㉑㉒㉓㉔㉕㉖㉗㉘㉙㉚㉛㉜㉝㉞㉟㊱㊲㊳㊴㊵㊶㊷㊸㊹㊺㊻㊼㊽㊾㊿

應募爲兵。均服振振。勇可習也。戎容暨暨。望之威如。中雍正二年進士。選陝西
柏林守備。征巴里坤有功。調寧夏都司。大傀異裁。編氓殲焉。公散所稟假。瑾其
捐瘠。無穢虐士。高築哀邱。上游嘉之。擢固原游擊。會提督標同文耀等作亂。半
夜寥狼。一軍跣藉。諸將征佞者伏。僕遯者逃。公手持威械。馬束殷緡。解刀授妻。
登樓發鑿。越王園土。闔門不辱之心。子反乘堙。捍衛侯遮之義。賊有攀垣上者。
公斬而擲之。頭墮半空。膽落羣醜。寇來不上。我武維揚。追其奔逸。提兵巷戰。以
五十健兒。當百千虍虎。立當前疾。呼彼下風。子產尸盜。成列而行。葉公赴難。免
胄而進。卒能嚴關鐵牡。解散銀刀。城中被掠。哭聲殷天。公下令曰。掠民財者。許
昏夜投繳。過限者誅。契箭一傳。革言三就。爭還趙璧。暗歸楚弓。當燒掇焚杆之
餘。爲翔旒雲輶之取。雖地名回洛。刀號定秦。不是過也。固原平。天子召見。曰。爾
才大可用。惜朕知之晚也。命王常之位。與諸將離席。許摩訶之寢。置鷗尾養威。

虎將名馳。龍光寵大。二十二會金川苗反。天子詢以方略。卽擢西鳳協副將。馳驛赴營。尋遷重慶總兵。當是時。總督張廣泗。與經略訥親。不相中也。公柴立無阿。危事二十三不齒。陳運糧之累。作益兵之請。二十四當事者銜之。命攻昔嶺。拔山而進。公望昔嶺險絕。惟迤南一溝。可通苗卡。乃命別將佯言攻嶺。而身率精兵。從僂道入。方誓蒼兕以渡河。忽輟雲梯而下宋。二十五人非著翅。肉是飛仙。二十六驚柴紹之壁龍。橫行七跡。信敖曹之地虎。雄入九軍。二十七奪取其卡。賊大懼。復築色兒力城。壘石而守。公分兵從木達不多兩山攻之。烏欏鳥絕。白羽蟲飛。二十八然離賊巢刮耳崖。已三十里矣。公請以步步圍城法蹙之。不半月。苗可叵平。經略不許。尅期命進。二十九公明知遁甲孤虛。開山有日。龍頭天竈。冒險無功。而業已卜戰龜焦。還雲路斷。三十一遂攀梁麗而上。果受飛礮之災。三十二乃北向叩頭曰。臣今以死報國矣。薨年四十有六。嗚呼痛哉。酸棗壇高。臧洪首歆。螯弧旗拔。考叔先登。三十三方期爨翫蜻蛉。萬歲仆碑以進。豈料蒼梧

南越。千秋一奮而亡國有人焉。誰之咎也。然而公始則霽雲斷指。繼乃公孫洞三十四胸。小白未僵。大黃猶射。三十六又典韋臨危之戟。橫貫數人。衝張遼已出之圍。再呼殘卒。淺色黃衫。蓋棺之衣早備。元纁新篋。歸元之面如生。三十七可以謂之勇矣。可以謂之烈矣。事聞。天子賜諡。加提督銜。祀昭忠廟。廕其子。卹其家。公之恩禮。世盡榮之。公之苦心。人未諒之。今夫將擊卑飛者蒼鷹也。十步九計者老將也。三十八死綏者節之小。活國者忠之大。不偶者命之隻。三十九養威者器之宏。以故或置兩驂於左拒。或帥七覆於敖前。四十罕羌易馴。營平違詔。邯鄲難下。武安不行。四十一公雖氣湧如山。亦識垂堂有戒。肯捨不訾之身。作鹵莽之報哉。四十二而無如二憾方構。十全無術。甘凌鬪忿。盾舞難分。渾濬爭功。風利不泊。四十三哥舒受逼。慟哭出關。周處無援。孤軍殉節。古英雄之人。處兀屯之地。急繕其怒。四十四授命如毛。成仁慷慨之場。不死無名之所。四十五直以瞑目畢見天之志。茹劍有含飴之甘。四十六豈徒沾沾然冀高國於生前。卜鼓吹

於死後而已耶。^{四十七}在易象曰困君子以致命遂志。勇烈公有焉。初公以川兵恇怯。紀律不嚴。乃變其徽章。廣招梟俊。曲轅轡服。增羅闔狗附之防。扈帶鮫函。有火正壇丁之號。^{四十八}帶其斷作三日之徇。傳其弓作一軍之觀。^{四十九}故能九上九下。兵如刺蜚。三遂三郊。士無縮甲。^{五十}及公之亡也。三河子弟。猶張呂氏之旗。百保鮮卑。空喂房公之馬。^{五十一}坡驚鳳落。地慘彭亡。覩黑稍以夢將軍。騎赤牛而思都尉。^{五十二}其能無慟面生哀。守陴盡哭也哉。公重仁襲義。辭隆就窳。校尉高官。雖屯戊己。袁安故綬。不具丙丁。^{五十三}至於熟左氏相斫之書。通呂蒙嚙語之易。^{五十四}執筆如上馬。磨盾卽賦詩。則又盡臣之雅懷。介夫之餘事也。^{五十五}長子承恩。年八歲。天子卽召見。擢侍衛。次子承緒。亦補京口守備。以某年月日。葬公於城東木坡寺之賜塋。三夫人祔焉。日中而窆。機合而封。^{五十六}元甲負土。^{五十七}黃封讀祭。固知廬山九仞。難銘上將之功。石馬千年。尙作勤王之狀。^{五十八}銘曰。

人誰不死。鬼獨稱雄。一日碧血。千年白虹。^{五十九}任公挺生。熊姿豹狀。兩目眈眈。凌煙閣上。^{六十一}初掃鴟苕。長鯨息浪。再討駒支。崆峒劍傍。^{六十二}坎既入險。乾難用壯。克敵致果。輿尸歸葬。^{六十三}事聞於朝。璽書悽愴。司勳銘功。太常繪象。幣純四狝。銘旌三丈。聖主之恩。忠臣之樣。^{六十四}

【註】①漢趙充國傳贊。秦漢以來山東出相山西出將。詩。祈父子王之爪牙。史記蘇秦傳。東有關河西有漢中南有巴蜀北有代馬。通鑑。建興十二年丞相諸葛亮卒於軍先夕司馬懿見大星落於西其大如斗。②逸論語。玉粲之瑟兮其璫猛也。③史記馮唐傳。王者之遣將也跪而推轂。淮南子。大將已受命則設明衣翦指爪鑿凶門而出。列子。俠客相與言曰虞氏富樂之日久矣而常有輕易人之志此而不報無以立謹於天下。④左傳。秦伯伐晉晉人禦之以從秦師於河曲出戰交綏秦行人夜戒晉師曰兩軍之士皆未憊也。戰國策。甘茂攻宜陽三鼓而卒不上甘茂曰請明日鼓之而不可下因以宜陽之郭爲墓。⑤班固十八侯銘。勲勲將軍威蓋不當勲音光武勇貌。⑥書。擾而毅。管子。五粟

之狀淖而不剛而不穀。⑦陶潛聖賢羣輔錄。黃帝七輔風后受金法。北史楊津傳。除定州刺史置
爐鑄鐵持以灌賊賊相告曰不畏利槩堅城惟畏楊公鐵星。⑧周禮。大司樂凡日月食四鎮五岳崩
大傀異哉謂天地奇變若星辰崩隕及震裂爲害者。漢高帝紀。諸將故與帝爲編戶氓。⑨後漢張禹
傳。禹上書求上三歲租稅以助郡國稟假。行有死人尙或懂之。漢食貨志。堯有九年之水湯有七年
之旱而國無捐瘠者以畜積多而備先具也。⑩左傳。先民有言曰無穢虐士。唐書元結傳。結爲山南
西道節度參謀募義士於唐鄧汝蔡降劇賊五千陸戰死露齒於泌南名曰哀邱。⑪後漢杜篤傳。
捶驅氏熒寥狼叩笮。漢天文志。秦二世卽位太白經天因以張楚並興兵相踰藉。⑫揚子方言。濶
沐征佻遑遽也。漢書息夫躬傳。躬上疏歷詆公卿大臣曰諸曹以下僕邀不足數。⑬崔駰達旨。威
械藏而俎豆布。考工記。必繼其牛後。⑭周禮。比長則惟園土納之。吳越春秋。王出宮夫人送王不
過屏王乃闔門填之以土去筭側席而坐不掃王命大夫曰內有辱於國是子也外有辱是我也。公
羊傳。莊王圍宋軍有七日糧爾盡此不勝將去而歸爾於是使司馬子反乘堙而窺宋城宋華元亦

乘堙而出見之。④⑤史記滑稽傳。秦二世欲漆其城。優旃曰。佳哉。赤城蕩蕩。寇來不能上。書。我武維揚。⑥周禮。大行人諸侯之禮。立當前疾。呂氏春秋。順風而呼聲。乃加疾。所因便也。左傳。羣臣敢在下風。⑦左傳。子產聞盜爲門者。庀羣司。閉府庫。慎閉藏。完守備。成列而後出兵。車十七乘。尸而攻盜於北宮。⑧新唐書吐蕃傳。其舉兵以七寸金箭爲契。又裴行儉傳。帝詔儉冊送波斯王至西州。傳契箭召都部酋長悉來請命。易。革言三就有孚。⑨史記張儀傳。中國無事。秦得燒掇焚杆。君之國。唐褚遂良傳。太宗欲自取遼東。遂良諫曰。但遣一二慎將。付銳兵十萬。翔旌雲輶。垂手可取。⑩⑪北齊萬俟洛傳。洛字受洛于河陰之戰。諸將北渡河洛。以一軍不動。謂西人曰。萬俟受洛干在此。能來可來也。西人畏而去之。高祖以雄略名其所營地爲回洛城。刀劍銘。秦始皇三年鑄二劍。銘曰。定秦。⑫⑬後漢書王常傳。光武七年拜常爲橫野大將軍。位次與諸將絕席。南史蕭摩訶傳。舊制三公黃閣廳事。置鴟尾。後主特詔摩訶賜黃閣門。施行馬廳事。寢堂並置鴟尾。⑭⑮吳志周瑜傳。劉備以梟雄之姿。而有關羽張飛熊虎之將。必非久屈爲人用者。詩。爲龍爲光。⑯⑰莊子。仲尼曰。無

入而藏無出而陽柴立其中央。周語。王孫雄曰夫危事不齒雄敢先對。②④後漢馬援傳。初軍次下雋有兩道可入從壺頭則路近而水險從充則途夷而運遠耿舒欲從充道援以爲棄日廢糧不如進壺頭搃其喉咽帝從援策耿舒與兄好時候弇書曰前舒上書當先擊充糧雖難運而兵馬得用今壺頭竟不得進大衆怫鬱欲死伏波到一處輒止以是失利。班超傳。超曉告撫慰遂納子爲質寶固具上超功並求更選使使西域詔以超爲軍司馬令遂前功超復受使固欲益其兵超曰願將本所從三千餘人足矣如有不虞多益爲累。②⑤史記齊世家。師尙父左仗黃鉞右把白旄以誓師曰蒼兕蒼兕總爾衆庶與爾舟楫後至者斬遂至孟津。戰國策。公輸般爲楚設機將以攻宋墨子曰聞公爲雲梯將以攻宋宋何衆之有。②⑥五代新說。周韓大將軍有勇略破稽胡胡憚勁捷號爲著翅人太祖曰著翅之名甯減飛將。隋書沈光傳。初建禪定寺其幡竿高十餘丈光以口銜索拍竿而上直至龍頭繫畢手足皆放透空而下以掌距地倒行數十步觀者駭異時人號爲肉飛仙。②⑦朝野僉載。唐柴紹之弟某有材力能著吉莫靴走上磚城且至女牆手無攀引又以足蹈佛殿

柱至檐頭捻椽覆上越百尺樓閣了無障礙時人號爲壁龍。南史羊侃傳。侃少而雄勇膂力過人嘗於兖州堯廟踏壁直上至五尋橫行得七跡。莊子。勇士一人雄入於九軍。③④烏櫓地名。柳宗元詩。千山鳥飛絕。太公虎韜。赤莖白羽以銅爲首。方言。箭之三鏃長六尺者謂之飛鏃。⑤⑥後漢班超傳。超欲因此匡平諸國。⑦⑧後漢方術傳註。遁甲者推六甲之陰而隱遁也。史記龜策傳。日辰不全故有孤虛。吳子。武侯問曰三軍進止豈有道乎起對曰無當天竈無當龍首天竈者大谷之口龍首者大山之端。江淹雜體詩。苟息冒險難實以忠貞故。⑨⑩左傳。晉車千乘在中牟衛侯將如五氏卜過之龜焦。舊唐書。李正反江淮路斷。⑪⑫莊子。梁麗可以衝城而不可以窒穴。范蠡兵法。飛石重十二斤爲機發行二百步礮蓋出此見漢書甘延壽傳註。⑬⑭後漢臧洪傳。張邈與諸牧守大會酸棗設壇場將盟旣而更相辭讓莫敢先登咸共推洪洪乃攝衣升壇操血而盟辭氣慷慨聞其言者莫不激揚。左傳。鄭伯伐許穎考叔取鄭伯之旗螯弧以先登。⑮⑯北史史萬歲傳。先是南甯夷爨翫降而復叛遂以萬歲爲行軍總管擊之入蜻蛉川行數百里見諸葛亮紀功碑銘其背曰

萬歲後勝我者過此萬歲令左右倒其碑而進。漢南越王傳。呂嘉相三王及蒼梧秦王有連越人信之王王太后已附漢獨呂嘉爲亂邾壯士故濟北相韓千秋奮曰願得勇士三百人必斬嘉以報於是天子遣千秋將二千人往入越境破數小邑其後越以兵擊千秋等滅之使人函封漢使者節置塞上。③④⑤新唐書忠義傳。賀蘭進明屯臨淮張巡遣南霽雲詣臨淮告急進明饗之霽雲泣曰睢陽之士不食已彌月矣義不忍獨享請置一指以示信因拔刀斷一指血淋漓以示賀蘭一座大驚。後漢書公孫述傳。述兵大亂被刺洞胸墮馬左右輿入城述以兵屬延岑其夜死。③④⑥呂氏春秋。管仲捍弓射公子小白小白僵。史記李廣傳。漢矢且盡廣乃令士持滿毋發而廣身自以大黃射其裨將。③④⑦隋書麥鐵杖傳。遼東之役請爲前鋒謂三子曰阿奴當備淺色黃衫吾荷國恩今是死日我旣被殺爾當富貴。晉書。劉毅曰大丈夫蓋棺事乃定矣。左傳。公使太史固歸國子之元置之新篋熨之以元纁加組帶焉。③④⑧孫子。鷲鳥將擊卑飛斂翼。通鑑。劉鄩以晉兵盡在魏州晉陽必虛欲襲取之乃潛引兵去晉人怪鄩軍數日不出晉王曰吾聞劉鄩用兵十步九計此必詐也。③④⑨

杜詩註。山谷曰漢書李廣數奇師古以爲命隻不偶合。漢王莽傳。廉丹以爲新拔城能勞當且休士養威。④⑩詩。兩驂如舞。左傳。楚子圍鄭晉師救鄭士季使鞏朔韓穿帥七覆於敖前故上軍不敗。④⑩漢趙充國傳。封營平侯諸羌背畔犯塞充國至金城計欲以威信招降罕开公卿議者咸以爲先零兵盛而負罕开之助不先破罕开則先零未可圖上乃以書讓充國充國以爲將任兵在外使宜有守以安國家乃上書陳兵利害璽書報之重充國計也史記白起傳秦復發兵使大夫王陵攻趙邯鄲是時武安君病不任行四十九年正月陵攻邯鄲少利秦益發兵佐陵陵兵亡五校武安君病愈秦王欲使武安君代陵將武安君言曰邯鄲實未易攻也。④⑩後漢馮勤傳。人臣放逐受誅雖追加賞賜不足償不訾之身。莊子。昔予爲禾耕而鹵莽之則其實亦鹵莽而報。④⑩吳志甘甯傳註。凌統怨甯殺其父操甯常備統不與相見嘗於呂蒙舍會酒酣統以刀舞甯起曰甯能雙戟舞蒙曰甯雖能未若蒙之巧也因操刀持楯以身分之。晉書王濬傳。詔書使濬至秣陵授王渾節度及濬將至秣陵王渾遣信要令暫過論事濬舉帆直指報曰風利不得泊也。④⑩曲禮。招搖在上急

繕其怒。司馬遷報任少卿書。死或重於泰山或輕於鴻毛。④⑤宋王九辨。憎慍倫之修美兮。好夫
人之慷慨。司馬相如諭巴蜀檄。身死無名諡爲至愚。論語。有殺身以成仁。④⑥後漢馬援傳。援謂
友人杜愔曰。吾受厚恩。常恐不得死國事。今獲所願。甘心瞑目。吳越春秋。管膽不苦甘如飴。④⑦
史記魏其傳。沾沾自喜。左傳。齊侯伐晉。夷儀敝無存之父將室之辭。以與其弟曰。此役也不死反必
娶於高國。宋書。臨川太守謝摛。每寢輒夢聞鼓吹。有人爲占之曰。君不得生。鼓吹當得死。鼓吹爾摛
擊杜弢戰歿。追贈長水校尉。葬給鼓吹焉。④⑧釋文。車衡三束也。曲轅轡縛直轅羣縛也。吳都賦。
扈帶鮫函。扶掖屬鏤。左傳。宋災。晉侯問於士弱曰。吾聞之。宋災於是乎。知有天道。何故。對曰。古之火
正。或食於心。或食於味。以出內火。④⑨左傳。晉伐偃陽。主人懸布堇。父登之。及堞而絕之。隊則又
懸之。蘇而復上者三。主人辭焉。乃退。帶其斷以徇於軍三日。又顏高之弓六鈞。皆取而傳觀之。⑤⑩
國語。鐵之戰。趙簡子曰。鄭人擊我。我伏弢。絡血鼓音不衰。今日之事。莫我若也。衛莊公爲右曰。吾九
上九下。擊人盡殪。今日之事。莫我加也。國策。必令其言如循環。用兵如刺蜚。書。魯人三郊三遂。戰國

策。其縮甲則可不然則願待戰。⑤⑩唐呂元膺傳。舊例留守賜旗甲與方鎮同元膺受任不賜朝論以淮西用兵特用元膺守洛不宜削其儀制以沮威望不從留守不賜旗自元膺始。隋書食貨志。文宣受禪多所創革六防之內徙者更加簡練每一人必當百人任其臨陣必死然後取之謂之百保鮮卑。北史房謨傳。謨先取乘馬別給將士戰敗蜀人得之謂謨遇害莫不悲泣善養其馬不聽乘騎兒童婦女競投草粟皆言此房公馬也。⑤⑩後魏于栗磾傳。劉裕之伐姚泓栗磾慮北侵擾築壘河上裕憚之貽書假道題曰黑稍公麾下栗磾以狀表聞明元因之授黑稍將軍栗磾好持黑稍故有是號。北魏景穆十二王傳。仲景性嚴峭莊帝時兼御史中尉京師肅然每向臺恆駕赤牛時人號赤牛中尉。⑤⑩漢百官表。戊己校尉元帝初元元年置。博物志。太僕朱浮言詔書曰百官皆戴王莽時綬又不齊因前袁安故綬李涉等六家所織綬不能具丙丁文募能爲綬作丙丁文者。⑤⑩魏略。魚豢常從隗禧問左氏傳禧答曰欲知幽微莫若易人倫之紀莫若禮多識山川鳥獸之名莫若詩左傳相斲書耳未足精意。拾遺記。呂蒙入吳吳王勸其學業蒙乃博覽羣籍以易爲宗常在

孫策座上酣醉忽臥於夢中誦周易一部。⑤⑩⑤詩。王之蓋臣無念爾祖。傳曰。薰進也。檀弓。陽門之介夫死而子罕哭之哀。莊子。帝王之功聖人之餘事也。⑤⑩⑥左傳。鄭簡公葬司墓之室有當道者毀之則朝而塤不毀則日中而塤。檀弓。季康子之母死公輸若方小歛般請以機封。⑤⑩⑦漢書。霍去病薨上悼之發屬國元甲軍陳自長安至茂陵爲冢象祈連山。蘇詩。倦游憐我憶黃封。⑤⑩⑧漢書霍去病傳。衛青尙平陽主合葬起塚象廬山云。天寶遺事。潼關之戰祿山將崔乾祐領白旗軍左右馳突又見黃旗軍數百隊官軍潛謂是賊須臾見與乾祐鬪黃旗軍不勝退而又戰者不一俄而不知所在後昭陵奏是日靈宮前石人馬汗流。⑤⑩⑨莊子。伍員流於江葦宏死於蜀藏其血三年化爲碧。烈士傳。荆軻發後太子相氣見白虹貫日不徹曰吾事不成矣。⑥⑩⑩韓詩。面有熊豹姿。易。虎視眈眈。唐書。貞觀十七年二月圖功臣於凌烟閣。⑥⑩⑪晉書張軌傳。王彌寇洛陽軌遣北宮純張纂馬鮪陰濬等率州軍擊破之又敗劉聰於河東京師歌曰涼州大馬橫行天下涼州鷗苕寇賊消鷗苕翩翩怖殺人。古今註。鯨魚大者長千里鼓浪成雷。左傳。將執戎子駒支范宣子親數諸朝。杜詩。

防身一長劍。將欲_六嶢峒。_六④⑤易。初六習坎。入于坎窞。九二坎有險。又大壯。小人用壯。左傳。殺敵爲果。致果爲毅。易師卦。長子帥師。弟子輿尸。_六④⑤左傳。公在楚。季武子使公冶問。壘書追而予之。周禮。司勳凡有功者。銘書於王之太常。書厥有成績。紀于太常。_六④⑤周禮。天官內宰註。天子巡狩。禮所云制幣丈八尺。純四狶歟。檀弓。銘明旌也。以死者爲不可別。已故以其旗識之。

湯恭人墓表


恭人姓湯氏。名松。小字松姑。內閣中書舍人上選公女。前刑部郎中。今知揚州府事魏君成憲之原配也。華標胃緒。柔協輦絲。_一肆窈窕德象之篇。工織紵組紃之事。_三久已父書能讀女誠先脩。知府君其中表弟也。誦毛詩九紙。見賞於叔明。_五下鏡臺一枚。有同於溫嶠。_六載歌鳴雁。信美河魴。催粧逢小雪之天。卻扇在明星之候。三商禮重。_七一秣心齊。時恭人年二十有二也。上謹尊章之奉。_八俯諧娣姒之歡。酒介春祺。旨課冬蓄。家人占其無遂。季女詠其有齋。脂澤不施。綈綦彌樂。至

於紡輒助讀。鏡檻邀吟。不是詩人。能言春月^九。偶談佳什。可想清風。愛玩宜甚於高柔。寄答亦深於徐淑^十。胡天胡帝。百年偕老之心。采采采藍。一日三秋之喻。嘉偶曰。斯之謂乎。然而繡佛幢前。六時頂禮。淨居室裏。終日長齋^{十一}。幡貝葉於香^{十二}。幙獻蓮花於鐙席。蒲團冥坐。蕉水澄思。慧業前生。達觀一切。固知性同薺蔔。證般若而彌馨。身是優曇。向閻浮而偶現者矣^{十三}。迨知府君名膺春選。秩領秋曹。締西笑而迎來。效北征而賦往。長風五兩。遠路三千。極沂煙波。重違鄉里。佩瓊無恙。喜同齊女之車。釣竹相思。愁繫衛姬之楫。甫作並巢之旅燕。已成出骨之飛^{十四}。龍落葉紛催。采蟲奚及。蓋至京甫兩月而卒。年三十有三。時乾隆丙午閏七月十有四日也。賸左思之嬌女。耳耳亦佳^{十五}。念安豐之故妻。卿卿安得^{十六}。知府君長年感逝。一賦傷心。惜別歌離。記共牛衣者幾載。停辛貯苦。賴操齏白者十年^{十七}。乃繡翟方新。而困藜已據。倚袖空留乎修竹。返魂莫問乎稠桑^{十八}。嗚呼痛哉。後十年嘉

慶戊午。知府君來任維揚。適余主講於是。酒間燈下。每話及之。邗水溝荒。如流
嗚咽。瓊花夢斷。倍感飄零。深懼閼德不彰。乞余爲墓道之表。嗟嗟。俸錢十萬。齋
奠曾營^{十九}。元壤一杯。松柏已長。讀其哀詠。可刪蒙楚之篇^{二十}。鐫此幽碑。合是鬱林之
石。

【註】①蘇頌文門承胄緒。②海錄碎事禮女子生能言教之聲絲女工。③顏氏家訓河北婦人織紵
組紃之事大優于江東。④晉書韋逞母宋氏能讀父書。⑤南史范雲傳六歲就其姑夫袁叔明讀毛
詩日誦九紙陳郡殷弘名知人候叔明見之曰公輔才也。⑥世說溫嶠喪婦從姑劉氏惟有一女甚
有姿慧姑以屬公覓婚公密有自婚意因下玉鏡臺一枚。⑦儀禮士婚禮註凡日入三商謂之昏。⑧
漢書廣川王越傳背尊章注猶言舅姑也。⑨侯鯖錄東坡先生王夫人曰春月色勝如秋月色秋月
色令人悽慘春月色令人和悅先生大喜曰吾不知子能詩耶此真詩家語耳。⑩鍾嶸詩品漢爲五
言者不過數家而婦人居二徐淑敍別之作亞於團扇矣。⑪法范珠林昔釋尊入定琴歌震於石

室婆提颺唄清響激於淨居。①②宋史天竺國僧道圓自西域還得貝葉梵經四十夾。③法華經如是妙法諸佛如來時乃說之如優曇花時一現耳。④古樂府飛龍落藥店骨出只爲汝。⑤崔琰傳諺言生女耳耳非佳語。⑥世說王安豐妻常卿安豐曰婦人卿壻於禮不敬以後勿復爾婦曰親卿愛卿是以卿卿我不卿卿誰當卿卿。⑦後漢書馮衍妻嘗自操井臼。⑧十洲記聚窟洲有神鳥山多大樹與楓相類而花葉香名曰返魂樹。⑨元稹悼亡詩今日俸錢過十萬與君營奠復營齋。⑩孫子荆字蒙楚注蒙楚見詩。⑪唐陸龜蒙傳陸氏遠祖績爲鬱林守罷歸無裝舟輕不可越海取石爲重人稱其廉因號陸氏門前石爲鬱林石



詳分註類
駢文觀止

全二冊

定價大

編纂者	金敏倫
校閱者	吳敬暉
出版者	大通圖書社
發行人	吳雨江
特約發行所	中西書局總店

上海望平街中市

▲各省中西書店均有分銷▼

(爲普及文化起見。照定價一折廉售)

海 上

印 編 社 書 圖 通 大

行 發 局 書 西 中